

Kuyantika 1

Kuyantika 2

Kuyantika 3

Kuyantika 4

Kuyantika 5

Kubasika-Levi


Kutanga-Kulonga

Yozue

Bazuzi-Ruti

1 Samuele, Bankunga

Yobi



# MIKANDA *ya* 1 Samuele ti Bankunga

(Baleso 27 sambu na bana ti bajeune)

Musoniki: *Mama Lorella Rouster. MCE*

*Edition 2021*



Le Projet MWINDA—Ministères pour Chaque Enfant  
Merci à [www.freebibleimages.com/SweetPublishing](http://www.freebibleimages.com/SweetPublishing) sambu na dessein.

[ecmafrica@ecmafrica.org](mailto:ecmafrica@ecmafrica.org)

## Mikanda ya 1 Samuele & Bankunga      Baleso ya kele na Mukanda Yai

- Leso 1 Nzambi waka lombilu ya Ana, pesaka yandi mwana. 1 Samuele 1—2:11
- Leso 2 Bana ya Eli salaka buzoba. 1 Samuele 2:12-36
- Leso 3 Nzambi bingaka Samuele. 1 Samuele 3:1-21, 4 :1
- Leso 4 Mambu ya mpasi ti ya nsoni salamaka na mvita. 1 Samuele 4 :1-22
- Leso 5 Kiteki Dagoni bwaka na luse na ntwala ya Sanduku ya Kuwakana ya Nzambi. 1 Samuele 5 :1-12
- Leso 6 Sanduku ya Nzambi vutukaka, ti bantu ya Israele yambaka yo na kiese. 1 Samuele 6:1-18
- Leso 7 Samuele twadisaka Israele kubalula ntima, Yandi sambisaka Israele. 1 Samuele 7 :3-17
- Leso 8 Israele sosaka ntotila, Samuele songaka bo bampasi ya ntotila ta nata. 1 Samuele 8 :1-22
- Leso 9 Israele bakaka ntotila ya ntete. 1 Samuele 9 :1-27, 10 :1-27
- Leso 10 Saule bedisaka bantu ya Ammoni, bantu yonso ndimaka yandi bonso ntotila. 1 Samuele 11 :1-15
- Leso 11 Samuele pesaka message ya nsuka. 1 Samuele 12 :1-25
- Leso 12 Saule pesaka nkailu ya Nzambi me pesa yandi kiyeka ve ya kupesa. 1 Samuele 13 :1-23
- Leso 13 Nzambi buyaka Saule sambu yandi lemfukaka ve diaka. 1 Samuele 15 :1-28
- Leso 14 Samuele tulaka Davidi ntotila ya Israele. 1 Samuele 16 :1-13
- Leso 15 Davidi sadilaka Saule na misiki, sonikaka bankunga. 1 Samuele 16 :14-23, Mukanda ya Bankunga
- Leso 16 Davidi vandaka na kikesa na kunwana na Goliati. 1 Samuele 17 :1-53
- Leso 17 Davidi salaka kinduku na Yonatani. 1 Samuele 17 :58--18 :5
- Leso 18 Saule zolaka kufwa Davidi na kimpala. 1 Samuele 18 :6—30
- Leso 19 Yonatani sadisaka nduku na yandi Davidi. 1 Samuele 19 :1-24, 20 :1-42
- Leso 20 Davidi wilaka Saule mawa. 1 Samuele 21-23 somere, 24
- Leso 21 Davidi sonikaka bankunga kusonga mpila yandi sosaka Nzambi na ntangu ya mpasi. Bankunga 18
- Leso 22 Abigail sosaka ngemba ti Davidi. 1 Samuele 25 :3-35
- Leso 23 Davidi tinaka makasi ya Saule ti wilaka yandi mawa diaka. 1 Samuele 26 :1-25, 27 :1-12
- Leso 24 Nzambi buyaka Saule sambu yandi sosaka nganga-ngombo. 1 Samuele 28
- Leso 25 Saule fwaka na mvita. 1 Samuele 31
- Leso 27 Revisio ya 1 Samuele ti Bankunga

Kulonga Mikanda ya Bible

Kutwadisa Mwana na Yesu

Moniteur, konso leso ta landa lukanu yai :

Leso No., Titre

Leso na nkufi : Adresse

ya leso yai na Bible

[Moniteur, mbote nge tanga yonso na preparatio na nge, kansi na kalasi, beno ta tanga kaka bitini ya beto me tula na

kati ya leso. Beto me sola nki parti kutanga na bana sambu yo vanda nkufi.]

### I. Preparatio ya Moniteur—

Kikuma ya leso :

Verse ya bubu yai :

- Bankunga ya kwenda nzila mosi ti leso :

## II. Revisio—

- Kulanda devoir ya leso me luta :   
Kuyindula diaka baleso me luta:

## III. Kulonga Leso Yai—

- Kuyantika :  
 Developpement (Malongi ya nene ya leso yai na banti 4 ) :

### 1.1 Malongi ya nti ya ntete

Tangila bana :

[Awa nge ta mona kitini ya histoire ya Bible ya nge ke tangila bana.]

? Yula bana :

- Niveau prescolaire --
- Niveau primaire --  Niveau  
secondaire --  Bana sala

bageste :



Bana yimba ti kina :

>< Kumanisa :

- Verse ya bubu yai :  
 Bankunga ya kwenda nzila mosi ti leso :  
 Devoir sambu na bakristo :  
 Kubinga bavidu na Yesu :

Bitini yai ta monika na konso nti ya dilongi.

Bitini yai ta monika mbala mosi kaka na nsuka ya leso.

[Moniteur, nge ta mona nde beto me kabisa konso verse na kidimbu / kusonga mpila kulonga yo ndambu na ndambu. Beto mpi me sulinye kitini ya lenda vanda mbote kulonga bana ya age prescolaire.

Mbandu :

Sambu Nzambi me lutaka kuzola bantu yonso ;/ yo yina, Yandi pesaka bo/ Mwana mosi yina kele na Yandi,/ sambu konso muntu yina me ndima Yandi/ na ntima na yandi,/ yandi kufwa ve,/ kansi yandi

kuvanda na moyo/ ya mvula na mvula. / Yoane 3 :16

Beto me songa verse na preparatio sambu nge moniteur longuka yo ntete, na ntwala kutwadisa bana na yo.

NB sambu na bankunga :

Kana nge zaba ve bankunga ya beto me tuba, twadisa bana kuyimba nkunga ya nkaka ya nge zaba. Kansi, kaka konso nkunga ve, kansi bankunga ya kwenda nzila mosi na malongi ya leso.

Beto me tula bankunga na preparatio sambu nge, moniteur, yindula mbote nki bankunga kuyimba. Nge longuka yo to binga muntu ya nkaka kutwadisa yo.

NB sambu na moniteur :

Matondo sambu na mpila nge ke sadila Mfumu Yesu Kristo mpi dibundu na sika ya nge ikele. Kisalu yai ya kulonga bana kele kisalu ya nene ti ya mfunu. Nzambi sadisa nge na preparation ti na malongi na nge. Bika Yandi pesa nge kikesa diaka ya mpa.

Nzambi sadisa nge, sakumuna nge, ti pesa nge ngolo, na zina ya Yesu ! Amen.

---

NB sambu na verse ya bubu :

## Leso 1. Nzambi waka lombilu ya Ana, pesaka yandi mwana-bakala.

Leso na nkufi : Ana vandaka na nsoni ti na mawa sambu yandi vandaka kubuta ve. Yandi lombaka Nzambi mwana ti silaka kuvutula mwana yina na Nzambi. Nzambi waka lombilu na yandi, ebuna yandi butaka mwana ya bakala, Samuele.

1 Samuele 1—2:11 I.

### Preparatio ya Moniteur—

Kikuma ya lesu :

Beto samba Nzambi na bampasi yonso ya luzingu.

Verse ya bubu yai :

(Ana sambaka nde :

“Mfumu Nzambi ke kebaka/ luzingu ya bantu yina/ ke zitisaka Yandi/...muntu yandi mosi lenda kuka ve/ na ngolo na yandi mosi.”/

1 Samuele 2 :9

Nkunga ya kwenda nzila mosi ti lesu :

Nzambi Kuwa na Suka

Nzambi na mono ta kuwa  
Konso ntangu mono samba  
Ata n’ suka, Ata mpimpa,  
Nzambi ata kuwa!

Nzambi kuwa na-a su-uka  
Nzambi kuwa na mi-idi  
Nzambi kuwa na nkokila  
Konso ntangu beto samba !

### II. Revisio—

Kulanda devoir ya lesu me luta :

[Moniteur, yai kele lesu ya ntete, yo yina beto ta sala yai ve mposu yai, kansi beto ta sala yo na baleso ya ke landa.]

Kuyindula diaka baleso me luta:

Beto me longuka dezia mukanda ya Bazuzi.  
Beto me mona nde muntu bonso ntotila

vandaka kuyala ve, kansi Nzambi pesaka bantu bazuzi kutwadisa bo ntangu bo bondilaka Yandi. Yo vandaka ntangu ya bambeni yangisaka bo ngolo sambu bantu ya Israele kulaka bo ve mutindu Nzambi tubaka. Bo bikisaka bampani yai kuzinga na kati na bo. Yo vandaka ntangu ya kisakasaka mingi, ntangu ya bantu yonso salaka na mabanza na bo mosi.

Beto mpi monaka mukanda ya Ruti, ti beto monaka nde ata na bilumbu ya mbi yina, ndambu bafami vandaka kulanda Nzambi mpi kuzitisa Yandi. Nzambi mpi vandaka kusala kuyidika ntangu nde Yandi ta tinda Mesia, Mvulusi. Ee, Bozi ti Ruti zabaka ve, kansi mwana na bo Obedi ta kuma mbuta ya Mesia yina.

### III. Kulonga Leso Yai—

Kuyantika :

Beto me mona bazuzi mingi. Keti beno lenda bambuka ndambu na bo ? [Moniteur, pesa ntangu sambu na bana kutuba ndambu na bo.]

(Ee, Samsoni, Gedeoni, Debora, bo vandaka bazuzi ya gulusaka bantu ya Israele na bambeni na bo.) Bubuyai beto ta mona zuzi ya nsuka. Beto ta mona nki ? [Bantu vutula : Zuzi ya nsuka.] Yandi butukaka sambu mama na yandi sambaka Nzambi na kati ya bampasi ya luzingu na yandi. Kuwa mbote sambu nge kuwa zina na zuzi yina.

Developpement (Malongi ya nene ya lesu yai na banti 4) :

1.1 Ana vandaka na mpasi mingi na ntima sambu yandi vandaka kubuta ve. 1 Samuele 1 :1-8

Tangila bana :

1 Kuvandaka na muntu mosi, zina na yandi Elkana...

2 Elkana kwelaka bankento zole, Ana ti Penina. Penina vandaka kubuta, kansi Ana ve.

3 Konso mvula, Elkana vandaka kwenda na bwala Silo sambu na kusamba Mfumu Nzambi, ...ti kupesa Yandi makabu...

5 ... Ana, yandi vandaka kupesa yandi mingi, sambu yandi vandaka kuzola yandi mingi, ata Mfumu Nzambi pesaka yandi bana ve.

6 Kansi... Penina vandaka kuseka yandi mingi nde yandi ke butaka ve.

7 (ti)...kupesa Ana mpasi mingi ti kuna Ana yantikaka kudila, yandi mpi vandaka kumona mpila ya kudia ve.

? Yula bana :

Niveau prescolaire –


- Mpasi ya Ana vandaka nki ? (Yandi vandaka kubuta ve.)

Niveau primaire –

- Kana nkento kubuta ve, yai kele mpasi ya nene. Nani tulaka mambu yai kuluta mpasi ? (Penina, nkento ya zole ya Elkana)
- Penina salaka nki ya pesaka Ana mpasi ? (Kuseka yandi kaka.)

Niveau secondaire –

- Tata Elkana salaka nki sambu na kumeka kusadisa mabanza ya Ana ? (Yandi pesaka yandi mbisi ya makabu mingi kuluta Penina)  Bana sala bageste :

Bana sala bageste ya mawa ti mpasi bo Ana ntangu Penina vandaka kuseka yandi. 

Bana yimba ti kina :

O, mpasi, Ana !

Sambu nge ke butaka ve.

1.2 Ana sambaka Nzambi ngolo nde Yandi pesa yandi mwana ya bakala. Yandi silaka

kuvutula mwana yina na Nzambi. 1 Samuele 1 :9-18

Tangila bana :

9 Kilumbu mosi...Ana... kwendaka na munoko ya Nzo-Nzambi, kisika vandaka nganga Nzambi Eli.

10 Ana vandaka na mawa mingi na ntima; yandi sambaka Mfumu Nzambi ti kudila nde :

11 “Mfumu Nzambi, Nzambi-Mpungu, tala mutindu mono kele na mawa. Kuvila mono muntu na Nge ve, wila mono mawa. Pardo, pesa mono mwana, mono me sila nde mono mono ta pesa yandi na maboko na Nge na luzingu na yandi yonso tii kuna....”

12 Mutindu Ana vandaka kusamba Nzambi ntangu ya nda, Eli vandaka ke tala yandi na munoko.

13 Ana vandaka kusamba na nsi ya ntima, kaka munoko vandaka kunikana, Eli vandaka kuwa ata kima ve. Yo yina, yandi yindulaka nde yandi me lauka malafu,

14 ebuna yandi ...nde : “ Katula malafu na nge awa!”

15 Ana tubaka nde : “Ve mfumu, mono me lauka malafu ve...Mono me kwisa awa kusonga Mfumu Nzambi bampasi na mono....

17 Eli nde : “...Nzambi ya Israele kupesa nge kima ya nge me lomba Yandi.”....

? Yula bana :

Niveau prescolaire –

- Ana salaka nki sambu na mpasi na yandi ? (Yandi sambaka Nzambi.)

Niveau primaire –

- Ana kwendaka wapi kusamba Nzambi ? (Na munoko ya Nzo-Nzambi)

Niveau secondaire –

- Nani monaka Ana kusamba ?

(Nganga-Nzambi zina ya Eli)

- Sambu na nki yandi banzaka nde yandi me lauka malafu ?  
(Sambu munoko vandaka kunikana, kansi bandinga basikaka na munoko ve.)
- Ana tubaka nde yandi me lauka malafu ve, kansi yandi vandaka kusala nki ? (Kusonga Nzambi bampasi na yandi.)
- Ana silaka nde kana Nzambi pesa mwana, yandi ta sala nki ? (Yandi ta vutula yandi na Nzambi sambu na kusadila Yandi luzingu na yandi yonso.)

Bana sala bageste :

Bana sala geste kusonga mpila Ana tubaka mingi kaka na munoko kukonda ndinga.   
Bana yimba ti kina :  
Ana songaka Nzambi  
Bampasi na yandi.

1.3 Nzambi waka lombilu ya Ana, ebuna Yandi pesaka Ana mwana ya bakala zina ya Samuele. 1 Samuele 1 :19-20  Tangila bana :

19-20 Kilumbu landaka, Elkana ti fami na yandi ...kwendaka kusamba Mfumu Nzambi, ebuna na nima, bo vutukaka na bwala na bo Rama. Kuna, Mfumu Nzambi ndimaka bisambu ya Ana. Ana bakaka divumu ya bakala na yandi Elkana, ebuna yandi butukaka mwana ya bakala. Yandi pesaka yandi zina Samuele, sambu yandi tubaka nde :”Mono lombaka yandi na Mfumu Nzambi.”

? Yula bana :

Niveau prescolaire –

- Ketu Nzambi pesaka Ana mwana, to ve ?  
(E, Yandi pesaka.)

Niveau primaire –

- Ana pesaka mwana na yandi nki zina ? (Samuele)
- Nki disongidila ya zina Samuele ? (Mono lombaka yandi na Mfumu Nzambi.)

Niveau secondaire –

- Nki nge banza ? Ketu Ana zolaka kubaka mwana kana yandi lombaka yo na Nzambi ve ?  
[Moniteur, kuwa mabanza ya bana. Mbala ya nkaka yandi zolaka kubikala kaka mukuba.]

Bana sala bageste :

Bana sala bageste bonso mama ke simba mwana na yandi na kiese ti na luzolo.

Bana yimba ti kina :

Kiese na nge, mama Ana. Nge me sambila Nzambi.  
Kiese na nge, mama Ana.  
Nzambi me pesa nge mwana.

1.4 Ana lungisaka nsilulu na yandi, ti yandi pesaka Nzambi lukumu. 1 Samuele 1 :24-28, 2 :1-11

Tangila bana :

24-25 Ntangu mwana me bikisa kunwa mabele, Ana nataka ....Samuele na NzoNzambi, ata yandi vandaka kaka mwana ya fioti ....bo nataka mwana na ngangaNzambi Eli.

26 Ana tubilaka Eli nde, “Pardo, ketu nge ke zaba mono diaka? Si mono nkento yina telamaka awa kilumbu mosi penepene na nge, ke samba Mfumu Nzambi.

27 Mono lombaka Yandi mwana, ebuna Yandi me pesa mono mwana yango. Yandi yai.

28 Yo yina, mono ke pesa yandi na Mfumu Nzambi, yandi ta vanda muntu ya Mfumu Nzambi na luzingu na yandi yonso.”...

2 :1 Ntangu yai, Ana sambaka Nzambi nde :  
“Mfumu Nzambi me pesa mono kiese mingi na ntima !

Ntangu ya,i mono lenda tedimisa ntu na mono kukonda nsoni... Mono ke sepela sambu Nzambi me sadisa mono.

9 Mfumu Nzambi ke kebaka luzingu ya bantu yina ke zitisaka Yandi, Kansi bayina ke buyaka Yandi, bo ta fwa na kati ya mpimpa ;  
Muntu yandi mosi lenda kuka ve na ngolo na yandi mosi.

11 ...mwana yango Samuele bikalaka kuna na bwala Silo. Yandi kumaka kusadila Mfumu Nzambi na maboko ya nganga-Nzambi Eli.

? Yula bana :

Niveau prescolaire –

- Kisalu ya Samuele ta vanda kusadisa nani ? (Nganga-Nzambi)


Niveau primaire –

- Ana silaka nde yandi ta pesa mwana na Nzambi sambu na kusadila Yandi. Nki mutindu yandi lungisaka nsilulu na yandi ?  
(Yandi pesaka mwana Samuele kusadisa na nzo-Nzambi.)

Niveau secondaire –

- Nki mutindu nge banza ntima ya Ana vandaka ntangu yandi bikisaka mwana na yandi na nzo-Nzambi ?  
[Moniteur, kuwa mabanza ya bana. Mbala ya nkaka kiesa ti mawa vandaka na ntima kaka mbala mosi.]

Bana sala bageste :

Bana sala bageste bonso bo kele Ana, ke tuba bikala mbote na mwana Samuele na nzo-Nzambi.  Bana yimba ti kina :

Nzambi sadisaka Ana

Ti yandi vutulaka matondo.

Nzambi sadisaka Ana Ti yandi lungisaka ndinga na yandi.

>< Kumanisa :

Ana vandaka na mpasi ya kubuta mwana. Nki mambu ya nkaka ya luzingu lenda pesa beto mpasi ? [Moniteur, kuwa mabanza ya bana.] Ee, mpasi ya madia, mpasi ya maladi, mpasi ya nzo-nkanda, mpasi ya mvita mpasi ya kufinga ya bantu, mpasi ya mutindu na mutindu. Mbote kana bonso Ana, beto samba Nzambi na kati ya bampasi ya luzingu. Yandi muntu lenda sadisa beto. Nzambi pesaka Ana mwana Samuele, ti Samuele kumaka zuzi ya nene, zuzi ya nsuka ya Israele.

Verse ya bubu yai :

(Ana sambaka nde :

“Mfumu Nzambi ke kebaka/ luzingu ya bantu yina/ ke zitisaka Yandi/...muntu yandi mosi lenda kuka ve/ na ngolo na yandi mosi.”/ 1 Samuele 2 :9

Bankunga ya kwenda nzila mosi ti leso :

Yimba Nzambi Kuwa na Suka to nkunga ya nkaka ya kwenda nzila mosi ti leso yai.

Devoir sambu na bakristo :

Devoir mono ke pesa beno bakristo sambu na mposho yai, kusamba Nzambi ngolo na konso mpasi ya luzingu, na kivuvu nde Yandi ta sadisa nge.

Kubinga bavidu na Yesu :

Kansi kana nge kele mukristo ntete ve, zaba nde Nzambi kele ya salaka bima yonso. Beto bantu, beto me kota na makambu ti Yandi, sambu beto me lemfuka na Yandi ve. Beto me sala yina ya Yandi songaka beto kusala ve, ti beto me bika kusala yina ya Yandi songaka beto kusala. Beto me vila nzila. Beto me sala masumu.

Masumu lenda kota na zulu ve. Kansi Nzambi zolaka beto mingi, yo yina Yandi yidikaka nzila ya beto bantu ya mbi lenda kota na zulu. Yandi

tubaka nde lufutu ya masumu keke lufwa, kansi Yandi tindaka Mwana na Yandi Yesu Kristo kukota nsi ntoto yai, kusala mambu ya mbote, kansi na nsuka, Yandi kufwa na sika na beto. Kansi Yandi nungaka na zulu ya lufwa. Yandi telamaka na lufwa, ti ntangu yai, Yandi ke zinga mvu ya mvu.

Ntangu yai, kana nge mona mawa sambu na masumu na nge, nge lenda kaka tula Yandi ntima.

Ntangu yina, Yandi ta sukula ntima na nge. Kieleka, Yandi ta pesa nge ntima ya mpa ya zola kulanda nzila ya Nzambi. Yandi ta lolula masumu na nge yonso. Yandi ta kitula nge mwana na Yandi. O, keti nge me tula Yandi ntima ? Kana ve, beto zola mingi kusadisa nge sambu nge mpi kuma mwana ya Nzambi. Kana bikala na nima ya ecodim. To, kwisa kusolula ti beto konso ntangu nge zola. Yesu ke vingila nge.

==NSUKA YA LESO 1

Kana ntangu lunga, ☐

Longa mikanda ya Bible :

(Bangindu keke na nsuka ya mukanda yai.)

## Leso 2 Bana ya Eli salaka buzoba.

Leso na nkufi :

Muntu mosi ya Nzambi songaka Eli nde Nzambi me buya dikanda na yandi kulanda na kinganga, sambu bana na yandi me sala mbi mingi. Kansi lumbu mosi, Nzambi ta tinda Nganga ya Kwikama, Mesia.

1 Samuele 1 :3b ; 2:12-36 I.

### Preparatio ya Moniteur—

☐ Kikuma ya leso :

Beto sakana ve na mambu ya Nzambi. Beto sadila Nzambi sambu na kupesa Yandi lumbu, kansi ve kusosa program ya beto mosi.

☐ Verse ya bubu yai :

Bandinga ya Nzambi :

...”Mono ta zitisaka/ muntu yina ke zitisaka Mono,/ Mono ta pesaka nsoni/ na muntu yina ke pesaka Mono nsoni.”/ 1 Samuele 2:30b

☐ Bankunga ya kwenda nzila mosi ti leso :

Baka Lukumu

Na luzingu na mono,  
Baka lukumu, baka  
lukumu, Na luzingu na  
mono, Baka lukumu bubu !

Ee, Mfumu, Ee

Ee, Mfumu, Ee,  
Na yonso ya Nge tuba



Ee, Mfumu, ee  
 Mono zola lemfuka  
 Bu mo' tanga Bibila  
 Mono kaka ta ndima Ye mono ta  
 tuba ee, Mfumu, ee !

## II. Revisio—

- Kulanda devoir ya lesu me luta :

Na mposu me luta, beto lombaka beno kusamba Nzambi na konso mpasi ya luzingu. Kubaka mvutu lenda lomba nde beno landa kulomba kuluta mposu mosi. Kansi nani sambaka Nzambi, ti Nzambi sadisaka yandi na mposu me luta ? [Moniteur, pesa bana ndambu ntangu kupesa mvutu. Yula bo na nki mpasi Yandi sadisaka, ti nki mutindu Yandi sadisaka. Pesa bo enkuragema ya kulanda kusamba kaka.]

- Kuyindula diaka baleso me luta:

- o Nani lombaka Nzambi kupesa yandi mwana ?  
(Mama Ana) o Yandi silaka kusala nki na mwana yina ?  
(Kuvutula yandi na Nzambi, yandi sadisa ngangana na nzo-Nzambi)
- o Nzambi pesaka yandi mwana-bakala zina ya nani ?  
(Samuele) o Samuele kumaka zuzi.

Bazuzi ikwa ya  
 nkaka kwisaka na nima na yandi ?  
 (Zero. Yandi zuzi ya nsuka.)

## III. Kulonga Lesu Yai—

- Kuyantika :

Na kati ya bwala to paroisse, kana bantwadisi ya dibundu ke sala mbote, kiese mingi na bantu yonso.

Kansi kana bantwadisi ke sala mbi, mawa mingi na bantu yonso. Na ntangu ya mwana Samuele, ntwadisi na kati ya nzo-Nzambi

vandaka Eli. Yandi vandaka ngangana-Nzambi. Na ntwala ya Yesu, bantu ya Israele vandaka na banganga ya pesaka bamakabu ya bambisi na Nzambi. Eli yandi mosi salaka mbote, kansi yandi twadisaka ve bana na yandi na mpila ya mbote. Bana na yandi vandaka mbi na meso ya Nzambi. O, mawa !

- Developpement (Malongi ya nene ya lesu yai na banti 4) :

2.1 Bana ya Eli, Ofni ti Pinasi, vandaka banganga-Nzambi. Bo vandaka bantu ya mpamba ya zabaka Nzambi ve. 1 Samuele 1 :3b, 2 :12

- Tangila bana :

1 :3b ...Bana yai zole ya Eli, Ofni ti Pinasi, vandaka banganga-Nzambi kuna na Silo.

2 :12 Bana ya Eli vandaka bana ya mpamba. Bo vandaka kuyindula Mfumu Nzambi ve,

? Yula bana :

Niveau prescolaire –

- Bana ya Eli vandaka mbote to mbi ?  
(Mbi)

Niveau primaire –

- Bible tuba nde bana ya Eli, Hofni ti Pinasi, vandaka bantu ya mpamba. Keti nge ta vanda na kiese kana muntu kubinga nge muntu ya mpamba ? Sambu na nki ?  
[Moniteur, kuwa mabanza ya bana. Ndinga 'mpamba' zola tuba nde bo vandaka mbi mingi, mbi kaka. Kima ya mbote kutuba sambu na bo vandaka ve.]


Niveau secondaire –

- Na français 2 :12 tuba, « ils ne connaissaient point l'Eternel» (Bo zabaka Nzambi ve ata fioti). Nki mutindu muntu lenda vanda nganga Nzambi, kansi yandi zaba ve Nzambi ?

[Moniteur, kuwa mabanza ya bana.]

Bana sala bageste :

Bana sala bageste kusonga nde bana ya Eli vandaka mpamba.

 Bana yimba ti kina :

Bana ya Eli mpamba kaka

Bo yindulaka Nzambi ve.

2.2 Konso ntangu, Eli vandaka kuwa mambu ya mbi ya bana na yandi vandaka kusala.

Yandi nganinaka bo, kansi bo waka ve.

1 Samuele 2 :13-18, 22-24

Tangila bana :

13-16 bo vandaka kulanda mpi ve bansiku ya kinganga-Nzambi. (Bo sosaka bampila na kuyiba bantu bamakabu ya bo nataka kupesa na Nzambi.)

16 Kana muntu (ndimaka ve bo yiba makabu na bo, bo songaka yandi :) “Kele ve, pesa mono yo sesepi yai, kana ve mono ta baka yo na ngolo.”

17 Mutindu yo yina bana ya Eli vandaka kusala mubulu na meso ya Mfumu Nzambi, bo vandaka kuzitisa ve makabu ya bantu vandaka kwisa kunatila yandi.

22 Ntangu nganga-Nzambi Eli vandaka me nuna mpenza, yandi vandaka kuwa mambu yonso ya bana na yandi vandaka kusala na bantu ya Israele... (Yandi waka mpi mpila bo vandaka kusala mbi ti bankento ya kwisaka kusamba.)

23-24 Yo yina, yandi yulaka bo nde : « Sambu na nki beno ke sala mambu ya mutindu yai ? »

... beno bikisa mambu yina. ...yo kele mbote ve ata fioti.

? Yula bana :

Niveau prescolaire –

- Bana ya Eli salaka mbote to bo salaka mbi? (Mbi)


Niveau primaire –

- Bana ya Eli salaka nki na makabu ya bantu nataka na nzo-Nzambi ? (Bo yibaka yo)
- Bana ya Eli salaka nki na bankento ya kwisaka kusamba Nzambi ? (Bo salaka mbi ti bo.)
- Nki mutindu bana ya Eli vandaka kusakana na mambu ya Nzambi ? (Bo salaka konso mambu ya bo zolaka. Bo yindulaka lukumu ya Nzambi ve, kansi kiese na bo mosi kaka.)

Niveau secondaire –

- Eli songaka bana na yandi nde mpila bo vandaka kusala vandaka mbi. Kansi yandi salaka yo na nki ntangu ? (Ntangu yandi me nuna mpenza.)

Bana sala bageste :

Bana sala geste ya mawa sambu na mpila bana ya Eli vandaka kusala.  Bana yimba ti kina :

Bana ya Eli mbi kaka.

O mawa, mawa.

2.3 Mutubi ya Nzambi songaka Eli nde Nzambi me buya fami na yandi kulanda na kinganga sambu na mbi ya bana na yandi. Bo zole ta fwa kaka na lumbu mosi. 1 Samuele 2 :27-34

Tangila bana :

27-28 Profete mosi kwisaka kusonga Eli mambu yai ya Mfumu Nzambi tubaka, nde : « ...Mono solaka fami (ya beno) na kuvanda banganga-Nzambi na Mono... Mono pesaka bo mpi nswa ya kubaka ndambu ya makabu ya bantu ya Israele ke pesaka Mono.

29 Ebuna sambu na nki beno ke bebisaka makabu ya Mono Mfumu Nzambi tubaka na kunata na nzo na Mono ?

30 « Yo yina Mono Mfumu Nzambi, Nzambi ya Israele, ke tuba nde : « Mono tubaka katuka ntama nde fami na nge ti dikanda na nge ta sadilaka Mono tii kuna. Kansi ntangu yai, Mono me buya. Mono ta zitisaka muntu yina ke zitisaka Mono, Mono ta pesaka nsoni na muntu yina ke pesaka Mono nsoni.

31 Kilumbu kele... ata muntu mosi ve na dikanda na nge ta kuma mbuta. »

32-34 Nge ta vandaka diaka na nzo na Mono ve...« Nge ta zaba nde mambu ya Mono me tuba ta bwa mpidina ntangu bana na nge Ofni ti Pinasi, bo zole ta fwa na kilumbu mosi.

? Yula bana :

Niveau prescolaire –

- Nzambi tubaka nde bana ya Ofni ta zinga bamvula mingi, to bo ta fwa na kilumbu mosi ? (Bo ta fwa na kilumbu mosi.)


Niveau primaire –

- Nki ndola Nzambi pesaka Eli ti fami na yandi ?  
(Bo ta kuma bambuta ve, bo ta vanda banganga-Nzambi diaka ve.)

Niveau secondaire –

- Sambu na nki Nzambi vandaka na makasi na mpila bana ya Eli yibaka bamakabu ya bantu ? (Yandi me pesa bo nswa kubaka ndambu. Yandi me pesa mpila bo kuzwa

madia ya vandaka mfunu. Kansi bo zolaka kubaka yonso.) □ Bana sala bageste :

Bana sala bageste kusonga nde Nzambi buyaka fami ya Eli.  Bana yimba ti kina :

Bana ya Eli salaka mbi  
Bo sakanaka na mambu ya Nzambi.  
Ebuna Nzambi pesaka ndola Ti Yandi buyaka bo.

2.4 Profete tubaka nde lumbu mosi, Nzambi ta tedimisa Nganga ya Kwikama. Nganga yai ta vanda Mesia. 1 Samuele 2 :35 □ Tangila bana :

35 Na nima, Mono ta sola Nganga-Nzambi yina ta wilaka Mono ti kusala mambu yonso ya Mono ta songaka Yandi...

? Yula bana :

Niveau prescolaire –


- Nganga ya Kwikama ta vanda nani ? (Mesia)

Niveau primaire –

- Nki kele kima mosi Nzambi songaka sambu na Mesia ? (Yandi ta vanda Nganga-Nzambi mosi ya kwikama.)

Niveau secondaire –

- Yindula. Yesu Mesia vandaka NgangaNzambi nki mutindu ? (Yandi kudipesaka menga na Yandi makabu sambu na masumu na beto.) □ Bana sala bageste :

Bana nangula maboko bonso bo kele Yesu na zulu ya kulunsi, ke pesa menga makabu sambu na masumu na beto.  Bana yimba ti kina :

Yesu, Mesia,  
Nganga-Nzambi ya kwikama !

Yesu, Mesia, Kudipesaka menga na Yandi ! Yonso sambu na beto.

>< Kumanisa :

Bana, bana ya Eli vandaka banganga-Nzambi, kansi ya kwikama ve. Bo vandaka ve kupesa Nzambi lukumu. Bo vandaka kusakana na mambu ya Nzambi sambu na kusosa mambote na bo mosi. Nzambi pesaka bo ndola ya ngolo.

Nzambi silaka nde lumbu mosi, Yandi ta tinda Mesia ya ta vanda Nganga-Nzambi ya kwikama. Na ntangu ya kulunga, Yesu Mesia kwisaka. Yandi pesaka Nzambi kiese na mambu yonso. Yandi kudipesaka menga na Yandi bonso makabu na Nzambi. Menga yina lenda katula masumu ya konso muntu ya tula ntima na Yandi Yesu.

Beto vanda ve bonso bana ya Eli, kusakana na mambu ya Nzambi. Beto pesa Yandi lukumu ya kieleka na ntima na beto, na bisambu na beto, mpi na luzingu na beto. Amen.

Verse ya bubu yai :

Bandinga ya Nzambi :

...”Mono ta zitisaka/ muntu yina ke zitisaka Mono/ Mono ta pesaka nsoni/ na muntu yina ke pesaka Mono nsoni.”/ 1 Samuele 2:30b

Bankunga ya kwenda nzila mosi ti lesa :

Twadisa bana kuyimba ‘Baka Lukumu’, ‘Ee, Mfumu, Ee’, to nkunga ya nkaka ya kwenda nzila mosi ti lesa yai.

Devoir sambu na bakristo :

Bana bakristo, devoir mono ke pesa beno mposho yai yo yai : kutula ngolo kupesa Nzambi lukumu na yonso ya nge sala. Kusosa ve mambote ya nge mosi, kansi sosa kupesa Yandi lukumu kaka.

Kubinga bavidu na Yesu :

Bana, beto me mona bana ya Eli, Ofni ti Pinasi. Bo vandaka banganga-Nzambi. Kisalu na bo na kati ya nzo-Nzambi. Kansi Bible ke tuba nde bo zabaka Nzambi ve. Muntu lenda vanda longi, pasteur, diakre, choriste, kansi yandi zaba Nzambi mpenza ve. Ebuna nge, nge kele na kati ya ecodim, kansi

keti nge zaba Nzambi ? Keti nge me balula ntima, me yamba Yesu Kristo bonso Mvulusi ti Mfumu na nge ?

Ndola ya bantu ya zaba Nzambi ve ikele terrible. Yo kele lufwa mvu ya mvu. Bantu yina ta kuma na bwala ya Nzambi ve.

Kana nge ke na mfunu ya lusadisu kuyamba Yesu, kwisa solula ti beto na nima ya ecodim. Kiese mingi kana beto lenda sadisa nge.

==NSUKA YA LESO 2

Kana ntangu lunga,  Longa mikanda ya Bible :

(Bangindu kele na nsuka ya mukanda yai.)

## Leso 3 Nzambi bingaka Samuele.

Leso na Nkufi : Nzambi bingaka Samuele na mpimpa, kansi ntete yandi yindulaka yo vandaka Eli. Na nsuka, yandi ndimaka ti waka ndinga ya Nzambi.

1 Samuele 3:1-21, 4 :1 I.

### Preparatio ya Moniteur—

- Kikuma ya lesa :

Yonso Nzambi me tuba, beto vanda nswalu kundima.

- Verse ya bubu yai :

“Tuba ka Nge;/ mono muntu na Nge/ ke wa.”/  
1 Samuele 3:10b

- Bankunga ya kwenda nzila mosi ti lesa :

Ee, Mfumu, Ee

Ee, Mfumu, ee

Na yonso ya Nge tuba

Ee, Mfumu, ee

Mono zola lemfuka

Bu mo’ tanga Bibila

Mono kaka ta ndima

Ye mono ta tuba ee,

Mfumu, ee!

Kuwa Bible

Kuwa Bible

Tanga Bible

‘Buna nge ta

mona Nzila mbote

mingi

Nzila mbote

mingi Ye ngangu

I Ye ngangu !

## II. Revisio—

- Kulanda devoir ya lesa me luta : Na mposo me luta, beto pesaka beno bakristo devoir kusosa kupesa Nzambi lukumu na yonso

ya nge sala. Nani tesaka kusala yo na mposo me luta ? Nani lenda songa beto mpila yo lutaka sambu na yandi ?

- Kuyindula diaka baleso me luta:

[Moniteur, nge tanga, ti bana tuba bandinga ya ke konda.] Eli ti bana na yandi vandaka (nki )

\_\_\_\_\_, kosalu  
na bo kusadila Nzambi na kati ya

\_\_\_\_\_.  
Kansi, bana ya Eli vandaka bantu ya (nki mutindu ?) \_\_\_\_\_. Bo vandaka kaka kusakana na mambu ya (nani ?) \_\_\_\_\_. Yo yina, Nzambi tindaka

(nani ?) \_\_\_\_\_ mosi na

kusonga Eli nde fami na yandi yonso ta baka (nki ?) \_\_\_\_\_ ya nene.

Na kati na yo, bana na yandi yonso zole ta fwa na lumbu \_\_\_\_\_.

[Moniteur, bamvutu yo yai : banganga-Nzambi, nzo-Nzambi, Nzambi, profeti, ndola, mosi.] III.

### Kulonga Leso Yai—

- Kuyantika :

Beto me mona bantu zole ya nene na bakapu yai ya luyantiku ya 1 Samuele. Beto me mona nganga-Nzambi zina ya ? (Eli) Ti beto me mona mwana zina ya ? (Samuele) Beto me mona nde Nzambi pesaka mwana Samuele sambu mama Ana bondilaka Yandi kupesa yandi mwana. Beto me mona nde Mama Ana nataka Samuele kubika yandi wapi ? (Na nzoNzambi) Kisalu ya Samuele na kileki na yandi kusadisa nani ? (Nganga-Nzambi Eli)  Developpement (Malongi ya nene ya lesa yai na banti 5) :

3.1 Nzambi vandaka kutuba na bantu mingi

ve na bilumbu yina. 1 Samuele 3 :1

Tangila bana :

1 Lekis Samuele vandaka kusadila Mfumu Nzambi na maboko ya Eli. Na bilumbu

yango yina, Mfumu Nzambi vandaka kutuba mingi ve na bantu ya Israele, to kusonga bo mambu na bambona-meso. ?  
Yula bana :

Niveau prescolaire –

- Na bilumbu yina, Nzambi tubaka na bantu mingi, to mingi ve ?  
(Mingi ve)

Niveau primaire –

- Keti Nzambi songaka bantu mbomameso mbala mingi na bilumbu yina ?  
(Ikele ve. Nzambi tubaka mingi ve.)

Niveau secondaire –

- Sambu na nki nge banza Nzambi vandaka kutuba mingi ve na bantu ?  
(Sambu bo zolaka ve kuwa Yandi. Bo vandaka ve kulanda yina ya Yandi me songa bo dezia. Mbandu : Bana ya Eli.)

Bana sala bageste :

Bana tula diboko na zulu ya munoko kusonga nde Nzambi vandaka kutuba mingi ve na bilumbu yina.



Bana yimba ti kina :

Nzambi tubaka mingi ve, mingi ve, mingi ve.

Nzambi tubaka mingi ve.

Bilumbu vandaka mbi.

3.2 Mbala tatu Nzambi bingaka Samuele, kansi yandi yindulaka nde yo vandaka Eli.  
1 Samuele 3 :2-8a

Tangila bana :

2-3 Kilumbu mosi na mpimpa, Eli vandaka me lala na shambre na yandi ...Samuele mpi vandaka me lala na Nzo-Nzambi...

4 Ntangu yai, Mfumu Nzambi bingaka Samuele nde : « Samuele ! » Samuele vutulaka nde : « E, mfumu »,

5 ebuna yandi kwendaka ntinu na Eli ti kutuba nde, « Nge bingaka mono, mono yandi yai. : Kansi Eli tubaka nde : « Kele ve, mono me binga nge ve ; vutuka, kwenda kulala. » Samuele mpi vutukaka na kulala.

6 Mfumu Nzambi bingaka diaka nde : « Samuele ! » Samuele telamaka, yandi kwisaka diaka na Eli nde : « Nge me binga mono, mono yandi yai. » Eli nde : « Kele ve, mono me binga nge ve, kwenda kulala.”

7 Samuele vandaka kuzaba Mfumu Nzambi ntete ve, sambu tii ntangu yina, Mfumu Nzambi vandaka me tubisa yandi ntete ve.

8a Mfumu Nzambi bingaka Samuele diaka nde : « Samuele ! » Samuele telamaka, yandi kwisaka diaka na Eli ti kutuba nde : « Nge me binga mono, mono yandi yai. »

? Yula bana :

Niveau prescolaire –

- Nani vandaka kubinga Samuele na mpimpa ? (Mfumu Nzambi )
- Samuel banzaka nde yo vandaka nani me binga yandi ?  
(Eli)


Niveau primaire –

- Nzambi bingaka Samuele mbala ikwa ?  
(Mbala tatu)
- Mbala tatu Eli songaka Samuele kusala nki ?  
(Kwenda kulala kaka.)

Niveau secondaire –

- Sambu na nki Samuele bakisaka ve nde Nzambi vandaka kubinga yandi ?  
(Nzambi me tubisa yandi ntete ve, ti Nzambi vandaka kutuba mingi ve na bantu na bilumbu yina.)  Bana sala bageste :

Tula mwana mosi kuvanda Eli. Yandi lala na ntwala ya bana ya nkaka. Bana ya nkaka sala bonso Samuele. Bo sala geste bonso bo

ke lala mpongi. Nge moniteur binga,  
 “Samuele!” Bana ya kele Samuele telama ti  
 kwenda na Eli. Yandi kaka vutula bo. Sala  
 yo mbala tatu.  Bana yimba ti kina :  
 Samuele! Samuele! Nzambi bingaka yandi.  
 Mbala tatu Nzambi bingaka.  
 Kansi Samuele kwendaka na Eli.

3.3 Bu Samuele kwisaka mbala ya iya, Eli  
 bakisaka nde Nzambi vandaka kubinga, yo  
 yina yandi pesaka Samuele conseye kundima ti  
 kuwa Yandi.

1 Samuele 3 :8b-9

Tangila bana :

8b Ntangu yai, Eli kwisaka kuzaba nde  
 Mfumu Nzambi muntu ke binga Samuele,  
 9 yo yina, yandi tubaka na yandi nde :  
 “Kwenda kulala ; kana muntu kubinga nge  
 diaka, tuba nde : “Mfumu, tuba ka nge ;  
 mono muntu na Nge ke wa.” Ebuna  
 Samuele vutukaka na kulala.

? Yula bana :

Niveau prescolaire –

- Ntangu yai, Eli bakisaka nde nani  
 vandaka kubinga Samuele ?  
 (Nzambi)

Niveau primaire –


- Eli pesaka Samuele conseye nde, kana  
 muntu kubinga yandi diaka, yandi tuba  
 nki ?  
 (“Mfumu, tuba ka nge ; mono muntu na  
 Nge ke wa.”)

Niveau secondaire –

- Nki mutindu nge ke mona conseye ya  
 Eli na Samuele ? (Mbote sambu yandi  
 vanda bonso kukangula na kuwa ndinga  
 ya Nzambi.)

Bana sala bageste :

Bana tula maboko na lweka ya makutu na bo  
 bonso bo kuwa. Bo tuba nde : “Mfumu, tuba ka

nge ; mono muntu na Nge ke wa.”  Bana  
 yimba ti kina :

Kana Nzambi binga diaka,  
 Samuele fweti ndima. Kana  
 Nzambi binga diaka, Samuele  
 fweti kuwa.

3.4 Samuele ndimaka ti waka ndinga ya

Nzambi. 1 Samuele 3 :10-14  Tangila  
 bana :

10 Mfumu Nzambi ...bingaka Samuele  
 mutindu Yandi vandaka kubinga yandi ntete  
 nde : “Samuele ! Samuele !” Samuele nde :  
 “Tuba ka Nge; mono muntu na nge ke wa.”

11-12 Mfumu Nzambi tubilaka Samuele nde :  
 « Mono ke sala ...na fami ya Eli mambu yonso  
 ya Mono tubaka...

13 Mono me songaka yandi nde Mono ke pesa  
 fami na yandi ndola ya kukonda nsuka sambu  
 bana na yandi me finga Mono ; yandi Eli  
 vandaka kuzaba nde bo ke sala mambu ya mbi,  
 kansi yandi vandaka kunganina bo ve.....

? Yula bana :

Niveau prescolaire –

- Nzambi bingaka Samuele diaka, to Yandi  
 bingaka ve ? (Yandi bingaka diaka.)


Niveau primaire –

- Mambu ya Nzambi songaka Samuele  
 tadilaka ndola ya nani ?  
 (Fami ya Eli)

Niveau secondaire –

- Beto me mona dezia mpila bana ya Eli  
 salaka mbi, ti mpila bo vandaka  
 kusakana na mambu ya Nzambi.  
 Nzambi tuba nde mpila bo salaka  
 vandaka bonso kusala nki na Yandi ?  
 (Kufinga Yandi.)

□ Bana sala bageste :

Bana nikisa ntu na bo ti songa luse ya mawa sambu na ndola ya ngolo ya Nzambi ta pesa na fami ya Eli.  Bana yimba ti kina :  
Mawa, mawa, ndola na fami ya Eli.

3.5 Samuele zolaka ve kusonga Eli, kansi yandi bondilaka Samuele, yo yina yandi songaka ndola ya Nzambi ta pesa fami na yandi. Ebuna Nzambi yantikaka kusala na Samuele bonso profete na Yandi.

1 Samuele 3 :15-21

□ Tangila bana :

15 Samuele lalaka kaka tii na suka...kansi yandi waka boma na kwenda kusonga Eli mambu ya mbona-meso ya yandi me mona.

16 Eli bingaka yandi nde : « Mwana na mono Samuele ! » Samuele nde : “E Papa.”

17 Eli yulaka yandi nde : “Nki mambu Mfumu Nzambi me songa nge, kubumbila mono kima ve....”

18 Yo yina, Samuele telaka Eli mambu yonso...Eli tubaka nde : « Yandi kele Mfumu Nzambi. Yandi sala mambu ya Yandi ke mona mbote. »

19 Samuele yelaka. Mfumu Nzambi vandaka ti yandi. Yandi lungisaka mambu yonso ya Samuele tubaka na zina na Yandi.

20 Mpidina bantu yonso ya Israele...bo zabaka nde ya kieleka, Samuele kele profete ya Mfumu Nzambi.

4 :1 Ntangu Samuele vandaka kutuba, bantu yonso ya Israele vandaka kuwa. ?

Yula bana :

Niveau prescolaire –

- Na nsuka, keti Samuele songaka Eli nki Nzambi tubaka, to yandi songaka yandi ve ? (Yandi songaka Eli.)

Niveau primaire –

- Bantu yantikaka kuzaba ti kubakisa nde Samuele vandaka nki ? (Profete ya Nzambi)

Niveau secondaire --


- Yindula. Samuele me yantika bonso nki, ti yandi me kuma nki ntangu yai ? (Yandi me yantika bonso mwana-nsadisi na nzo-Nzambi. Yandi me kuma profete ya Nzambi ya bantu yonso ke wa.)

- Nki nge banza sambu na mvutu ya Eli ? (Mbote. Ata yandi bakaka ndola, mvutu na yandi songa luzitu sambu na Nzambi.) □

Bana sala bageste :

Bana tula maboko na lweka ya makutu diaka.

Bo tuba bo na bo nde, “Kuwa

Samuele. Nzambi ke tubaka na yandi.” 

Bana yimba ti kina :

Samuele kumaka profete, profete, profete Samuele kumaka profete Nzambi tubaka na Yandi.

>< Kumanisa :

Ntangu Nzambi bingaka Samuele, yandi waka ndinga na Yandi. Na bilumbu yina, Nzambi tubaka na bantu na baprofete. Bubuyai, malongi ya baprofete yina, bo me sonika yo na kati ya Bible. Yo yina, kutanga Bible kele mpila ya ntete ya beto kuwa Ndinga ya Nzambi. Keti beto ke tanga yo mingi ? Beno ya ke tanga ntete ve, keti beno lomba mbuta ya fami kutangila nge ?

Ntangu beto kuwa malongi ya Bible, keti beto tuba na ntima na beto nde, “Ee, mono zola kulemfuka. Mono zola kusala yina ya ta pesa nge kiese, Nzambi” ? □ Verse ya bubu yai :

“Tuba ka Nge;/ mono muntu na Nge/ ke wa.”/

1 Samuele 3:10b

(Bandinga ya Samuele tubaka ntangu Nzambi bingaka yandi)

Bana tuba ya ndambu-ndambu mbala tatu. Na nima, mwana mosi ya kele ngolo kusala



bankunga, yandi tula yo na nkunga ti twadisa bana ya nkaka kuyimba yo. Tula bageste ti kina yo.  Bankunga ya kwenda nzila mosi ti lesa :

Bana yimba 'Ee, Mfumu, Ee' to nkunga ya nkaka ya ke kwenda nzila mosi ti lesa yai.

Devoir sambu na bakristo :

Devoir mono ke pesa beno bakristo, yo yai : Konso lumbu na mposo ke kwisa, tanga ndambu ya Bible. Ebuna, kudiya : Keti awa mono ke mona nsiku to nti ya dilongi ya mono fweti lemfuka ? Yo kele nki ? Ebuna, tula ngolo kulemfuka na yo to kusala yo. Tuba "Ee" na Nzambi.

## Leso 4 Mambu ya mpasi ti ya nsoni salamaka na mvita.

Leso na nkufi : Bantu ya Filistia bedisaka bantu ya Israele na mvita. Ebuna bantu ya Israele salaka kifu ya nene kunata Sanduku ya Nzambi na mvita, ti bantu ya Filistia bakaka yo. 1 Samuele 4 :1-22 I.

### Preparatio ya Moniteur—

Kikuma ya lesa :

Beto sadila ve bima ya Nzambi na mpila ya magie, kansi beto sosa Yandi mosi, Yandi ya kieleka.

Verse ya bubu yai :

Ntangu beno ta kota na mpasi,/ ntangu bamambu yai yonso ta bwila beno,/ pana beno ta zaba/ kusosa Mfumu Nzambi,/ ti kuwila Yandi./ Kulonga 4 :30

Nkunga ya kwenda nzila mosi ti lesa : Sosa Ntete

## II. Revisio—

Kulanda devoir ya lesa me luta :

Na mposo me luta, beto lombaka beno bakristo kutanga ndambu ya Bible konso

Kubinga bavidu na Yesu :

Mbala ya nkaka nge me yamba ntete ve Yesu Kristo Mwana ya Nzambi bonso Mvulusi na nge. Kulemfuka ya ntete-ntete ya Nzambi ke sosa na nge, kaka kuyamba Yesu, kutula ntima na Yandi. Kana nge zola beto kutendula mambu yai kuluta, to samba ti nge, bikala na nima ya ecodim bubuyai, ti beto ta sadisa nge.

==NSUKA YA LESO 3

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

lumbu ti kutula ngolo kusala yina ya nge tungaka. Nani tulaka ngolo kusala yo ? Nani lenda songa beto kima mosi ya nge tangaka ti nge salaka na kati ya ndinga ya Nzambi ? [Moniteur, pesa ndambu ntangu sambu na bana kupesa mvutu.]

Kuyindula diaka baleso me luta :

Na mposo me luta, beto monaka nde Nzambi tubaka na mwana Samuele. Nzambi tubaka nde Yandi ta pesa ndola na fami ya Eli sambu bana na yandi vandaka kusala mbi mingi. Yandi tubaka mpi nde bana na yandi zole ta fwa kaka na lumbu mosi.

Nsangu ya mawa mingi sambu na fami ya Eli !

## III. Kulonga Leso Yai—

Kuyantika :

Na ntwala bana ya Israele kotaka nsi ya Nzambi pesaka bo, Moise songa bo, « Ntangu beno ta kota na mpasi, ntangu bamambu yai yonso ta bwila beno, pana beno ta zaba kusosa Mfumu Nzambi, ti kuwila Yandi (Kulonga 4 :30). Ee, bantangu ya mpasi fweti kwisa, ebuna ntangu yina, bo fweti sala nki ?

[Moniteur, bana pesa mvutu : Kusosa Nzambi ti kuwila Yandi.]

Bambuka nde Nzambi songaka bo kukula bantu yonso ya vandaka kuzinga ntete na nsi yina, kansi bantu ya Israele salaka yo kaka ndambu. Ebuna bantu yina kumaka bambeni ya vandaka kupesa bo mpasi konso ntangu. □

Developpement (Malongi ya nene ya lesa yai na banti 4) :

4.1 Bantu ya Filistia bedisaka bantu ya Israele na mvita, yo yina Israele nataka Sanduku ya Nzambi bonso kima ya magie ya lenda gulusa bo. 1 Samuele 4 :1-5

□ Tangila bana :

1 Na ntangu yina, bantu ya Israele kwendaka kunwana bitumba na bantu ya Filistia.

2 Bantu ya Filistia ... bedisaka bantu ya Israele...

3 ...bambuta ya Israele tubaka nde : “Sambu na nki Mfumu Nzambi me bika bantu ya Filistia kubedisa beto...? Beto kwendeno kubaka Sanduku ya Kuwakana..., mpidina Mfumu Nzambi ta kwenda na beto ti kugulusa beto na maboko ya bambeni na beto.”

4 Yo yina, bo tindaka bantu ...na kubaka Sanduku ya Kuwakana ya Mfumu Nzambi...

Bana zole ya Eli...bo kwisaka nzila mosi ti yo.

5 Ntangu Sanduku ya Kuwakana kwisaka kukuma na kati ya camp, bantu ya Israele monaka kiesa mingi ; bo tulaka makelele mingi...

? Yula bana :

Niveau prescolaire –

- Bo kwendaka kusakana, to kunwana mvita ? (Kunwana mvita)

Niveau primaire –

- Bo nwanaka na nki mbeni ? (Bantu ya Filistia)
- Bo nungaka to bo belaka ? (Bo belaka)
- Bo yindulaka nde nki lenda sadisa bo kununga ? (Sanduku ya Kuwakana ya Mfumu Nzambi)
- Keti Nzambi me songa bo kunata Sanduku ya Kuwakana na Yandi na mvita ? (Ikele ve)

Niveau secondaire –

- Nki ke songa nde bantu ya Israele monaka Sanduku ya Nzambi bonso yo vandaka kaka kima ya magie ? Nki beno banza ? (Bo yindulaka bonso yo mosi vandaka na ngolo, kansi yo vandaka kaka kima, Nzambi ve.)
- Bo yindulaka kukwenda kubaka Sanduku ya Nzambi, kansi kuluta mbote bo salaka nki ? (Sosaka Nzambi. Kuyula Yandi nki bo fweti sala.)

□ Bana sala bageste :

Bana sala bageste ya mawa, ti bo dila bonso bo ke mona bampangi kufwa na mvita.



Bana yimba ti kina :

Bantu ya Nzambi monaka mfunu ya lusadisu

Bo kwendaka kubaka Sanduku ya Santu

Bo monaka nde kima yina kulenda sadisa bo. O, o.

4.2 Mbeni vandaka na boma, kansi bo nungaka diaka, bo bakaka mpi Sanduku ya Nzambi, ti bo fwaka bana ya Eli. Nsoni ti mawa!

1 Samuele 4 :6-11

□ Tangila bana :

6 Bantu ya Filistia waka makelele yina...Ntangu bo zabisaka bo nde bo me kwisa kunata

Sanduku ya Kuwakana ya

Mfumu Nzambi na camp ya bantu ya

Israele,

7 boma simbaka bo.....

10 Bantu ya Filistia nwanaka ngolo, bantu ya Israele belaka, ebuna bo tinaka na babwala na bo. ...

11 Bantu ya Filistia botulaka Sanduku ya Kuwakana ya Mfumu Nzambi. Bana ya Eli, bo zole... bo fwaka mpi.

? Yula bana :

Niveau prescolaire –

- Sambu na kukwisa ya Sanduku ya Nzambi na camp ya Israele, mbeni na bo vandaka na kiese to na boma ? (Boma mingi)

Niveau primaire –

- Nki mambu ya nsoni salamaka na Sanduku ya Nzambi na kati ya mvita ? (Mbeni bakaka yo. Yo kwendaka na maboko ya bantu ya Filistia.)


Niveau secondaire –

- Sambu na nki yo vandaka mfunu nde bana zole ya Eli mpi fwaka na mvita ? [Bambuka lesu me luta.] (Sambu Samuele songaka Eli ndinga ya Nzambi nde yo ta salama.)
- Bo me sadila kima santu ya Nzambi— Sanduku ya Kuwakana—bonso kima ya magie. Nki mutindu nge banza bo waka ntangu mbeni simbaka yo ? (Mpassi mingi sambu yo vandaka sika ya Nzambi vandaka kutana ti bo ti symbole ya Nzambi na kati na bo.) □ Bana sala bageste :

Mambu tatu ya mawa me salama, ebuna bana dila ngolo mbala tatu na nima nge tuba konso phrase :

1. Mbeni me baka Sanduku ya Nzambi !

2. Mwana ya Eli mosi me fwa!

3. Mwana ya Eli ya zole me fwa! 

Bana yimba ti kina :

Mbeni mene baka Sanduku ya Nzambi O nsoni, mawa, mawa, mawa !

4.3 Mawa diaka. Ntangu Eli waka nsangu yina, yandi mpi fwaka. 1 Samuele 4 :12-18

□ Tangila bana :

12-13 Na kilumbu yo yina, muntu mosi...tinaka bitumba; yandi kwisaka ... bilele ya kupasuka-pasuka, ti ntoto na ntu sambu na kusonga mawa na yandi...ntangu yandi kotaka na bwala na kuzabisa bantu nsangu yina, bantu yonso yantikaka kutula milolo.

14 Eli waka makelele yango, yandi yulaka nde : “Makelele ya nki bantu ke tula?” Nswalu muntu yango yina kwisaka kuzabisa Eli mambu yonso....

16 Muntu yango tubaka nde :”Mono me katuka na bitumba bubu yai. Mono me kwisa kutina.” Eli yulaka yandi nde: “Ebwe mwana na mono, nki me bwa ?”

17 Muntu yina nde : “Bantu ya Israele me tina bantu ya Filistia, beto me bela mpenza.

Ata bana na nge (zole), bo me fwa bo.

Sanduku ya Nzambi mpi, bo me botula yo.”

18 Ntangu muntu yango tangaka zina ya Sanduku ya Kuwakana, Eli katukaka na zulu ya kiti..., yandi bwaka ... Yandi bukanaka nkingu. Yandi fwaka, sambu yandi vandaka mbuta me nuna mingi ti kilo mingi mpi....

? Yula bana :

Niveau prescolaire –

- Ntangu Eli waka nde mbeni me baka Sanduku ya Nzambi, yandi salaka nki ? (Yandi bwaka ; yandi mpi fwaka.) Niveau


primaire –

- Bo me sadila Sanduku ya Nzambi bonso kima ya magie. Nki mambu ya mbote salamaka na nima ? (Ata kima mosi ve ya mbote. Yonso ya mawa ti ya nsoni.)

Niveau secondaire –

- Nki mutindu mambu yai yonso sadisaka bambeni na bo ya kuzaba Nzambi ? (Yo sadisaka bo ve ata fioti.)

Bana sala bageste :

Nkinga ya Eli bukanaka, yo yina, bana simba nkingu na bo.  Bana yimba ti kina :

Bambeni me baka Sanduku ya Nzambi. O mawa, mawa!

4.4 Nsoni diaka. Nkento ya Pinasi butaka mwana-bakala ti pesaka yandi zina Ikabodi, disongidila nde, « Lukumu ya Nzambi me katuka na Israele ». Ebuna yandi mpi fwaka. 1 Samuele 4 :19-22

Tangila bana :

19 Bukilo ya Eli...vandaka na divumu... Ntangu yandi bakaka nsangu nde Sanduku ya Nzambi bo me botula yo, bukilo na yandi ti bakala na yandi bo me fwa, po pana misongo simbaka yandi, yandi vandaka na ntoto, yandi butaka mwana....

21-22 ...Yandi tubaka nde : “Lukumu ya Nzambi me katuka na Israele! Sanduku ya Nzambi bo me botula !” Yo yina, yandi pesaka mwana na yandi zina Ikabodi (disongidila nde lukumu me katuka.)

? Yula bana :

Niveau prescolaire –

- Kaka ntangu yina, bukilo ya Eli salaka nki ? (Yandu butaka mwana.)

Niveau primaire –


- Zina ya mwana yina nani ? (Ikabodi)
- Disongidila ya zina Ikabodi nki ? (Lukumu me katuka na Israele.) Niveau

secondaire –

- Nki mutindu lukumu ya Nzambi me katuka na Israele ?

(Sambu mbeni me baka Sanduku ya Kuwakana, sika lukumu ya Nzambi vandaka kumonika na kati na bo.)

Bana sala bageste :

Bana sala geste bonso bo ke simba mwana ya mpa, kansi bo songa kiese ve. Bo tuba kaka “Ikabodi! Ikabodi! Lukumu ya Nzambi me katuka na beto.” 

Bana yimba ti kina :

O mawa, mbote beto sadilaka Sanduku ya Nzambi bonso kima ya magie ve!

>< Kumanisa :

Bana, Sanduku ya Nzambi vandaka kima ya mbote. Nzambi Yandi mosi songaka bo mpila kutunga yo. Lukumu na Yandi monikaka na zulu na yo. Kansi yo vandaka Nzambi ve nde bo sosa yo kusadisa bo. Mbote bo sosaka lusadisu ya Nzambi Yandi mosi. Yandi zola kusadisa.

Beto yindula ve nde kana beto tula Bible na nzo na beto, Nzambi fweti sakumuna beto sambu na kima yina. Beto yindula ve nde kana beto tula ekipe na beto ya futbol zina « Bana ya Nzambi » nde Nzambi fweti nungisa beto kaka. Beto yindula ve nde kana beto baka kitini ya nsuki ya pasteur ti bumba yo, nde beto fweti nunga na examen. Yai yonso kele bonso kusala magie, ata beto sala yo na bima ya mbote bonso Bible. Beto sosa lusadisu

kaka na Nzambi Yandi mosi. Yandi mosi lunga kusadisa beto!

Verse ya bubu yai :

Ntangu beno ta kota na mpasi,/ ntangu bamambu yai yonso ta bwila beno,/ pana beno ta zaba/ kusosa Mfumu Nzambi,/ ti kuwila Yandi./ Kulonga 4 :30

Bankunga ya kwenda nzila mosi ti leso :

Yimba « Sosa Ntete to nkunga ya nkaka ya ke kwenda nzila mosi ti leso.

Devoir sambu na bakristo :

Beno ya zaba Yesu Kristo na luzingu ya beno, devoir mono ke pesa beno mposo yai kele kusosa lusadisu ya Nzambi Yandi mosi na konso mambu beno ke na yo mfunu.

Kubinga bavidi na Yesu :

Kana Nzambi kele kusonga nge nde nge zaba Yandi ntete ve, kwisa na Yandi bubuyai. Balula ntima ti tula ntima na Yandi. Yandi MwanaNzambi kele kukinga nge. Yandi fwaka sambu na mbi na nge. Yandi telamaka na lufwa. Yandi ke na ngolo kugulusa nge kana nge ta binga zina na Yandi. Yandi lenda kitula nge mulandi na Yandi.

Beto kele awa konso mposo na nima ya ecodim kana nge ke sosa lusadisu na mambu yina.

==NSUKA YA LESO 4

Kana ntangu lunga,  Longa mikanda ya Bible :

(Bangindu kele na nsuka ya mukanda yai.)

## Leso 5 Kiteki Dagoni bwaka na luse na ntwala ya Sanduku ya Kuwakana ya Nzambi.

1 Samuele 5 :1-12 I.

### Preparatio ya Moniteur—

Kikuma ya lesa :

Beto bakristo buya bampeve ya mbi, sambu beto zaba nde beto lenda nunga bo, sambu Mpeve ya Nzambi ke na kati na bo.

Verse ya bubu yai :

...bana ya Nzambi. Beno me nungaka baprofete yina ya luvunu ; sambu Mpeve yina keke na ntima na beno, Yandi keke ngolo, kuluta bampeve yina keke na bantu ya nkaka awa na nsi-ntoto. 1 Yoane 4:4

Bankunga ya kwenda nzila mosi ti lesa :

Kuwa Bible, verse yai :

Kuwa Bible, Tanga Bible  
‘Buna nge ta baka Ngolo ya Mpeve, Ngolo ya Mpeve ya Nzambi ! ya Nzambi ! Banzambi ya Nkaka

Banzaaa-mbi ya nkaka  
Bantu me sala yo  
Nge kaka ke Nzambi  
Ya salaka beto !

### II. Revisio—

Kulanda devoir ya lesa me luta :

Na mposo me luta, beto pesaka beno bakristo devoir kusosa lusadisya ya Yesu na yonso ya beno zola sala. Nani lenda songa beto mpila mosi ya nge sosaka lusadisya ya Yesu na mposo yai? [Moniteur, pesa bana mosi to zola mpila kutuba na nkufi kana bo zola. Felisite bo ya me tula ngolo kusala devoir.]

Kuyindula diaka baleso me luta:

Beno ta bambuka nde na ntangu ya Moize,

Nzambi songaka bo nki mutindu kusala kima mosi ya bo bingaka “Sanduku ya Kuwakana” to na nkufi, “Sanduku ya Nzambi.” Nzambi vandaka kukuta banganga-Nzambi na bo kuna. Yandi vandaka kusonga lukumu na Yandi kuna. Yandi pesaka bo bansiku nki mutindu kusala ya Sanduku yina, sambu yo vandaka Santu, kima ya Nzambi.

Kansi bo tulaka ngolo ve kulanda bansiku yina. Bo yantikaka kuyindula Sanduku yina bonso kima mosi ya mazi—fetishi.

Bo vandaka kubela na bitumba ya bo vandaka kunwana na bantu ya Filistia. Mbote bo kwendaka na Nzambi kulomba lusadisya na Yandi, kansi bo salaka yo ve. Bo kwendaka kusimba Sanduku ya Nzambi, kunata yo na kati ya mvita bonso yo mosi lenda sadisa bo—bonso fetishi.

Nani bambuka mambu ya mawa ya salamaka? Ee, bo belaka diaka na mvita, mbeni fwaka bana ya Eli, Nganga ya Nzambi, ti mbeni simbaka Sanduku ya Nzambi ti kwendaka na yo!

### III. Kulonga Leso Yai—

Kuyantika :

Bubuyai, beto ta mona nki salamaka na Sanduku yina. Yo me kuma ntangu yai na maboko ya bantu ya Filistia, bantu ya sambaka biteki, ti zolaka Nzambi ve.

Developpement (Malongi ya nene ya lesa yai na banti 4) :

5.1 Bantu ya Filistia tulaka Sanduku ya Nzambi na kati ya nzo ya kiteki na bo.

1 Samuele 5 :1-2

Tangila bana :

1 Ntangu bantu ya Filistia me botula Sanduku ya Nzambi imene, bo katulaka yo na bwala (ya bantu ya Israele), bo nataka yo na bwala (na bo).

2 Bo kotisaka yo na nzo ya nzambi na bo Dagoni, bo tedimisaka yo na lweka ya kiteki ya Dagoni.

NB : Niveau secondaire : Bampani yonso vandaka na kiteki ya vandaka muntu na zulu parti ya nitu, mbisi ya masa na nsi. Bo sambaka mpeve ya mbi ya monikaka mpila yina. Bantu ya Filistia bingaka mpeve yina ‘Dagoni’. Bantu ya Congo binga mpeve yina ‘Mama Wata.’ Keti nge me wa mambu ya mpeve yai ?

? Yula bana :

Niveau prescolaire –

- Bantu ya Filistia tulaka Sanduku ya nani wapi—na nzo ya Nzambi to na nzo ya kiteki ? (Na nzo ya kiteki)


Niveau primaire –

- Bantu ya Filistia tulaka Sanduku ya Nzambi na kati ya nki kiteki ? (Dagoni, kiteki na bo)

Niveau secondaire –

- Na kati ya nzo ya kiteki na bo, bo tulaka Sanduku ya Nzambi wapi ? (Na lweka ya kiteki na bo Dagoni)

Bana sala bageste :

Bana sala bonso bo kele bantu ya Filistia, ke nata Sanduku ya Nzambi, bonso bo ke tula yo na nzo ya kiteki.  Bana yimba ti kina :  
Bantu ya Filistia Tulaka  
Sanduku ya Nzambi Na  
nzo ya kiteki. Mawa!

5.2 Mbala zole, kiteki Dagoni kubwaka luse na ntoto, na ntwala ya Sanduku ya Nzambi. Nzambi mpi bwilaka bantu ya Filistia na bamaladi. 1 Samuele 5 :3-6  Tangila bana :

3 Na suka suka, bantu... kwisaka kumona nde kiteki ya Dagoni me bwa ilungi na ntoto, na ntwala

ya Sanduku ya Nzambi. Bo bakaka kiteki yina, bo vutulaka yo na sika na yo.

4 Kilumbu landaka, na suka-suka, bo kwisaka kumona nde, kiteki me bwa diaka na ntwala ya Sanduku ya Mfumu Nzambi ; ntu na yo ti maboko na yo me katuka...

6 Mfumu Nzambi pesaka bantu ya bwala ... ndola ya nene mpenza ti boma ; bivimbu basika-basikaka bo yonso...

? Yula bana :

Niveau prescolaire –

- Ee to ve ? Kiteki ya Nzambi kubwaka luse na ntoto na ntwala ya Sanduku ya Nzambi. (Ee, mpidina.)

Niveau primaire –

- Bilumbu ikwa kiteki kubwaka luse na ntoto na ntwala ya Sanduku ya Nzambi ? (Bilumbu zole)
- Nki bukanaka na kiteki yina ? (Ntu ti maboko na yo)
- Nki ndola Nzambi pesaka bantu ya Filistia ? (Bivimbu me basika na bo yonso.) Niveau

secondaire –

- Sambu na nki Nzambi pesaka bo ndola ? (Sambu bo me tula Sanduku na Yandi na nzo ya kiteki.)
- Kubwa ya kiteki na ntwala ya Sanduku ya Nzambi, yo songaka nki ? (Nzambi me luta nene ti mpeve ya kiteki zabaka yo.)

Bana sala bageste :

Bana sala bonso bantu ya Filistia. Bo yituka ngolo ntangu bo mona nde kiteki na bo me bwa na ntoto. Na nima, bo yantika kumona makwanza mingi sambu na bambuma ya kele kubasika bo.



Bana yimba ti kina :

Mpeve ya kiteki monaka  
Kinene ya Nzambi.

Yandi kubwaka na ntoto  
Na luse na yandi.

5.3 Yo yina, bo katulaka Sanduku ya Nzambi.  
Bo tindaka yo na bwala ya nkaka, kansi ntangu  
yo kotaka bwala, Nzambi bwilaka bantu kuna  
na bamaladi. 1 Samuele 5 :7-9 □ Tangila  
bana :

7 Ntangu bo monaka mambu yina me  
bwila bo, bo tubaka nde, “Nzambi ya Israele  
me pesa beto ndola.... Mbote Sanduku ya  
Kuwakana kuvanda diaka ve na kati na  
beto.”

8 ...bamfumu ...ya Filistia... nde:  
“...nata yo na bwala (ya nkaka).” Ebuna bo  
nataka yo...

9 Kansi ntangu Sanduku kumaka na  
bwala..., Mfumu Nzambi pesaka bwala yina  
ndola, Yandi kumisaka yo kisakasaka.  
Yandi tindilaka bantu maladi ya bivimbu....

? Yula bana :

Niveau prescolaire –

- Ee to ve ? Bo nataka Sanduku ya  
Nzambi na bwala ya nkaka.  
(Ee, mpidina.)

Niveau primaire –

- Nani zengaka kutinda Sanduku ya  
Nzambi na bwala ya nkaka ?  
(Bamfumu ya Filistia)
- Nki salamaka ntangu yo kumaka na  
bwala ya nkaka ? (Nzambi pesaka bantu  
yonso kuna ndola.)

Niveau secondaire –

- Sambu na nki Nzambi pesaka bantu ya  
bwala yina ndola ?

(Mbala ya nkaka kusonga bo nde kieleka  
Sanduku vandaka ya Nzambi Mpungu, ti  
Yandi vandaka na kiese ve nde bo me  
simba yo.)

□ Bana sala bageste :

Bana sala bonso bo kele bantu ya bwala ya  
zole. Bo yonso kwenda kumona kukwisa ya  
Sanduku. Kansi ntangu bo mona yo, bo  
yantika kubela bivimbu ya mpasi.



Bana yimba ti kina :

Na bwala ya zole, mpasi mingi  
Bivimbu me yangisa bo.

5.4 Bo katulaka Sanduku ya Nzambi diaka, ebuna  
bo tindaka yo na bwala ya tatu. Kansi ntangu yo  
kotaka bwala, Nzambi bwilaka bo mpi na  
bamaladi. 1 Samuele 5: 10-12 □ Tangila bana :

10 Yo yina, bo tindaka Sanduku (ya Nzambi)  
na bwala ya tatu. Ntangu yo kumaka kuna,  
bantu tulaka milolo nde : « Bo me kwisa  
kunata Sanduku ya Kuwakana ya Nzambi ya  
Israele awa sambu na kufwa beto yonso !”

11 Bo bingaka diaka bamfumu yonso ya  
Filistia, bo tubilaka bo nde: “Beno vutula  
Sanduku...ya bantu ya Israele na kisika ya yo  
vandaka, mpidina yo fwa beto ve ti bantu na  
beto.” Sambu maladi vandaka me kota ntete na  
bwala, boma ya lufwa me simba bantu.

12 Ata bantu kufwaka ve, kansi bo monaka  
mpasi na bivimbu...

? Yula bana :

Niveau prescolaire –

- Bantu bakaka nki maladi—malaria to  
bivimbu ?  
(Bivimbu)

Niveau primaire –

- Milolo ya bantu na bwala ya tatu, yo  
songaka nki ?



(Bantu vandaka na boma nde bo mpi ta fwa.)


- Bantu na bwala ya tatu sika bo nataka Sanduku, keti bo fwaka ? (Bo fwaka ve, kansi bo basisaka bivimbu, ebuna bo vandaka na boma nde bo ta fwa.)

Niveau secondaire –

- Kana nge vandaka muntu ya bwala ya tatu, nge zolaka kuyindula nki ? [Moniteur, kuwa mabanza ya bana.]
- Sambu na nki Nzambi pesaka bo ndola yina ?  
(Sambu bo bakisa nde bo me sala

mbi, ti bo bakisa nde Nzambi kaka kele

Nzambi.)  Bana sala bageste :

Bana tula milolo ti bageste ya boma bonso bantu na bwala ya tatu ya bantu ya Filistia. 

Bana yimba ti kina :

Bana yimba nkunga, “Banzambi ya Nkaka:”

Banzaaa-mbi ya nkaka

Bantu me sala yo

Nge kaka ke Nzambi

Ya salaka beto !

>< Kumanisa :

Bana, kiteki Dagoni kubwaka na luse na ntwala ya Sanduku ya Nzambi sambu mpeve yina ya mbi, yo zabaka nde Nzambi me luta nene. Mpeve ya Nzambi ya kele na kati ya bantu na Yandi, Mpeve yina me luta bampeve yonso ya mbi. Yo yina, beto bakristo, beto kele na boma ve sambu na bampeve ya mbi. Beto ke landa mpi makambu na bo ve, sambu Nzambi na beto me luta nene, me luta nene, me luta nene !  Verse ya bubu yai :

...bana ya Nzambi. /Beno me nungaka baprofete yina ya luvunu ;/ sambu Mpeve yina kele na ntima na beno./ Yandi kele ngolo./ kuluta bampeve yina /kele na bantu ya nkaka awa na nsi-ntoto./ 1 Yoane 4:4

[Moniteur, bana tuba yo na nima ya nge fraze par fraze. Bo tuba yo mbala tatu. Na nima, bo yika bageste ti bo tuba yo mbala tatu diaka.]

Bankunga ya kwenda nzila mosi ti leso :

Kuwa Bible, verse yai :

Kuwa Bible, Tanga Bible

‘Buna nge ta baka Ngolo ya

Mpeve, Ngolo ya Mpeve ya

Nzambi ! ya Nzambi ! Banzambi

ya Nkaka

Banzaaa-mbi ya nkaka

Bantu me sala yo

Nge kaka ke Nzambi

Ya salaka beto !

Devoir sambu na bakristo :

Bana, keti bampeve ya mbi kele kuyangisa nge ?

Keti ke ke wa boma nde bo ta sala nge mbi ? Kaka lombamba Nzambi kusadisa nge. Yandi kele na ngolo kuluta bampeve yonso ya mbi. Yandi kele Nzambi Mpungu, ya ngolo yonso. Sosa lusadisu na Yandi.

Kubinga bavidi na Yesu :

Kansi bakisa mambu yai : Kana nge me balula ntima ntete ve kulanda Yesu Kristo, bampeve kele kuyala nge. Nge kele na Mpeve ya Nzambi ntete ve na kati ya luzingu na nge.

Nzambi pesaka Mwana na Yandi ya luzolo sambu na nge, na mpila nde nge lenda vanda na moyo, na mpila nge bampeve ya nkaka kuyala nge diaka ve na mbi na bo, kansi Yesu Kristo kuyala nge na mambote na Yandi. Kana nge kwikila nde Yandi kwisaka, Yandi kufwaka sambu na nge, kana nge me yilamb kubalula ntima sambu nge landa Yandi bonso Mfumu na nge, kaka binga zina na Yandi. Yandi ta vanda na kiese kugulusa nge.

==NSUKA YA LESO 5

Kana ntangu lunga,  Longa mikanda ya Bible :

(Bangindu kele na nsuka ya mukanda yai.)



## Leso 6 Sanduku ya Nzambi vutukaka, ti bantu ya Israele yambaka yo na kiese.

1 Samuele 6 :1-18 I.

### Preparatio ya Moniteur—

Kikuma ya lesu :  
Beto yangalala na mambu yonso ya mbote ya Nzambi me sala beto.

Verse ya bubu yai :  
Mbote bo pesa Mfumu Nzambi mersi/ sambu na kuzola ya Yandi ke zolaka bo,/ sambu na mambu ya kuyituka/ ya Yandi sadilaka bo./  
Bankunga 107 :8

Bankunga ya kwenda nzila mosi ti lesu :  
Kumisa Nzambi  
Kumisa Nzambi na kiese (3x)  
Aleluya! Na kiese!

Bandeke Kele Yimba  
Bandeke kele yimba na  
Yandi Bawanzio kumisa  
zina n'Yandi Bintuntu  
kele songa kitoko na bo  
'Buna beto bana na  
Yandi Kumisa Yandi  
mpi!

### II. Revisio—

Kulanda devoir ya lesu me luta :  
Na mposo me luta, beto monaka nde Mpeve ya Nzambi ya kele na kati na beto bakristo, Yandi luta ngolo na bampeve yonso ya mbi, bampeve ya biteke. Na mposo me luta, nani sosaka lusadisu ya Nzambi kungunga mpeve ya mbi ? Nani ta songa beto nki salamaka ? [Moniteur, kana mwana kele, yandi lenda tuba na nkufi nki me salama na yandi ti mpila Nzambi sadisaka.]

- Kuyindula diaka baleso me luta:
  - o Na mposo me luta, Sanduku ya Nzambi vandaka wapi ?  
(Na kati ya nzo ya kiteki ya bantu ya Filistia)
  - o Nki mutindu yo kumaka kuna ?  
(Bantu ya Israele tulaka yo na kati ya bitumba na mabanza nde yo sadisa bo, kansi bantu ya Filistia simbaka yo.)
  - o Sanduku yina vandaka nki ?  
(Bwate tres speciale, sika lukumu ya Nzambi vandaka kumonika) o Wapi sika Nzambi songaka bo kutula yo ?  
(Na sika ya kuluta nsiku na nzo ya bisambu na bo ya ntenta.)

### III. Kulonga Leso Yai—

Kuyantika :  
Mambu ya mawa me salama na bantu ya Israele. Bambeni na bo, bantu ya zolaka Nzambi ve, bantu ya Filistia, bo me simba Sanduku ya Nzambi. Kansi Nzambi vandaka na kiese na yo ve, yo yina, konso sika yo kwendaka, yo natilaka bo mpasi. Bivimbu basikaka na bantu sika yonso yo kwendaka. Na nsuka, bo tulaka yo na kati ya bwala ve, kansi na nseke sika bantu vandaka ve. Ata kuna, Nzambi basisaka bampuku mingi na ntoto, bo kudiaka madia na bilanga ya bantu ya Filistia. Yai salamaka sambu bo me yiba kima ya santu mingi, Sanduku ya Nzambi.   
Developpement (Malongi ya nene ya lesu yai na banti 4 ) :

6.1 Na nima ya bangonda 7, bangangangombo ya Filistia zengaka nde bo fweti vutula Sanduku ya Nzambi, ti tinda bamakabu kulomba pardo. 1 Samuele 6 :1-6  Tangila bana :

1 Sanduku ya Kuwakana ya Mfumu Nzambi vandaka bangonda nsambwadi na maboko ya bantu ya Filistia.

2 Ebuna bo bingaka... banganga-ngombo, bo yulaka bo nde : « ...Sanduku ya...Nzambi ...Beno songa beto nki mutindu beto fweti vutula yo na kisika na yo. »

3 Bo tubaka nde : « beno vutula yo ve ya mpamba ...kansi beno fweti tindila Yandi mpi makabu sambu na mbi na beno....»

4 ...Beno tindila Yandi biteki tanu ya bivimbu ti biteki tanu ya bampuku, yonso ya wolo, mosi...sambu na konso mfumu ya bantu ya Filistia....

5 ...beno pesa lukumu na Nzambi ya Israele. Mbala ya nkaka Yandi ta pesa beno diaka ndola ve....

? Yula bana :

Niveau prescolaire –

- Keti bantu ya Filistia fweti keba Sanduku ya Nzambi, to bo fweti vutula yo ?  
(Bo fweti vutula yo.)

Niveau primaire –


- Bangonda ikwa bantu ya Filistia monaka ndola ya Nzambi sambu bo yibaka Sanduku na Yandi ?  
(Bangonda nsambwadi-7)
- Bo yindulaka kuvutula yo ti nki ya nkaka sambu na kulomba pardo ?  
(Makabu ya or)

Niveau secondaire –

- Or ya bo ta tinda, yo ta vanda ve kana mpidina, kansi bo fweti tula yo na nki forme ?  
(Biteki ya bivimbu ti ya bampuku)

- Sambu na nki bo tulaka yo na forme yina ?  
(Sambu yina songaka bandola ya Nzambi vandaka kupesa bo.)

□ Bana sala bageste :

Bana sala geste bonso bo ke sala bivimbu ti bampuku ya or. Bo tuba nde, « O, Nzambi ya Israele, beto ke lomba na Nge, pardo ! »   
Bana yimba ti kina : Bantu ya Filistia yindulaka kulomba pardo Bo vutula Sanduku ya Nzambi. Bo pesa Nzambi makabu.

6.2 Bantu ya Filistia zikisaka nde bamaladi ya me bwila bo vandaka kieleka diboko ya Nzambi, kaka shanse ve.

1 Samuele 6 :7-9

□ Tangila bana :

7 Mpidina beno yidika pusupusu ya mpa, beno baka bangombe zole ke pesa mabele na bana na bo, me salaka mpi ntete kosalu ve ; beno kangisa yo na pusupusu, ebuna beno vutula bana na yo na nzo ya bangombe.

8 Beno baka Sanduku ya Kuwakana ya Mfumu Nzambi, beno tula yo na zulu ya pusupusu ; ebuna biteki ya wolo ya beno ke tindila Nzambi ya Israele, makabu sambu na mbi na beno, beno tula yo na sanduku ya nkaka penepene na Sanduku ya Kuwakana. Ntangu yai, beno pusa yo na ntwala, yo kwenda.

9 ...kana yo kwenda na ndambu ya bwala (na Israele), yo ke songa nde Nzambi ya bantu ya Israele Muntu me tinda beto mpasi yai ya ngolo ; kana yo kwenda na ndambu ya nkaka, mpidina beto ta zaba nde Yandi ve Muntu me tinda beto bampasi yina, kansi yo kwisilaka beto kaka mpidina. »

? Yula bana :

Niveau prescolaire –

- Bo ta vutula Sanduku ya Nzambi na bwatu, to na carte ya bangombe ke nata ?

(Na carte ya bangombe ke nata)


Niveau primaire –

- Nki bangombe fweti nata carte—bo ya me nuna, to bo ya me buta mwana sesepiyai ?  
(Bo ya me buta mwana)
- Kana ngombe me buta mwana, ti bo katula mwana yina, yandi ta sala nki ?  
(Yandi ta kwenda kusosa mwana yina. [Longi, yai kele mpila bo yindulaka kuzikisa kana Nzambi me tinda bandola na bo. Kana ngombe kwenda mbala mosi na bwala na Israele, yo ta vanda kimpa, sambu yo ta vanda contre nature na yandi.]

Niveau secondaire –

- Bo sadilaka bangombe ya me salaka ntete kisalu ve. Bo me nata carte ntete ve. Sambu na nki bo solaka bangombe ya mutindu yina ?  
(Sambu nature ya mbisi mbala ya ntete bo pesa yandi kisalu kele kulemfuka ve. Yo yina, kana bangombe nata carte kukonda mpasi, bo ta mona yo bonisi sine ya Nzambi me pesa.

Bana sala bageste :

Bana sala bageste bonso bo ke tula carte na bangombe, ke tula Sanduku na zulu na yo, ke tula mpi bivimbu ti bampuku ya or na sanduku ya nkaka, ke tula yo mpi. 

Bana yimba ti kina :

Bo salaka yonso Kuvutula  
Sanduku ya Nzambi.

6.3 Nzambi salaka kimpa nde yo vutuka na Israele. 1 Samuele 6 :10-12  Tangila bana :

10-11 Bo salaka mpidina...

12 Bangombe yantikaka kwenda na (bwala ya Israele) yo kwendaka kaka tii kuna na bwala ke dila, yo landaka nzila ya nkaka ve.

Bamfumu yina tanu ya Filistia vandaka kulanda yo tii kuna na ndilulu ya (bwala penepene ya Israele).

? Yula bana :

Niveau prescolaire –

- Bangombe kwendaka wapi ?  
(Na bwala penepene ya Israele)


Niveau primaire –

- Bangombe kwendaka mbala mosi na bwala penepene ya Israele. Yai songaka nki ?  
(Nde kieleka Nzambi muntu vandaka kupesa ndola na bantu ya Filistia.)

Niveau secondaire –

- Bantu ya nkaka ya Filistia salaka nki ? (Bo landaka yo na kinsweki kumona nki ta salama.)

Bana sala bageste :

Bana sala geste bonso bo kele bangombe. Bana na bo kele na gauche, bwala ya Israele kele na droite. Bo kwenda mbala mosi na droite, kudila bana na bo na nzila.  Bana yimba ti kina :  
Bangombe kwendaka mbala mosi Na bwala ya Israele. Sanduku ya Nzambi kwendaka ti bo Kuvutuka na Israele. O yea!

6.4 Bantu ya Israele vutulaka matondo na Nzambi sambu Sanduku me vutuka na kati na bo. 1

Samuele 6 :13-18  Tangila bana :

13 Bantu ya (bwala ya Israele) ...ke mona Sanduku ya Kuwakana ke kwisa ; kiese simbaka bo na kumona yo.

14 Pusupusu kwisaka tii na kilanga ya...muntu ya (bwala ya Israele); yo telamaka penepene na ditadi ya nene. Bantu (pesaka) makabu na Mfumu Nzambi.

15 Bantu ya dikanda ya Levi katulaka Sanduku ya Kuwakana ti kasanduku yina vandaka na biteki ya wolo, ebuna bo tulaka yo na zulu ya ditadi yina ya nene....

16-18 Bamfumu yina tanu ya Filistia vandaka kutala bo, ebuna kilumbu yo yina, bo vutukaka na bwala (na bo)....

? Yula bana :

Niveau prescolaire –

- Bantu ya Israele vandaka na kiese to na mawa kumona nde Sanduku me vutuka ? (Kiese mingi)


Niveau primaire –

- Bo vutulaka Nzambi nki mutindu ? (Bo pesaka Yandi makabu.)
- Bantu ya dikanda ya Levi tulaka Sanduku ya Nzambi wapi ? (Na zulu ya ditadi ya nene na kilanga ya muntu mosi.)

Niveau secondaire –

- Nani vandaka kulanda bo sambu na kumona nki ta salama ? (Bamfumu tanu ya Filistia)

Bana sala bageste :

Bana yonso songa kiese mingi sambu Sanduku ya Nzambi me vutuka na bo.  Bana yimba ti kina : Sanduku ya Nzambi mene vutuka O lumbu ya kiese!

>< Kumanisa :

Nzambi me sala bantu ya Israele mambu mosi ya mbote nde Sanduku ya Nzambi me vutuka na kati na bo. Lukumu na Yandi lenda monika diaka na kati na bo. Yo yina, bo monaka kiese ti bo vutulaka Yandi matondo.

Nki mambu ya mbote Nzambi me sala na nge? Keti Yandi me pesa nge moyo bubu? Fami? Madia ti masa ti mupepe ? Keti Yandi me lolula mambi na

nge? Mbote nge kumisa zina na Yandi na yonso ya mbote Yandi me sala nge.

Verse ya bubu yai :

Mbote bo pesa Mfumu Nzambi mersi/ sambu na kuzola ya Yandi ke zolaka bo,/ sambu na mambu ya kuyituka/ ya Yandi sadilaka bo./ Bankunga 107 :8

[Moniteur, bana lenda tuba ndambu-ndambu, fraze na fraze, na nima ya nge. Bo tuba yo mbala tatu ti ekspresio mingi. Na nima, kabisa bo na bandambu iya. Pesa konso ndambu ya bana fraze mosi. Bo yonso tuba adresse. Sala mutindu yina mbala 3 to 4 diaka.]  Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi ti lesu.

Devoir sambu na bakristo :

Beno ya zaba Yesu Kristo bonso Mvulusi ti Mfumu na beno, devoir mono ke pesa beno mposo yai kele kumisa Nzambi konso lumbu na mambu ya mbote Yandi me sala nge.

Kubinga bavidi na Yesu :

Kana nge zaba Yesu Kristo ntete ve na luzingu na beno, nki ke kanga nge nzila kubinga zina na Yandi, kubalula ntima na nge, kuyantika kulanda Yandi ? Raiso Yandi bikisaka nzo na Yandi na zulu, kulumukaka na nsi-ntoto, sambu na kugulusa nge. Raiso Yandi monaka mpasi ti fwaka na zulu ya kulunsi, sambu na kubaka kizitu ya masumu na nge. Raiso Yandi telamaka na lufwa, sambu nge lenda baka moyo.

Kukuma mukristo nge fweti mona mpasi sambu na masumu na nge, ebuna balula ntima. Tula ntima na Yandi. Yandi ta pesa nge ntima ya mpa, ti nge ta kuma longuki na Yandi.

Kana muntu ke sosa lusadisu na mambu yina, mono ta vanda na kiese mingi kusadisa nge. na nima ya ecodim.

==NSUKA YA LESO 6

Kana ntangu lunga, □ Longa

mikanda ya Bible :

(Bangindu kele na nsuka ya mukanda yai.)

## Leso 7 Samuele twadisaka Israele kubalula ntima, Yandi sambisaka Israele.

1 Samuele 7 :3-17 I.

### Preparatio ya Moniteur—

Kikuma ya lesa :

Beto landa banzambi to bampeve ya nkaka ve,  
kansi Mfumu Nzambi kaka.

Verse ya bubu yai :

... « Kana beno zola/ kwisa kuvutuka na  
Mfumu Nzambi/ na ntima na beno yonso,/ beno  
fweti katula banzambi yonso/ ya nzenza ti  
biteki/...Beno kudipesa mvimba na Mfumu  
Nzambi,/ beno samba kaka Yandi,/ ebuna

Yandi ta gulusa beno... » 1 Samuel 7 :3

Bankunga ya kwenda nzila mosi ti lesa :

Banzambi ya Nkaka

Banzaaa-mbi ya nkaka

Bantu me sala yo

Nge kaka ke Nzambi

Ya salaka beto !

Vutuka, Afrika ! Vutuka !

Vutuka! Afrika, vutuka !

Vutuka na Nzambi nge me vila Beto

bika bampeve yonso, biteki yonso,

Beto vutuka n'andi ya salaka beto !

Beto vutuka n'andi ya salaka beto !

### II. Revisio—

Kulanda devoir ya lesa me luta : Na mposo  
me luta, nki vandaka devoir beto pesaka  
beno bakristo ? Nani bambuka ? Ee, yo  
vandaka kumisa Nzambi konso lumbu  
sambu na mambu ya mbote Yandi me sala  
beno. Nani tulaka ngolo kusala yo ? Nani  
ta songa beto mambu mosi ya mbote ya nge  
kumisaka Nzambi sambu na yo ?

Kuyindula diaka baleso me luta:

Na bamposo me luta, beto vandaka  
kulanda Sanduku ya Nzambi. Yai  
vandaka kima ya vandaka ntete na nzo  
ya bisambu ya bantu ya Israele. Yo  
songaka nde Nzambi vandaka na kati na  
bo. Lukumu na Yandi monikaka na zulu  
na yo.

- o Bo nataka yo na kati ya bitumba  
sambu na nki ?  
(Bo yindulaka nde yo ta sadisa bo  
kubedisa bambeni, bantu ya Filistia.)
- o Nki mambu ya mbi salamaka na yo ?  
(Bambeni simbaka yo ti kwendaka  
na yo.)
- o Yo vandaka na kati ya bantu ya  
Filistia bangonda 7. Na ntangu yina,  
bantu yina monaka nki ? (Kaka  
bampasi, ndola ya Nzambi. Nzambi  
basisaka bo bivumbu, ti  
bampuku kudiaka madia na bo na  
bilanga.)
- o Na nsuka, bo salaka nki ti Sanduku  
yina ?  
(Bo vutulaka yo na bantu ya Israele,  
ti makabu kulomba pardo.)

### III. Kulonga Leso Yai—

Kuyantika :

Ntangu yai, Sanduku ya Nzambi me vutuka na  
Israele. Bo vandaka na kiese mingi na yo. Bo  
tulaka yo na zulu ya ditadi ya nene na kati ya  
kilanga na nseke. Kansi, bo waka boma  
kuvutula yo ve na nzo ya bisambu.

Developpement (Malongi ya nene ya lesa yai  
na banti 6) :

7.1 Sanduku ya Nzambi lalaka na zulu ya  
ditadi na nseke ya bwala mosi bamvula 20.  
Bantu vandaka kaka kudidila Nzambi  
kugulusa bo na bambeni. 1 Samuele 7 :2

Tangila bana :



2 Sanduku ya...Nzambi bikalaka bilumbu mingi na bwala... kiteso ya bamvula makumi zole (20). Na ntangu yina, yonso bantu ya Israele vandaka kudidila Mfumu Nzambi sambu Yandi sadisa bo.

? Yula bana :

Niveau prescolaire –

- Sanduku ya Nzambi lalaka na zulu ya ditadi kilumbu mosi, to bamvula 20 ? (Bamvula makumi zole)


Niveau primaire –

- Ntangu yina, bantu ya Israele vandaka kudidila Nzambi kusala nki ? (Kusadisa bo kununga bambeni na bo.)

Niveau secondaire –

- Nki zina ya mbeni ya simbaka Sanduku ya Nzambi, kansi vutulaka yo na nima ? (Bantu ya Filistia)

Bana sala bageste :

Bana kudidila Nzambi kusadisa bo sambu bambeni kele kuyangisa bo. Moniteur tanga malembe-malembe : Mvulu 1, Mvula 2, etc. ti na Mvula 20. Bana landa kaka kudidila Nzambi.  Bana yimba ti kina : Sanduku ya Nzambi Na zulu ya ditadi.

Bantu ya Nzambi  
Kudidilaka Yandi.

7.2 Samuele bingaka bo kukatula biteki na bo ti vutuka na Nzambi na ntima na bo yonso, ebuna bo salaka mpidina. 1 Samuele 7 :3-4

Tangila bana :

3 Samuele tubaka na bantu ya Israele nde :  
« Kana beno zola kwisa kuvutuka na Mfumu Nzambi na ntima na beno yonso, beno fweti katula banzambi yonso ya nzenza ti biteki... Beno kudipesa mvimba na Mfumu Nzambi, beno samba kaka Yandi, ebuna Yandi ta gulusa beno na maboko ya bantu ya Filistia.

4 Yo yina, bantu ya Israele katulaka biteki..., bo sambaka kaka Yandi Mfumu Nzambi.

? Yula bana :

Niveau prescolaire –

- Bantu ya Nzambi katulaka nki ? (Biteki)
- Bo ndimaka kusamba kaka nani ? (Nzambi)


Niveau primaire –

- Samuel songaka bo kusala nki ? (Kuvutuka na Nzambi na ntima na bo yonso)

Niveau secondaire –

- Nani me songa bo dezia kusamba Nzambi kaka, biteki ve ? (Moize, Bansiku 10 ya Nene ya Nzambi pesaka yandi.)

Bana sala bageste :

Bana sala bageste kusonga nde bo ke katula biteki, ke buya yo. Na nima, bo sala geste kusonga nde bo ke samba Nzambi kaka.  Bana yimba ti kina :

Bantu vutukaka na Mfumu Nzambi, ee  
Bo katulaka kiteki Kusambila  
Nzambi kaka.

7.3 Bantu kutanaka, ebuna Samuele sambilaka bo Nzambi. 1 Samuele 7 :5-6   
Tangila bana :

5 Ntangu yai, Samuele bingaka bantu ya Israele yonso nde : « Beno kwisa kisika mosi...mono ta samba Mfumu Nzambi sambu na beno kuna. »

6 Bo yonso kwisaka kukutana.... bo buyaka kudia kilumbu yina ya mvimba, bo tubaka nde :  
« Beto me sala masumu na meso ya Mfumu Nzambi. »

? Yula bana :

Niveau prescolaire –

- Bantu ya Israele ndimaka nde bo me sala masumu na meso ya nani ?  
(Mfumu Nzambi)


Niveau primaire –

- Ntangu bo kutanaka, bo salaka nki ?  
(Kubuya kudia, kundima masumu na bo.)

Niveau secondaire –

- Sambu na bo monaka mfunu nde bo kutana ? Nge banza nki ? (Sambu bo yonso kuparticiper ti ndima bisambu yina, bo yonso ndima masumu na bo.)

Bana sala bageste :

Bana yantika na bisika mingi, ebuna bo kutana na sika mosi. Bo yonso sala geste bonso bo ke buya kudia, na nima bo yantika kundima masumu na bo na Nzambi. 

Bana yimba ti kina :

Bantu kutanaka  
Bo sambaka Nzambi.  
Bo buyaka kudia.  
Bo ndimaka masumu.

7.4 Bantu ya Filistia kwisaka kunwanina bo, kansi bo landaka kaka kusamba Nzambi. 1 Samuele 7 :7-10a

Tangila bana :

7 Ntangu bantu ya Filistia waka nde bantu ya Israele me kutana..., bamfumu na bo tanu yilamaka ti bantu na bo sambu na kwenda kunwanisa bo. Bantu ya Israele waka mambu yina, ebuna boma simbaka bo.

8 Bo songaka Samuele nde, « Samba kaka Mfumu Nzambi...kulemba ve, sambu Yandi gulusa beto... »

9 Samuele ...sambaka Mfumu Nzambi sambu Yandi sadisa Israele, Mfumu Nzambi mpi ndimaka bisambu na bo.

10a Ntangu Samuele vandaka kupesa makabu na Mfumu Nzambi, bantu ya Filistia kwisaka kunwanisa bantu ya Israele.

? Yula bana :

Niveau prescolaire –

- Bantu ya Filistia kwisaka kuyamba bo, to kunwanisa bo ?  
(Kunwanisa bo)

Niveau primaire –

- Bo kwisaka ntangu Samuel vandaka kusala nki ? (Kupesa makabu na Nzambi)

Niveau secondaire –

- Sambu na nki Samuel vandaka kusambila Nzambi kusadisa bo ? Sambu bo waka nde bamfumu 5 ya Filistia ti bantu na bo vandaka kuyilama kukwisa kunwanisa bo.)

Bana sala bageste :

Mwana mosi sala bonso yandi kele Samuele ke pesa makabu ya Nzambi. Mwana ya nkaka kwisa nswalu kusonga yandi nde bamfumu ya Filistia ke yilama kukwisa kunwanisa bo. Bana ya nkaka kuwa boma, bo songa Samuele kusamba ngolo.

- Bana yimba ti kina :

Bamfumu ya Filistia Kwisaka kunwanisa bo. Bo landaka kusamba Nzambi Kusamba Yandi ngolo.

7.5 Nzambi tindilaka basoda ya Filistia makelele bonso nzasi. Ebuna bo kumaka kisakasaka, bo tinaka. Israele bedisaka bo.

1 Samuele 7 :10b-14

Tangila bana :

10b Kansi na ntangu yo yina kaka, Mfumu Nzambi tindilaka bo makelele ya ngolo

bonso ya nzasi. Bo yonso kumaka kisakasaka, bo tina-tinaka.

11 Bantu ya Israele... kulaka bo .... Bo fwaka-fwaka bantu ya Filistia na nzila.

12 Samuele bakaka ditadi, yandi tedimisaka yo.... Yandi pesaka yo zina Ebeni-Ezere, sambu yandi tubaka nde : « Mfumu Nzambi me sadisa beto tii bubu. »

13 Mpidina...bantu ya Filistia...Mfumu Nzambi bikaka diaka ve bo kota na ntoto ya Israele na luzingu ya Samuele.

14 Babwala yonso ya bantu ya Filistia botulaka...yo kumaka diaka ya bantu ya Israele. Mpidina, bantu ya Israele bakaka diaka ntoto na bo yonso. Ngemba vandaka na kati ya bantu ya Israele ti bantu ya Kanana.

? Yula bana :

Niveau prescolaire –

- Nzambi nungisaka bo, to Yandi nungisaka bo ve ? (Yandi nungisaka bo.)

Niveau primaire –

- Nki mutindu Nzambi kumisaka mbeni na bo kisakasaka ? (Yandi tindaka tonnerre—makelele ya ngolo bonso nzasi.)
- Samuel tedimisaka nki sambu bo bambuka mpila Nzambi me sadisa bo ? (Yandi tedimisaka ditadi. Bo bingaka yo Ebeni-Ezere.)

Niveau secondaire –

- Nki vutukaka na bo na nima ya mvita yina ? (Babwala na bo ya bantu ya Filistia me

botula.)  Bana sala bageste :

Kabisa bana na bandambu tatu : basoda ya Filistia, bantu ya Israele, ti bana ya ta sala makelele bonso ya nzasi.

Basoda ya Filistia kwisa kunwanisa bantu ya Israele. Bana ya nkaka yantika kutula makelele mingi bonso makelele ya nzasi. Yo yina, basoda ya Filistia kubwa kisakasaka. Bo yantika kutina na boma. Bantu ya Israele landa bo ti kula bo na nganda. Bana yonso vutuka.



Bana yimba ti kina : Bo didilaka Nzambi ti Yandi sadisaka bo. Yandi tindaka makelele Rrrr-Rrrr-Rrrr! Mbeni kubwaka kisakasaka Ye Israele bedisaka bo.

7.6 Samuele landaka kuzuze Israele luzingu na yandi yonso. 1 Samuele 7 :15-17  Tangila bana :

15 Samuele vandaka zuzi ya bantu ya Israele na luzingu na yandi yonso.

16 Konso mvula, yandi vandaka kwenda kutala babwala (tatu) sambu na kusambisa makambu.

17 Ebuna na nima, yandi vandaka kwisa kuvutuka na bwala na yandi Rama sambu na kusambisa makambu. Ko kuna na Rama, yandi tungaka mesa-kimenga sambu na kusamba Mfumu Nzambi.

? Yula bana :

Niveau prescolaire –

- Samuele vandaka soda, to yandi vandaka zuzi ? (Zuzi. Muntu ya vandaka kuzenga makambu.)

Niveau primaire –

- Konso mvula, Samuele kwendaka na babwala ikwa sambu na kuzenga makambu ? (Babwala iya—3, plus bwala na yandi)

Niveau secondaire –

- Samuele vandaka zuzi ya Israele tii na nki ntangu ?  
(Tii na lufwa na yandi.)

Bana sala bageste :

Mwana mosi vanda Samuele. Bana ya nkaka kwenda na bandambu 4. Bo vanda bantu ya babwala sika Samuele kwendaka kuzengisa makambu. Samuele tambula na konso bwala na tour. Bantu ya bwala yina yamba yandi ti songa yandi bampasi na bo.



Bana yimba ti kina :  
Samuele zuzi ya Israele  
Bilumbu na yandi yonso.  
Yandi tambulaka mingi  
Kuzenga makambu.

>< Kumanisa :

Bantu ya Israele vandaka bantu ya Nzambi solaka kunata Mwana na Yandi na ntoto yai. Kansi bo me vila nzila ya Nzambi. Yo me samba biteki.

Samuele songaka bo nde kana bo zolaka kuvutuka kieleka na ntima na bo yonso, bo fweti katula biteki yina. Bo fweti vutuka kusamba Nzambi kaka. Bo salaka mpidina, ye Nzambi waka bisambu na bo. Yandi sadisaka bo kubedisa bambeni na bo.

Na beto mpi, Nzambi ta sadisa ve bantu ya zola kusakana na biteki to na banzambi ya nkaka ya fioti-fioti. Kansi kana beto bika biteki na beto, beto vutuka na Nzambi na ntima na beto yonso, Yandi ta sadisa beto.

Verse ya bubu yai :

... « Kana beno zola/ kwisa kuvutuka na Mfumu Nzambi/ na ntima na beno yonso,/ beno fweti katula banzambi yonso/ ya nzenza ti biteki/...Beno kudipesa mvimba na Mfumu Nzambi,/ beno samba kaka Yandi,/ ebuna  
Yandi ta gulusa beno... » 1 Samuel 7 :3

Bankunga ya kwenda nzila mosi ti lesu :

Bana yimba mosi ya bankunga ya kwenda nzila mosi ti lesu yai.

Devoir sambu na bakristo :

Mbala ya nkaka nge kele mukristo, nge banza nde nge kele kulanda banzambi ya nkaka ve. Kansi mbala mingi, bana ya kalasi kwenda kusosa amulet to nkisi sambu na kusadisa bo na ntangu ya examen. Mambu yai kele ya Nzambi, to ya banzambi ya nkaka? (Banzambi ya nkaka.)

Mbala mingi, kana muntu ke bela ti bo beluka nswalu ve, bo kwenda kusosa nganga-ngombo. Keti yai kele ya Nzambi, to ya banzambi ya nkaka ? (Banzambi ya nkaka.)

Mbala ya nkaka beto kwenda ve na banzambi ya nkaka, kansi beto mpi sosa Nzambi ve. Beto sala bonso na ngolo ya beto mosi, beto ta nunga. Bana bakristo, devoir mono ke pesa beno kele nde na mposo ke kwisa, beno sosa Nzambi na mambu yonso, ti sosa Yandi kaka.

Kubinga bavidi na Yesu :

Kana nge me balula ntima na Yesu ntete ve, nge ke na mfunu ya Yandi kugulusa nge. Sosa kuguluka ve na muntu ya nkaka, to na nzila ya nkaka, to na ngolo ya nge mosi. Kaka Yesu, Mwana ya Nzambi, lenda gulusa nge. Bible ke tuba nde, “Bantu lenda guluka kaka na Yandi [Yesu]” (Bisalu 4:12). Tula yandi ntima, ebuna nge ta guluka.

Konso mposo, beto kele awa na nima ya ecodim sambu na kusadisa konso muntu ya zola balula ntima, bika nzila ya masumu, tula Yesu ntima. Kwisa solula ti beto. Nge lenda kuma longuki ya Yesu bubuyai.

==NSUKA YA LESO 7

Kana ntangu lunga,  Longa mikanda ya Bible :

(Bangindu kele na nsuka ya mukanda yai.)



## Leso 8 Israele sosaka ntotila, Samuele songaka bo bampasi ya ntotila ta nata.

1 Samuele 8 :1-22 I.

### Preparatio ya Moniteur—

- Kikuma ya lesa :

Beto landa nzila ya Nzambi, sambu nzila na beto mosi ke natila beto mpasi.

- Verse ya bubu yai :

Mfumu Nzambi,/ mono zaba nde/ ke na muntu ve/ lenda sola nzila/ na yandi mosi.../ Yerima 10 :23a

- Bankunga ya kwenda nzila mosi ti lesa :

Mfumu Zaba Nzila Na Mono

Mfumu zaba nzila na mono

Mono fweti Ianda kaka

Mfumu zaba nz'ila na mono Mono

fweti Ianda kaka

Ngolo bubu Yandi ta pesa

Ye yonso ya mfunu mbasi

Mfumu zaba nzila na mono Mono

fweti Ianda kaka !

### II. Revisio—

- Kulanda devoir ya lesa me luta : Na mposo me luta, beto pesaka beno bakristo devoir ya kusosa Nzambi kaka, banzambi ya nkaka ve. Na mposo yai, nani monaka muntu kusala mambu ya vandaka kutadila banzambi ya nkaka ? [Moniteur, yula bo kusonga nki bo monaka na nkufi.] Nani sosaka Nzambi na ntima na yandi yonso ? [Bana songa maboko.] Nki mutindu beno sosaka Yandi ? Nani ta songa beto ? [Mwana mosi tuba na nkufi.]

- Kuyindula diaka baleso me luta:

Na lesa me luta, beto monaka mpila Samuele twadisaka bantu ya Israele kubika

biteki na bo, kuvutuka na Nzambi na ntima na bo yonso. Beto monaka mpila Samuele vandaka zuzi ya vandaka kuzenga makambu bwala na bwala luzingu na yandi yonso. Ntangu yai, Samuele me nuna. Yandi me kuma penepene na nsuka ya moyo na yandi.

### III. Kulonga Lesa Yai—

- Kuyantika :

Keti nge me mona mwana ya zola kima mosi mingi ? Yandi ke bondila mama to papa kupesa yandi yo, kansi kima yina kele kima ya ta pesa yandi mpasi ?

Fami ya mwana mosi zina ya Pepe, bo vandaka na probleme ya bampuku na nzo. Bampuku vandaka kudia madia na bo mingi. Yo yina, mama sumbaka nkisi sambu na kufwa bampuku. Karto na yo vandaka kitoko—kulere ya mbwaki. Pepe zolaka yo sambu na kitoko ya karto. Mama bumbaka yo ti songaka Pepe nde yandi kusimba yo ve. Kansi yandi vandaka kuyuma ntima mingi sambu na yo.

Lumbu mosi mama vandaka kulala mpongi fioti. Ebuna Pepe simbaka ndikila yina. Pwaso. Yandi kudiaka ndambu na yo na ntwala mama telamaka. Yo pesaka yandi maladi mingi. Moyoyo na yandi zolaka kumana. Kima ya yandi monaka kitoko, yo sadisaka yandi ve. Na lesa yai, beto ta mona nde bantu ya Israele mpi, bo zolaka kima mosi, ata Nzambi songaka bo nde yo ta sadisa bo ve.

- Developpement (Malongi ya nene ya lesa yai na banti 5) :

8.1 Bantu bondilaka Samuele kupesa bo ntotila bonso bantu ya bansi ya nkaka. 1 Samuele 8 :1-5

- Tangila bana :

1 Ntangu Samuele me nuna....

4 ... bambuta ya Israele kutanaka kisika mosi, ebuna bo kwendaka na Samuele...

5 ti kusonga yandi nde : « Tala, nge me kuma mbuta, bana na nge mpi ke landa mbandu na nge ve. Yo yina, ntangu yai, tudila beto ntotila yina ta yalaka beto mutindu kele bantu ya bansi ya nkaka. »

? Yula bana :

Niveau prescolaire –

- Bantu zolaka Samuele kupesa bo nki— mbongo to ntotila ? (Ntotila)

Niveau primaire –

- Sambu na nki bo sosaka ntotila ? (Sambu na kuvanda bonso bantu ya bansi ya nkaka)

Niveau secondaire –

- Samuele me vanda zuzi ya mbote. Nki mutindu bo zabaka nde ntama ve, muntu ya mbote kuzenga makambu na bo ta vanda diaka ve ? (Samuele me nuna, ti bana na yandi me landa nzila na yandi ve.)  Bana sala bageste :

Tula mwana mosi bonso Samuele. Bana ya nkaka kwisa na yandi ti boka nde, « Pesa beto ntotila ! Pesa beto ntotila ! »



Bana yimba ti kina :

Bantu kwisaka na Samuele

Yandi kupesa bo ntotila.

8.2 Samuele vandaka na kiese ve na yo, kansi yandi tulaka yo na bisambu. 1 Samuele 8 :6

Tangila bana :

6 Samuele monaka kiese ve sambu bantu ya Israele lombaka mfumu. Yo yina, yandi sambaka Mfumu Nzambi,

? Yula bana :

Niveau prescolaire –

- Samuele sambaka nani kuyula mambu yina ? (Nzambi)

Niveau primaire –

- Samuele yandi mosi monaka kulomba ya bantu ya Israele nki mutindu ? (Kiese ve)

Niveau secondaire –

- Sambu na nki Samuele tulaka mambu yina na bisambu ? (Kusosa mabanza ya Nzambi. Yandi mosi monaka yo kiese ve, kansi nki vandaka mabanza ya Nzambi ?)  Bana sala bageste :

Bana yonso sala bageste bonso Samuele. Ntete bo songa luse ya kiese ve. Na nima, bo fukimina, bo sambu Nzambi, « Nki Nge banza, Nzambi ? Mono ta sala nki ? Keti mono ta pesa bo ntotila to ve ? »

- Bana yimba ti kina : Samuele lombaka Nzambi Nki yandi fweti sala. Na mambu ya ntotila Nki yandi fweti sala.

8.3 Nzambi songaka Samuele kusala yina ya bo tubaka, kansi kusonga bo nki mutindu ntotila ta

sala bo. 1 Samuele 8 :7-9  Tangila bana :

7 Ebuna Mfumu Nzambi tubaka nde : « Landa ndinga ya bantu. Nge ve muntu ya bo ke buya, kansi bo ke buya Mono, nde Mono vanda Mfumu na bo ve.... »

9 Mpidina wila bo, kansi pesa bo malongi, songa bo mutindu ntotila yina ta yalaka bo. »

? Yula bana :

Niveau prescolaire –

- Bantu vandaka kubuya Samuele ve, kansi kubuya nani ? (Nzambi)

Niveau primaire –

- Nani vandaka kieleka Mfumu na bo ?

(Nzambi, kansi bo vandaka kubuya Yandi.)


- Samuele fweti songa bo nki ?  
(Mutindu ntotila ta yalaka bo.)

Niveau secondaire –

- Sambu na nki Nzambi ndimaka nde bo sala luzolo na bo mosi ? (Sambu bo vandaka kuzola yo, ata yo ta bebisa bo.)

Bana sala bageste :

Bana yonso songa geste ya songa kubuya. Bo songa luse ya mawa, sambu yo kele mawa nde bantu buyaka Nzambi kusosa

ntotila.  Bana yimba ti kina :  
(Na mawa yonso)

Bika bo kusala  
Luzolo na bo mosi.  
Kansi songa bo mpila  
Ntotila ta yala bo.

8.4 Samuele songaka bo mutindu Nzambi tubaka, kansi bo landaka kaka kulomba ntotila. 1 Samuele 8 :10-20  Tangila bana :

10 Samuele telaka bantu mambu yonso ya Mfumu Nzambi songaka yandi.

11 Yandi tubaka nde : « Tala mutindu ntotila na beno ta yalaka beno : Bana na beno ya babakala, yandi ta kumisa bo basoda....

13 Bana ya beno ya bankento ta sadilaka yandi mananasi, bo ta lambilaka yandi ti kusadilaka yandi mampa.

14 Yandi ta baka-baka bilanga na beno....

16 Yandi ta baka bantu na beno ya kisalu, ti bangombe na beno, ti bampunda na beno ya kuluta kitoko, sambu na kusadilaka yandi.

17 ...Benoni ta kuma bampika na yandi.

18 Na ntangu yango yina, beno ya beno ta dila ngolo sambu na ntotila na beno ya beno mosi

me sola, kansi Mfumu Nzambi ta wila beno ve. »

? Yula bana :

Niveau prescolaire –


- Kuvanda na ntotila—yo ta vanda mambu ya kiesse to ya mawa ?  
(Ya mawa)

Niveau primaire –

- Ntotila ta baka nki bima na bo ? (Bana na bo ya bakala ti ya nkento, bilanga, bantu ya kisalu, bambisi.)
- Na nsuka bo ta kuma nki ?  
(Bampika ya ntotila yina)

Niveau secondaire –

- Sambu na nki Nzambi ta wila bo ve ntangu bo dididila Yandi ntotila yina ? (Sambu bo waka ve conseye na yandi ti landaka nzila na bo mosi.)  Bana sala bageste :

Tula mwana mosi ntotila. Yandi kwenda na bana ya nkaka mosi-mosi. Yandi tuba nde « Pesa mono mwana na nge. » « Pesa mono ngombe na nge. » « Pesa mono kilanga na nge. » « Pesa mono nsusu ya nge. » Etc. Bantu fweti pesa, sambu ntotila me lomba yo. Bo yantika kudila.  Bana yimba ti kina : Ntotila ta baka bima na bo Mingi, mingi, mingi. Ntotila ta pesa mawa Mingi, mingi, mingi.

8.5 Bo zolaka kulanda nzila ya bo mosi, Yo yina, Nzambi songaka Samuele kusala mpila bantu zolaka, kupesa bo ntotila. 1 Samuele 8 :19-22

Tangila bana :

19 Bantu ya Israele ndimaka ve...Bo tubaka nde : « Kele ve, tudila beto kaka ntotila. »

20 Mpidina, beto ta vanda bonso bantu ya nkaka ti ntotila na beto mosi na kuyalaka beto ti kunataka beto na bitumba. »



21 Samuele ...kwendaka kutuba yo na Mfumu Nzambi.

22 Mfumu Nzambi vutulaka nde : « Sala mambu ya bo me lomba, pesa bo ntotila.»...

? Yula bana :

Niveau prescolaire –

- Na nsuka, keti Nzambi ndimaka kupesa bo ntotila, to Yandi buyaka ? (Yandi ndimaka.)

Niveau primaire –


- Sambu na nki bo zolaka ntotila ? (Sambu na kuvanda bonso bantu ya bansi ya nkaka)
- Bantu ya bansi ya nkaka yai—keti bo vandaka bantu ya landaka bansiku ya Nzambi ? (Ikele ve. Bo bantu me vila nzila ya Nzambi. Bo bampani.)

Niveau secondaire –

- Mambu ya ntotila pesaka Samuele kiese ve. Yo pesaka Nzambi Yandi mosi kiese ve. Ebuna, sambu na nki Nzambi ndimaka yo ? (Sambu bo vandaka kulanda kaka kusosa mpila na bo mosi. Yo yina Nzambi pesaka bo nzila kusala luzolo na bo mosi.)

Bana sala bageste :

Bana yonso sala bageste bonso Nzambi. Bo nikisa ntu ti na mawa, bo tuba nde, « Beno zola ve kulanda Mono. Yo yina, sala na mpila beno mosi me zola. »

 Bana yimba ti kina :

Bo zolaka landa Nzambi ve.

Bo landaka nzila ya bo mosi.

>< Kumanisa :

Bana ya Israele me lomba ntotila sambu bo zolaka kuvanda bonso bantu ya bampani. Nzambi me meka kusonga bo nde ntotila yina ta pesa bo mpasi, kansi bo zolaka kuwa ve. Ntangu yai, Nzambi me kangula nzila, bo sala kaka mabanza na bo. Bo ta

zwa ntotila na bo, kansi yandi ta pesa bo kiese ve na mpila ya bo ke yindula.

Verse ya bubu yai :

Mfumu Nzambi,/ mono zaba nde/ ke na muntu ve/ lenda sola nzila/ na yandi mosi.../ Yeremia 10 :23a

Bana yonso tuba verse fraze na fraze na nima ya moniteur mbala 3. Na nima, kabisa bana na bandambu 4, ti pesa konso ndambu fraze mosi. Ntangu moniteur songa bo na diboko, bo telama ti tuba fraze na bo. Tuba yo mbala 3 diaka mpila yina.

Bankunga ya kwenda nzila mosi ti leso :

Yimba mosi ya bankunga ya kwenda nzila mosi ti leso yai.

Devoir sambu na bakristo :

Beno bana bakristo, yindula mbote. Ata nge ke tula ngolo kulanda Yesu, keti na mambu ya nkaka, nge me buya nzila ya Nzambi, me sosa nzila ya nge mosi? Kana mpidina, balula bubu ti ndima nzila ya Nzambi na mambu yonso.

Kubinga bavidu na Yesu :

Mbala ya nkaka, nge zaba ve nde nge kele mukristo. Nge me wa malongi ya Yesu, kansi nge me bikala na masumu na nge, sambu nge me pindula mabanza ntete ve. Nge me ndima ve nde Yandi kele Mwana Nzambi ya fwaka na kulunsi sambu na masumu na nge, ti telamaka na lufwa.

Nge ke landa nzila na nge mosi. Kansi nzila yina, nsuka na yo kele lufwa mvu ya mvu. Kana Mpeve ya Nzambi ke bula na ntima na nge, nde nge ke na mfunu ya Yesu, binga zina na Yandi. Tula Yandi ntima bubuyai. Beto kele awa na nima ya ecodim kusadisa nge.

==NSUKA YA LESO 8

Kana ntangu lunga,   
Longa mikanda ya Bible.

## Leso 9 Israele baka ntotila ya ntete

1 Samuele 9 :1-27, 10 :1-27

### I. Preparatio ya Moniteur—

- Kikuma ya lesa :

Beto kudipusa mabanza na beto mosi ve, kansi beto tula ntima na Nzambi kutwadisa luzingu na beto.

- Verse ya bubu yai :

5 Tula ntima na nge yonso na Mfumu Nzambi,/ kutula ntima ve na mambu/ ya nge mosi ke yindulaka nde nge zaba./

6 Yindula Mfumu Nzambi na mambu yonso/ ya nge ke salaka. / Yandi ta songa nge nzila ya mbote. / Bingana 2 :5-6  Bankunga ya kwenda nzila mosi ti lesa :  
Mfumu Zaba Nzila na Mono

Mfumu zaba nzila na mono  
Mono fweti Ianda kaka  
Mfumu zaba nz'ila na mono Mono  
fweti Ianda kaka

Ngolo bubu Yandi ta pesa  
Ye yonso ya mfunu mbasi  
Mfumu zaba nzila na mono Mono  
fweti Ianda kaka !

Mono Me Sila Kulanda Yesu

Mono me sila kulanda Yesu (3X)  
Kuvutuka, yo lunga ve.

Yesu na ntwala, mono na nima (3x)  
Kuvutuka, yo lunga ve.  
Sadisa mono kulanda Yesu (3x)  
Kuvutuka, yo lunga ve.

### II. Revisio—

- Kulanda devoir ya lesa me luta : Na mposo me luta, beto lombaka beno bakristo kuyindula mbote kana na mambu mosi, nge vandaka kubuya nzila ya Yesu. Nani yulaka Nzambi kana mambu ya kulemfuka ve vandaka na kati ya nge ?

Nki mvutu Nzambi pesaka nge ?

- Kuyindula diaka baleso me luta:

Beto me mona nde Nzambi zolaka ve Israele kuvanda na ntotila. Yandi mosi zolaka kuvanda Ntotila kuyala bo. Kansi bo buyaka. Nani bambuka raiso bo zolaka kaka kuvanda na ntotila? (Ee, sambu bo kuvanda bonso bantu ya bansi ya nkaka.)

Nzambi songaka Samuele nde yandi fweti songa bo nki mutindu luzingu na bo na kuma kana Yandi pesa bo ntotila, kansi bo zolaka kaka nde bo vanda na ntotila. Bo zolaka kuvanda bonso bansi ya nkaka. Yo yina, Nzambi ndimaka.

### III. Kulonga Leso Yai—

- Kuyantika :

Ntangu yai, ntangu me lunga nde Nzambi

kupesa bo ntotila ya bo lombaka.

Developpement (Malongi ya nene ya lesa yai na banti 5) :

9.1 Nzambi solaka Saule, ebuna Yandi twadisaka yandi na profeti Samuele. I Samuele 9 :1-20a

- Tangila bana :

1,3 Kuvandaka na muntu mosi ...zina na yandi Kishi....Kilumbu mosi, bampunda ya Kishi vilaka, ebuna yandi tubaka na mwana na yandi Saule nde : «...kwenda kusosa bampunda. »

...6 Muntu ya kimalu tubaka na Saule nde :  
« Na bwala yai, ke na muntu mosi ya Nzambi.... Beto kwenda na yandi, mbala ya nkaka yandi ta songa beto wapi beto lenda mona bampunda....

11-15 Bo kwendaka... ..bo ke mona Samuele ke kwisa....Ntangu Saule vandaka me kuma ntete ve... Mfumu Nzambi tubaka na Samuele nde :

16 « Mbasi na ntangu yo yai, Mono ta tinda nge muntu ... Nge tula yandi ntotila ya bantu ya Mono Israele. ....»

17 Ntangu Samuele monaka Saule, Mfumu Nzambi tubilaka Samuele nde : « Muntu ya Mono tubilaka nge, yandi yai. Yandi muntu ta yalaka bantu na Mono. »

18-20a Saule kwendaka na Samuele.... Samuele tubaka nde : « ...Sambu na bampunda yina me vila bilumbu tatu me luta, kumona ka nge mpasi ve. Yo me monana. »

? Yula bana :

Niveau prescolaire –


- Nki me vilaka ?  
(Bampunda ya Papa Kishi)

Niveau primaire –

- Papa Kishi tindaka nani kusosa bampunda ya me vilaka ?  
(Mwana na yandi Saule)
- Nani songaka Saule nde bo me mona bampunda diaka ? (Muntu ya Nzambi Samuele) Niveau secondaire –
- Nzambi songaka Samuele nki mambu ya nkaka sambu na Saule ? (Nzambi me sola yandi kuvanda ntotila ya Israele.)

Bana sala bageste :

Bana sala bageste bonso bo kele Saule, ke sosa bampunda ya tata ya me vila.

 Bana yimba ti kina :

Nzambi songaka Samuele nde  
Yandi me sola Saule Kukuma  
ntotila.

9.2 Samuele songaka Saule lukanu ya Nzambi sambu na yandi. 1 Samuele 9 :20b-26

20b Kansi mbote nge zaba ntangu yai nde bantu yonso ya Israele ke vingila kaka nge.... »

21 Saule vutulaka nde : « Nki mutindu ? Mono kele muntu ya ...dikanda ya kuluta fioti na makanda yonso ya Israele. Fami na mono mpi kele mfunu mingi ve...Nki mutindu nge lenda songa mono mambu ya mutindu yai ? »

....26 Kilumbu landaka...Samuele bingaka Saule ... nde : « Beto kwenda. Mono ke fidisa nge... » Ebuna Saule kwendaka nzila mosi ti Samuele.

? Yula bana :

Niveau prescolaire –

- Saule vandaka muntu ya ville ya nene, to bwala ya fioti ?  
(Bwala ya fioti)


Niveau primaire –

- Sambu na nki Saule yitukaka nde Nzambi me sola yandi kuvanda ntotila ? (Sambu yandi vandaka muntu ya bwala ya fioti ti fami ya mfunu ve.)

Niveau secondaire –

- Sambu na nki nge banza Nzambi solaka muntu ya bwala ya fioti ? [Moniteur, kuwa mabanza ya bana.] (Beto bambuka mpi nde Yesu butukaka na bwala ya fioti, Betelemi.)  Bana sala bageste :

Bana sala bageste ya kuyituka bonso Saule ntangu Samuele songaka yandi nde yandi ta kuma ntotila.

 Bana yimba ti kina :  
Saule, muntu ya bwala ya fioti,  
Nzambi me sola nge. Saule,  
muntu ya bwala ya fioti, Nge  
ta kuma ntotila.

9.3 Samuele tulaka ntu ya Saule mafuta sambu na kutula yandi ntotila. 1 Samuele 9 :27-10 :1

Tangila bana :

27 Ntangu bo kumaka na nsongi ya bwala, Samuele tubaka na Saule nde : ...« Beto telama awa fioti. Mono ke zola kusonga nge mambu ya Nzambi me tuba. »

10 :1 Ebuna Samuele bakaka mulangi ya mafuta ya olive ya yandi nataka, yandi tulaka yo Saule na zulu ya ntu. Yandi yambaka yandi, yandi tubilaka yandi nde : « Mfumu Nzambi, Yandi mosi me tula nge ntotila ya bantu na Yandi. »

? Yula bana :


Niveau prescolaire –

- Nzambi tulaka Saule kuvanda nki ? (Ntotila)

Niveau primaire –

- Samuel tulaka nki na zulu ya ntu ya Saule kusonga nde yandi me kuma ntotila ? (Mafuta ya olive) Niveau secondaire –
- Mambu yai salamaka na meso ya nani ? (Kaka Samuele, Saule, ti Nzambi)

Bana sala bageste :

Bana sala geste zole-zole Mwana mosi sala bonso yandi kele Samuele, ke losa mafuta ya olive na zulu ya ntu ya mwana ya nkaka, sambu mwana yina kuma ntotila.  Bana yimba ti kina :

Mafuta yai ke songa nde

Nzambi me sola nge. Mafuta yai ke songa nde Nge me kuma ntotila.

9.4 Nzambi salaka bidimbu sambu Saule kwikila nde kieleka Yandi me sola yandi kuvanda ntotila. 1 Samuele 10 :2-16

Tangila bana :

2 Awa ya nge ke kwenda, nge ta kuta bantu zole ...bo ta tubila nge nde : « Bampunda ya nge vandaka kusosa, yo me monana...

5 Na nima, nge ta kwenda na bwala Gibea... Na munoko ya bwala, nge ta mona ndonga ya baprofete ...ke bula misiki ya mutindu na mutindu. Bo ke kina ti kutuba mambu ya Nzambi na ndinga ya ngolo.

6 Mpeve ya Nzambi ta simba nge. Nge ta kuma bonso bo...

7 Kana mambu yai yonso me bwa imene, zaba nde Nzambi kele ti nge. Sala konso kima mutindu nge ta mona yo.

9 Ntangu Saule bikaka Samuele na kuvutuka, Nzambi kumisaka Saule mutindu ya nkaka. Mambu yonso ya Samuele songaka yandi, yo mpi kubwaka kilumbu yo yina.

10 Mpidina...Saule...ndonga ya baprofete kwisaka kukutana na bo. Mpeve ya Nzambi simbaka Saule. Yandi mpi yantikaka kukina ti kutuba mambu ya Nzambi na ndinga ya ngolo bonso bo.....

? Yula bana :

Niveau prescolaire –

- Mambu ya Samuele tubaka ta salama— yo salamaka, to yo salamaka ve ? (Yo salamaka. )

Niveau primaire –

- Ntangu mambu salamaka kaka mpila Samuele songaka Saule, yo songaka yandi nki ? (Nde kieleka Nzambi muntu me tuba)
- Saule kumaka bonso mosi ya ...nani ? (Baprofete)

Niveau secondaire –

- Nki songaka nde Saule me kuma bonso mosi ya baprofete ? (Yandi me yantika kukina ti kutuba ndinga ya Nzambi ngolo. Yandi kitukaka bonso muntu ya nkaka.)  Bana sala bageste :

Bana sala bageste bonso Saule ntangu Mpeve ya Nzambi simbaka yandi. Bo kina ti tuba ndinga ya Nzambi ngolo.

- Bana yimba ti kina :  
Mpeve ya Nzambi simbaka Saule.  
Yandi tubaka ndinga ya Nzambi  
Ye Yandi kinaka ngolo.

9.5 Samuele songaka bantu yonso nde Nzambi me tula Saule kuvanda ntotila.

1 Samuele 10 :17-27

Tangila bana :

17 Samuele bingaka bantu yonso ya Israele na kwisa na Nzo-Nzambi na bwala Mispa.

18-19 Yandi tubaka na bo nde : « Mfumu Nzambi ...ke tuba nde : « Mono....ke Nzambi na beno. ...kansi ntangu yai, beno me buya Mono, beno me zola nde Mono pesa beno ntotila... Beno kwisa na ntwala na Mono beno yonso, konso bantu na dikanda na bo ti fami na bo. »

20-21 Samuele songaka konso dikanda na kuluta na ntwala. Bo bulaka zeke. ....Yo bwilaka Saule.... Bo sosaka yandi, kansi bo kukaka ve kumona yandi.

22 Bo yulaka Mfumu Nzambi diaka nde : « Keti muntu ya nkaka kele fweti kwisa awa ? » Mfumu Nzambi nde : « Saule yandi yina me bumbana na kati ya bima. »

23 Bantu kwendaka ntinu...Bo tedimisaka yandi. Yandi lutaka bantu yonso na nda. 24 Samuele tubaka na bantu nde : « Yandi yai muntu ya Mfumu Nzambi me sola ! ... » Ebuna bantu yonso tubaka na ndinga ya ngolo nde : « Luzingu ya nda na ntotila ! »...

? Yula bana :

Niveau prescolaire –

- Nzambi songaka bantu nde Yandi me sola nani kuvanda ntotila ?

(Saule)

Niveau primaire –


- Wapi Samuele songaka bantu nde Nzambi me sola Saule ?  
(Na Nzo-Nzambi. Yo vandaka na bwala Mispa ntangu yina.)

Niveau secondaire –

- Samuele zabaka dezia nde Nzambi me sola Saule kuvanda ntotila. Sambu na nki nge banza yandi bulaka zeke ?

(Kusonga yo na meso ya bantu yonso.)

Bana sala bageste :

Bana sala bonso bo ke bula zeke mbala tatu. Mbala ya ntete, bo tuba nde, « Dikanda ya Benyamini. » Mbala ya zole, bo tuba nde, « Fami ya Matri. » Mbala ya tatu, bo tuba nde, « Saule ! »  Bana yimba ti kina : Nzambi songaka na meso ya bantu Nde Saule me kuma ntotila.

>< Kumanisa :

Bana, Nzambi me sola Saule kuvanda ntotila, yo yina Yandi twadisaka na mpila nde yo salama. Saule vandaka ve na mfunu kupusa, kusonga nde, “Mono fweti sala ngolo sambu mono kuma ntotila.” Ikele ve. Lukanu ya Nzambi sambu na moyo na yandi, yo salamaka kukonda yandi kupusa.

Nzambi kele na lukanu ya mbote sambu na beto yonso ya tula Yandi ntima. Beto ke na mfunu ve na kudipusa. Beto kaka tula ngolo kulanda Nzambi, ebuna yo ta salama.

Verse ya bubu yai :

Bana tuba verse mbala tatu ndambu-ndambu, fraze na fraze, na nima ya nge moniteur:

5 Tula ntima na nge yonso na Mfumu Nzambi,/ kutula ntima ve na mambu/ ya nge mosi ke yindulaka nde nge zaba./

6 Yindula Mfumu Nzambi na mambu yonso/ ya nge ke salaka. / Yandi ta songa nge nzila ya mbote. / Bingana 2 :5-6

Na nima, bana yika geste. Konso mbala ya bo tuba zina ya Nzambi to 'Yandi' ya ke songa Nzambi, bo nangula diboko, kusonga na zulu. Bo tuba yo mbala tatu diaka.

Bankunga ya kwenda nzila mosi ti leso :

Bana yima mosi ya bankunga ya kwenda nzila mosi ti leso yai.

Devoir sambu na bakristo :

Beno bana ya zaba Yesu dezia, devoir mono ke pesa beno kele na mposo yai : beno yantika kulomba Nzambi nde lukanu na Yandi kusalama na luzingu na nge, ata yo vanda nki.

Kubinga bavidi na Yesu :

Kana nge zaba Yesu ntete ve na luzingu na nge, zaba nde Nzambi kele ya santu, ya longo yonso. Yandi lenda ndima ve masumu. Ebuna nge kele na makambu ti Yandi sambu na masumu na nge. Nge lenda ve kutelama na ntwala ya Nzambi ti masumu.

Kaka mpila mosi kele kukatula masumu. Yo lombaka nde Nzambi kutinda Mwana na Yandi ya kitoko, Yesu Kristo, Yandi kufwa na sika ya beto bantu ya masumu. Yandi baka ndola ya Nzambi zolaka kupesa beto. Kansi lufwa lendaka kumanisa Yesu ve. Yandi telamaka na lufwa, ti Yandi kele na moyo bubu ti mvu ya mvu.

Kana nge ta balula ntima ti ndima kulanda Yesu Kristo, Nzambi ta lolula nge. Yandi ta katula masumu yonso ya nge. Yandi ta pesa nge ntima ya mpa, ntima ya zola kupesa Yandi kiese.

Kana nge sosa lusadisu kubalula ntima ti kuyamba Yesu, kwisa tala beto na nima ya ecodim. Beto ta sadisa nge.

==NSUKA YA LESO 9

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 10 Saule bedisala bantu ya Ammoni, ebuna bantu yonso ndimaka yandi bonso ntotila.

1 Samuele 11 :1-15

### I. Preparatio ya Moniteur—

Kikuma ya lesu :

Beto sala ntete mambu ya mbote ya Nzambi ke songa beto sesepiyai, sambu kana beto zola mambu kusalama mbote, beto fweti yantika mbote.

Verse ya bubu yai :

Bana ta landa diaka kulonguka verse ya mposo me luta :

5 Tula ntima na nge yonso na Mfumu Nzambi,/ kutula ntima ve na mambu/ ya nge mosi ke yindulaka nde nge zaba./

6 Yindula Mfumu Nzambi na mambu yonso/ ya nge ke salaka. / Yandi ta songa nge nzila ya mbote. / Bingana 3 :5-6

Bankunga ya kwenda nzila mosi ti lesu :

Bana ta yimba bankunga kiteso mosi bonso na mposo me luta :

Mfumu Zaba Nzila na Mono

Mfumu zaba nzila na mono

Mono fweti Ianda kaka

Mfumu zaba nz'ila na mono

Mono fweti Ianda kaka

Ngolo bubu Yandi ta pesa

Ye yonso ya mfunu mbasi

Mfumu zaba nzila na mono

Mono fweti Ianda kaka !

Mono Me Sila Kulanda Yesu

Mono me sila kulanda Yesu (3X)

Kuvutuka, yo lunga ve.

Yesu na ntwala, mono na nima (3x)

Kuvutuka, yo lunga ve.

Sadisa mono kulanda Yesu (3x)

Kuvutuka, yo lunga ve.

### II. Revisio—

Kulanda devoir ya lesu me luta :

Nki devoir beto pesaka beno bakristo na mposo me luta ? Ee, kusamba nde lukanu ya Nzambi sambu na luzingu na nge, yo salama, ata yo vanda nki mutindu.

Nani sambaka mpidina na mposo me luta ?

Merci na beno ya ke meka kusala badevoir.

Yai ta sadisa beno mingi kuyela na kikristo.

Kuyindula diaka baleso me luta:

Na bamposo zole me luta, beto me mona nde Nzambi solaka nani kukuma ntotila ya ntete ya Israele ? (Saule)

Nani profete ya Nzambi ya tulaka Saule mafuta na zulu ya ntu sambu na kusonga nde Nzambi me tula yandi ntotila ? (Samuele)

### III. Kulonga Leso Yai—

Kuyantika :

Nzambi me pesa Saule kisalu ya kusala. Kuvanda ntotila. Kuyala bantu na Yandi, Israele. Kuvanda ntotila kele kisalu mosi ya nene. Mambu ya ntete na konso kisalu kele KUYANTIKA. Nki mutindu Saule ta yantika kisalu Nzambi me pesa yandi ? Keti yandi ta yantika mbote ?

Developpement (Malongi ya nene ya lesu yai na banti 6 ) :

10.1 Mambu ya mawa bwaka nswalu. Bantu ya Ammoni zolaka kukanga bwala Yabeshi ya Israele. Bo zolaka nde bantu ya Yabeshi zinga kaka kana bo katula bo disu ! 1 Samuele 11 :1-4

Tangila bana :

1 Nahashi ntotila ya bantu ya Amoni

kwisaka kunwanisa bwala Yabeshi....

Basoda na yandi ziungaka bwala, ebuna bantu ya Yabeshi tubilaka Nahashi nde : « Beto wakana, ebuna beto ta ndima nge na kuvanda ntotila na beto. »

2 Nahashi tubaka nde : « Mono ta wakana na beno KAKA kana beno ndima nde mono tobula konso muntu disu na yandi ya kibakala, mpidina mono ta pesa bantu yonso ya Israele nsoni. »

3 Bambuta ya Yabeshi nde : « Pesa beto bilumbu nsambwadi.... Kana ata muntu mosi kwisa ve na kusadisa beto, beto ta kwisa kudipesa na nge. »

4 Nsangu kumaka na... bwala ya Saule. Bantu yonso waka yo. Bo yantikaka kudila.

? Yula bana :

Niveau prescolaire –

- Nki mambu ya mbi mbeni zolaka kusala bantu ya bwala Yabeshi ?  
(Kubotula bo disu)

Niveau primaire –

- Nahashi vandaka nani ?  
(Mfumu ya bantu ya Ammoni, mbeni ya Israele)
- Yandi kwisaka ntete kusala nki ?  
(Kunwanisa bo)

Niveau secondaire –

- Sambu na nki nge banza bantu ya Yabeshi zolaka kuwakana ti mbeni na bo, kundima mpi nde bo kusadila yandi ?  
[Moniteur, kuwa mabanza ya bana.]  
(Mbala ya nkaka bo vandaka na boma, yo yina bo zolaka ve kunwana ti yandi.)

Bana sala bageste :

Bana sala mwa-seneti. Mwana mosi sala bonso Mfumu Nahashi. Yandi telama na ntwala ya bana ya nkaka. Bana ya nkaka fukimina yandi. Bo tuba-tuba nde, « Beto ta sadila nge ! » Nahashi tuba nde, « Beno

zola kuzinga, ee ? Beno ta zinga KAKA kana mono botula konso muntu disu na yandi ! » Bo yonso yantika kudila ngolo.



Bana yimba ti kina : Mfumu Nahashi songaka bo, Beno fweti sola.

Kana beno zola zinga Mo' ke botula beno disu !

10.2 Ntangu Saule waka mambu yina, Mpeve ya Nzambi fulusaka yandi na makasi ya longo. 1 Samuele 11 :5-6

Tangila bana :

5 Na ntangu yo yina, Saule ....yulaka nde : « Nki mambu ? Sambu na nki bantu ke diladila ? Bo zabisaka yandi mambu ya bantu ya bwala Yabeshi tubaka.

6 Ntangu Saule waka mambu yango, Mpeve ya Nzambi simbaka yandi, yandi waka makasi.

? Yula bana :

Niveau prescolaire –

- Ntangu Ntotila Saule waka mambu yina, keti yandi vandaka na kiese to makasi ?  
(Makasi)

Niveau primaire –

- Nki to nani simbaka Saule ntangu yandi waka mambu yina ?  
(Mpeve ya Nzambi)

Niveau secondaire –

- Mpeve ya Nzambi simbaka Saule, ti yandi waka makasi. Yo ke monika nde makasi yonso kele mbi ve. Nki mutindu ?


(Makasi na mambu ya mbi kele mbi ve.)

Bana sala bageste :

Bana sala bageste zole-zole. Mosi sala bonso Mpeve ya Nzambi, mosi bonso Saule. Mwana ya ke sala bonso Mpeve ya Nzambi sala ndinga



Whoosh ! Whoosh ! Yandi simba mapeka ya mwana ya nkaka. Mwana ya nkaka yantika kusonga makasi.

 Bana yimba ti kina : Mpeve ya Nzambi simbaka Saule Yandi waka makasi mingi. Kima yai ya Nahashi tubaka Yo vandaka mbote ve.

10.3 Saule bingaka bantu ya batribu yonso kusadisa bantu ya Yabeshi. 1 Samuele 11 :7-8

Tangila bana :

7 (Somere) Saule bingaka bantu ya makanda yonso ya Israele kukwisa sadisa bo na bitumba.

8 Saule tulaka bo yonso na ndonga... kutanga bo. Bantu yina katukaka na Israele vandaka mile nkama tatu (300,000).

? Yula bana :

Niveau prescolaire –

- Saule bingaka bantu, ti bo kwisaka mingi, to fioti ? (Mingi)

Niveau primaire –


- Bantu yai yonso kwisaka kusala nki ? (Kusadisa bampangi na bo na kunwana mvita.)

Niveau secondaire –

- Bo kwisaka kusadisa nani ? (Bampangi na bo ya bwala Yabeshi.)

Bana sala bageste :

Mwana mosi sala bonso Saule. Yandi binga bana na geste. Yandi tuba nde, « Kwisa, sadisa bampangi kunwana mvita. » Bo yonso kwenda na yandi.

 Bana yimba ti kina :

Saule bingaka bantu Ye bo kwisaka mingi.

10.4 Bantu ya Israele bedisaka bantu ya Ammoni ya vandaka kuyangisa bo. 1 Samuele 11 :9-11

Tangila bana :

9 (Somere : Bampangi tindaka message na bantu ya Yabeshi nde bo ta kwisa kusadisa bo.)

Bantu ya bwala Yabeshi monaka kiese mingi ntangu bo bakaka nsangu yai,

10 bo tubaka na Nahashi... nde : « Mbasi beto ta kudipesa na beno, ebuna beno ta sala beto mutindu beno zola. »

11 Kilumbu landaka na suka-suka, Saule kabisaka bantu na yandi na ndambu tatu ; bo kotaka na camp ya bambeni, bo nwanisaka bantu ya Amoni...katuka suka tii midi. Bayina bikalaka na moyo, bo tinaka....

? Yula bana :

Niveau prescolaire –

- Bo yonso ya me kwisa, bo kwendaka kunwana na bantu ya Amoni, to bo kwendaka ve ? (Bo kwendaka kunwana.)


Niveau primaire –

- Bantu ya bwala Yabeshi songaka Mfumu Nahashi nde bo ta kudipesa na yandi. Kansi nki surprise vandaka kuinga yandi ? (Bampangi mingi me kwisa kunwana nzila mosi ti bo.)
- Na nsuka, bantu ya Amoni ya me bikala na moyo, bo salaka nki ? (Bo tinaka.)

Niveau secondaire –

- Sambu na nki nge banza Saule kabisaka bantu ya Israele na bandambu tatu ? (Sambu bo kwisa na yandi na konso direction, bo

mona mpila kubasika ve.)  Bana sala bageste :

Bana sala bageste bonso bantu ya Amoni ke tina.  Bana yimba ti kina :  
Na ngolo ya Nzambi, Bantu ya Israele  
Bo nungaka na mvita.

10.5 Saule buyaka kufwa bantu ya vandaka kutula ntembe sambu na luyalu na yandi. 1 Samuele 11 :12-13, 10 :27  Tangila bana :

12 Ntangu yai, bantu ya Israele tubaka na Samuele nde : « Wapi bantu yina vandaka kutuba nde Saule ta vanda ntotila na beto ve ? Pesa beto bo, beto fwa bo yonso. »

(Sambu na ntangu Samuele songaka Saule bonso ntotila,) 10 :27 ... bantu ya nkaka ya mpamba vandaka kutuba nde : « Yandi yai na nki yandi ta sadisa beto ? » Bo tongaka yandi, bo natilaka yandi mpi ata kado ve. Kansi Saule salaka bonso nde yandi me wa yo ve.

11 :13 Kansi Saule tubaka nde : « Ata muntu ta fwa ve bubu, sambu bubu kele kilumbu ya Mfumu Nzambi gulusaka Israele. »

? Yula bana yonso :

Ntete, bantu ya nkaka na Israele, bo zolaka ve Saule kuvanda mfumu. Yandi fwaka bo, to yandi fwaka bo ve ?  
(Yandi fwaka bo ve.)

10.6 Bantu yonso ndimaka Saule kuvanda ntotila na bo. 1 Samuele 11 :14-15  Tangila bana :

14 Samuele tubaka na bantu ya Israele nde : « Beto kwendeno ...sambu beto ndima diaka nde Saule kele ntotila na beto. »

15 Yo yina, bo yonso kwendaka ... ebuna kuna na ntwala ya Mfumu Nzambi, bo tubaka nde Saule kele ntotila ya Israele. Bo pesaka makabu...na Mfumu Nzambi. Ebuna Saule ti bantu yonso yantikaka kusepela mingi.

? Yula bana :

Niveau prescolaire –

- Ntangu bantu ya Israele ndimaka diaka nde Saule kuvanda ntotila, bo pesaka nki na Nzambi ?  
(Makabu)

Niveau primaire –

- Na nima bantu me ndima diaka nde Saule kuvanda ntotila, bo yantikaka kusala nki ?  
(Kusepela mingi)

Niveau secondaire –

- Nki mutindu yonso nge mona Saule yantikaka luyalu na yandi mbote ?


[Moniteur, kuwa mabanza ya bana.]

(Na kati ya bangindu lenda vanda yai) :

- Yandi kwendaka kusadisa bampangi na bwala Yadeshi.
- Yandi landaka Mpeve ya Nzambi.
- Yandi bingaka bantu yonso kusadisa. Yai songaka nde yandi lenda twadisa.
- Yandi twadisaka na mvita na mpila ya mayele.
- Yandi landa ve bantu ya ndimaka ve luyalu na yandi. Na mpila yina, yandi kitulaka bambeni, bo kuma banduku.

Bana sala bageste :

Bana yonso bula maboko ti kina na kiese.

Bo tuba nde, « Saule, ntotila na beto, e ! » 

Bana yimba ti kina :

Bantu yonso ndimaka Luyalu ya Saule.

>|< Kumanisa :

Saule yantikaka mbote bonso ntotila ya Israele. Yandi vandaka na boma ve kunwanisa bambeni ya zolaka kuyangisa bantu na yandi Israele. Yandi mpi lolulaka bantu ya ndimaka yandi nswalu bonso ntotila. Beto ta mona na nima, kana yandi ta landa kusala mbote tii na nsuka. Kansi kuyantika, yandi me yantika mbote.

Beto mpi, na konso mambu ya kele na ntwala na beto, na ngolo ya Nzambi beto fweti tula dikulu mosi na ntwala. Beto fweti yantika.

Verse ya bubu yai :

5 Tula ntima na nge yonso na Mfumu Nzambi,/ kutula ntima ve na mambu/ ya nge mosi ke yindulaka nde nge zaba./

6 Yindula Mfumu Nzambi na mambu yonso/ ya nge ke salaka. / Yandi ta songa nge nzila ya mbote. / Bingana 3 :5-6

Bana tuba yo mbala zole. Na nima, pesa bana nzila kutuba yo mosi-mosi. Mwana mosi yantika, kansi na kati-kati, nge songa kidimbu nde yandi bika. Yandi songa mwana ya nkaka, ya fweti landa verse sika ya yandi me bika.  Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi ti lesu yai.

Devoir sambu na bakristo :

Beno bana bakristo, beno ya zaba nde dezia beno me yamba Yesu na luzingu ya beno, devoir mono ke pesa beno, yo yai : Bana mingi me yantika ntete ve kutanga to kuwa ndambu malongi ya Bible konso lumbu. Mono ke lombana na beno na mposo yai kuyantika. Kana Bible kele ve, to kana nge me longuka kutanga ntete ve, sosa mpangi ya lenda tangila nge. Kaka ndambu verse konso lumbu. Ebuna yindula lumbu ya mvimba malongi ya nge me wa. Yantika.

Kubinga bavidu na Yesu :

Kansi mbala ya nkaka nge me zaba ntete ve nde Yesu me gulusa nge. Mwana ya Nzambi Yesu Kristo me bika nzo ya kitoko na Yandi na zulu, me kulumuka awa na nsi-ntoto yai, sambu na kugulusa nge. Yandi salaka yo sambu nge lenda vutuka na kintwadi ti Nzambi. Sambu zulu lenda kanguka sambu na nge. Yandi me sala yonso ya mfunu sambu na nge, ntangu

Yandi fwaka na zulu ya kulunsi. Kana ntima ke songa nge nde, nge ke na mfunu na Yandi, yina Mpeve ya Nzambi. Kuwa ndinga na Yandi. Binga zina ya Yesu. Balula ntima bubuyai.

Kana nge ke na mfunu ya lusadisu na mambu yai, beto kele konso ntangu awa na nima ya ecodim sambu na kusadisa nge.

==NSUKA YA LESO 10

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 11 Samuele pesaka message ya nsuka.

1 Samuele 12 :1-25

### I. Preparatio ya Moniteur—

Kikuma ya lesu :

Kana beto zaba nde beto me vila nzila ya Nzambi ndambu, beto vutuka nswalu, beto landa Yandi diaka.

Verse ya bubu yai :

Samuele vutulaka nde :/ « Beno wa boma ve./ Ya kieleka, beno me sala mbi,/ kansi ata mpidina,/ beno bikisa Mfumu Nzambi ve,/ beno sadila Yandi/ na ntima na beno yonso. »  
1 Samuele 12 :20

Bankunga ya kwenda nzila mosi ti lesu :

Mono Me Sila Kulanda Yesu

Mono me sila kulanda Yesu (3X)

Kuvutuka, yo lunga ve.

Ata mono mosi (3X)

Ee, mono ta landa

Kuvutuka, yo lunga ve.

Vutuka, Afrika! Vutuka!

Vutuka! Afrika, vutuka !  
Vutuka na Nzambi nge me vila

Beto bika bampeve yonso, biteki yonso, Beto  
vutuka n'andi ya salaka beto !  
Beto vutuka n'andi ya salaka beto !

## II. Revisio—

Kulanda devoir ya lesu me luta : Devoir  
beto pesaka beno bakristo na mposu me  
luta vandaka nde beno yantika kutanga to  
kuwa ndambu ya Bible konso lumbu.  
Nani salaka yo ? Nani ke tanga ndambu  
ya Bible yandi mosi ? Nani me mona  
muntu ya me ndima kutangila yandi ?  
[Moniteur, pesa bana zole to tatu mpila  
kutuba nani ke tangila yandi. Bo ya ke  
tanga bo mosi lenda tuba kima mosi bo  
me tanga na mposu yai. Pesa bo yonso  
kikesa kulanda kusala mpidina.]

Kuyindula diaka baleso me luta:

Na mposu me luta, beto monaka nde mbeni  
mosi kwisaka kunwanisa bantu ya Israele  
ya bwala mosi. Ntangu Ntotila Saule waka  
yo, yandi bingaka bampangi sambu na  
kusadisa bo, ti Nzambi sadisaka bo  
kununga. Yo yina, bantu yonso vandaka na  
kiese kubinga Saule ntotila na bo. Saule  
yantikaka kimalu na yandi na mpila mosi ya  
mbote, to ya mbi ? (Ee, ya mbote.)

## III. Kulonga Leso Yai—

Kuyantika :

Nani bambuka zina ya prophete ya tulaka  
Saule Ntotila ? (Ee, Samuele. Yandi vandaka  
profeti, mpi zuzi ya nsuka.)

Sambu na nki Nzambi songaka Samuele kutula  
Saule ntotila ? (Ee, sambu bantu vandaka  
kubuya Nzambi bonso mfumu na bo. Bo  
sosaka kaka kuvanda bonso bansi ya nkaka ya  
vandaka na ntotila.) Bubuyai, beto me kuma  
penepene na nsuka ya moyo ya Samuele.

Yandi zola pesa malongi na yandi ya nsuka na  
bantu ya Israele.

Developpement (Malongi ya nene ya lesu  
yai na banti 4) :

11.1 Samuele bingaka bantu ya Israele sambu  
bo kuwa malongi ya nsuka na yandi. 1  
Samuele 12 :1-2

Tangila bana :

1 Samuele tubilaka bantu ya Israele nde : «  
Mono me sala mambu yonso ya beno  
zolaka. Mono me pesa beno ntotila ya  
kuyala beno.

2 Ntangu yai, beno fweti landa yandi.  
Mono, mono me kuma mbuta...

? Yula bana :

Niveau prescolaire –

- Samuele vandaka leki to mbuta ?  
(Yandi me kuma mbuta.)

Niveau primaire –

- Samuele me pesa bo nki ya bo zolaka ?  
(Ntotila)

Niveau secondaire –

- Ntangu yai, bo ta landa Samuele diaka  
ve, kansi bo fweti landa nani ?  
(Ntotila na bo)

Bana sala bageste :

Bana tambula na zulu ya nti bonso mununi.  
Bo tuba nde, « Mono Samuele me kuma  
mbuta. »



Bana yimba ti kina :

Samuele me kuma mbuta, Bo  
ta landa ntotila Saule.

11.2 Bo ndimaka nde Samuele me sala bo ata mbi mosi ve. 1 Samuele 12 :3-5 □ Tangila bana :

3 Mono yandi yai. Kana mono salaka kima ya mbi, beno songa mono yo ntangu yai na meso ya Mfumu Nzambi ....Keti mono salaka muntu nku, to mono monisaka yandi mpasi ? ....

4 Bantu ya Israele tubaka nde : « Nge salaka beto nku ve, nge monisaka beto mpasi ve. »

5 Samuele nde : « Mfumu Nzambi ti ntotila ya yandi me tula kele bantemwe na mono bubu yai, beno me mona nde mono me sala ka mono mbi ve. » Bo nde : « E, yo kele mpidina. »

? Yula bana :

Niveau prescolaire –

- Keti bantu monaka nde Samuele me monisa bo mpasi ? (Ikele ve.)

Niveau primaire –

- Nani vandaka ntemwe nde Samuele me monisa bo mpasi ve ? (Nzambi)

Niveau secondaire –

- Nki nge banza, kana nge yulaka kestio yai ya bantu yonso ya zaba nge, keti muntu ta tuba nde nge me sala yandi mbi ? [Moniteur, kuwa mvutu ya bana. Kana mambu kele, enkurager bana kuyidika yo.)

□ Bana sala bageste :

Bana sala geste na maboko kusonga nde, « Ata kima ve. » Bo tuba nde, « Samuele salaka bantu ata mbi mosi ve. »



Bana yimba ti kina :

Bantu yonso ndimaka,

“Nge me sala beto mbi ve, Samuele, Nge me sala beto mbi ve.”

11.3 Samuele bambukisaka bo bampila ya Nzambi me sadisa bo, ti masumu ya bo salaka kusosa ntotila. 1 Samuele 12 :6-13 □ Tangila bana :

6-7 Samuele tubaka diaka nde : ...Ntangu yai, atasio ! ... Mono tangila beno na meso ya Mfumu Nzambi mambote yonso ya Yandi salaka na kugulusa beno....

8 Ntangu Yakobi ti fami na yandi kwendaka na nsi ya Ezipte ti kumona mpasi na maboko ya bantu ya Ezipte, bankaka na beno didilaka Mfumu Nzambi... ebuna Yandi tindaka Moize ti Aroni na kubasisa bo na Ezipte ti kwisa kunata bo na ntoto yai.

9 Kansi bo vilaka Mfumu Nzambi... ebuna Yandi tindaka (bambeni na kunwanisa beno).

10 Bo didilaka Mfumu Nzambi diaka na kusadisa bo nde : « Beto me sala masumu, sambu beto me bika nge Mfumu Nzambi, na kwenda kusamba banzambi Baale ti Astarte. Gulusa beto na maboko ya bambeni, ebuna beto ta sambaka Nge. »

11 Ntangu yai, Mfumu Nzambi tindaka (bazuzi)... Bo gulusaka beno na maboko ya bambeni, ebuna beno zingaka na ngemba.

12-13 Ebuna ...beno buyaka Mfumu Nzambi na kuvanda ntotila na beno, beno tubaka na mono nde : ‘Tudila beto ntotila na kuyalaka beto.’ Ntangu yai, ntotila yai ya beno sosaka...

? Yula bana yonso :

- Nzambi me twadisa bo tii ntangu yina to ve ? (Ee, Yandi me twadisa bo.)
- Keti bo me landaka Nzambi mbotembote ?

(Ve, bo me vila Yandi me kusosa banzambi ya nkaka. Bo me sala mbi diaka kulomba ntotila.)

11.4 Samuele bondilaka bo kuvutuka kulanda Nzambi. Yandi songaka nene ya masumu ya kulomba ntotila na kidimbu. 1 Samuele 12 :14-19

Tangila bana :

14 Kana beno zitisa Mfumu Nzambi, Nzambi na beno ; kana beno sadilaka kaka Yandi... kana beno landa Yandi mbote-mbote, beno ti ntotila na beno, mambu yonso ta vanda mbote.

15 Kansi, kana beno lemfuka na Mfumu Nzambi ve, kana beno landa bansiku na Yandi mpi ve, Yandi ta buya beno...

16 Ntangu yai, atasio ! Beno tala mambu ya nene ya Mfumu Nzambi ke sala awa na meso na beno.

17 Yai kele ntangu ya musibu, mpidina ve ? Mono ke samba Mfumu Nzambi, ebuna beno ta mona nki mutindu Yandi ta tinda nzasi ti mvula ; beno ta zaba nde beno salaka mbi mpenza na...Nzambi na kulomba Yandi ntotila.

18-19 Samuele sambaka Mfumu Nzambi, ebuna kilumbu yo yina, Nzambi tindaka nzasi ti mvula. Bantu yonso ...tubaka na Samuele nde : « Pardo, sambila beto Mfumu Nzambi na nge, mpidina beto fwa ve. Sambu beto me yika masumu ya nkaka na kulomba Yandi ntotila. »

? Yula bana :

Niveau prescolaire –

- Nzambi tindaka nki na ntangu ya musibu ? (Nzazi ti mvula)

Niveau primaire –

- Nzazi ti mvula yina, yo vandaka kusonga bo nki ? (Nde bo me sala masumu kulomba ntotila)

Niveau secondaire –

- Bantu lombaka Samuele kusala nki ? (Kulomba Nzambi nde bo fwa ve.)

Bana sala bageste :

Bana sala bageste kusonga nzasi ti mvula.



Bana yimba ti kina :

Nzambi tindaka mvula

Na ntangu ya musibu Kidimbu

yai songaka bo Bo me sala mbi

ya nene.

11.5 Samuele bondilaka bantu diaka nde bo vutuka na Nzambi, bo sosa biteki diaka ve. 1 Samuele 12 :20-25  Tangila bana :

20 Samuele vutulaka nde : « Beno wa boma ve...beno me sala mbi, kansi ata mpidina, beno bikisa Mfumu Nzambi ve, beno sadila Yandi na ntima na beno yonso. »

[Moniteur, verse yai kele verse ya bana ta longuka bubu. Bo tuba yo mbala mosi fraze na fraze na nima ya nge. Bo ta tuba yo kuluta na nima.]

21 Beno kwenda ve kusamba banzambi ya luvunu. Bo ta kuka ve kusadisa beno to kugulusa beno...bo kele banzambi ya mpamba.

22 Mfumu Nzambi ta bika beno ve ata fioti, sambu Yandi mosi me zengaka nde Yandi ta kumisa beno bantu na Yandi....

24-25 Beno zitisa Mfumu Nzambi, beno sadila Yandi na ntima mosi ya mbote. Beno vila ve mambu ya nene ya Yandi salaka sambu na beno. Kansi, kana beno ke landa kaka na kusala mbi, beno ti ntotila na beno, beno ta fwa. »

? Yula bana :

Niveau prescolaire –

- Samuele bondilaka bo kulanda nani ?  
(Nzambi)

Niveau primaire –

- Ata bo me sala mbi, Samuele bondilaka bo kusala nki ?  
(Kulanda Nzambi ti lemfuka na Yandi)
- Yandi bondilaka bo kubika nki ?  
(Banzambi ya nkaka, ya mpamba)


Niveau secondaire –

- Bo fweti bambuka nki ?  
(Bampila yonso Nzambi me sadisa bo.)
- Sambu na nki Samuele zola bo kusamba biteki ve ?

(Sambu yina kele banzambi ya

mpamba ya lenda sadisa bo ve.)  Bana

sala bageste :

Bana songa bageste bonso bo ke buya biteki,  
bo ke simba Nzambi na maboko zole. 

Bana yimba ti kina :

Ata beno me sala mbi,

Kuvutuka na Nzambi !

>< Kumanisa :

Bantu ya Israele monaka nde, kieleka bo me sala mbi. Kansi yina ke songa ve nde bo bika kulanda Nzambi, kansi bo vutuka na Yandi.

Ata ntima na beto bakristo, ke zola kulanda Nzambi, mbala na mbala beto lenda mona nde, “O, mono me sala mbi ! Yai ya mono me sala, yo me

kulanda Yandi, binga zina na Yandi. Balula ntima, ti Yand ta yamba nge.

==NSUKA YA LESO 11

Kana ntangu lunga,

- Longa mikanda ya Bible.

pesa Nzambi kiese ve.” Ntangu yina, beto bika Nzambi ve kimakulu. Beto vutuka na Yandi. Beto vutuka na nzila, ebuna Yandi ta yamba beto diaka.

Verse ya bubu yai :

Samuele vutulaka nde :/ « Beno wa boma ve./ Ya kieleka, beno me sala mbi./ kansi ata mpidina,/ beno bikisa Mfumu Nzambi ve./ beno sadila Yandi/ na ntima na beno yonso. » 1 Samuele 12 :20

[Moniteur, kabisa bana na bandambu zole. Bo tuba fraze na fraze na nima na nge. Ndambu mosi ya bana tuba fraze mosi, ndambu ya zole tuba fraze ya landa.]

Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

Devoir sambu na bakristo :

Beno bakristo, devoir mono ke pesa beno bubuyai kele kudiya, Keti mono me vila nzila ya Nzambi, ata ndambu? Kana nge mona mbi mosi ya nge me sala, kwenda nswalu na Nzambi kulomba pardo, mpi kuvutuka na nzila na Yandi.

Kubinga bavidi na Yesu :

Beno ya me yamba Yesu ntete ve, ntangu yai mono ke tuba na beno. Kana nge mona ndinga ya fioti ke tuba nde, “Nge ke na mfunu ya Yesu,” yai kele Mpeve ya Nzambi ke bula na ntima na nge. Yesu kwisaka, ti Yandi fwaka na sika na nge sambu nge lenda zaba Nzambi. Yandi telamaka na lufwa sambu nge lenda baka moyo ya mvu ya mvu. Kana nge zola

## Leso 12 Saule pesaka nkailu ya Nzambi me pesa yandi kiyeka ya kupesa ve.

1 Samuele 13 :1-23 I.

### Preparatio ya Moniteur—

Kikuma ya lesa :

Beto ndima sika ya Nzambi me tula beto, beto kwenda ve na luzolo na beto mosi kusosa sika ya nkaka.

Verse ya bubu yai :

Samuele tubaka nde :/ « Nge me sala buzoba !/ Nge me lemfuka ve na nsiku/ yina ya Mfumu Nzambi,/ ... pesaka nge... » 1 Samuele 13 :13a

Bankunga ya kwenda nzila mosi ti lesa :

Ee, Mfumu, Ee

Ee, Mfumu, ee

Na yonso ya Nge tuba

Ee, Mfumu, ee Mono

zola lemfuka

Mvutu:

Bu mo' tanga Bibila

Mono kaka ta ndima

Ye mono ta tuba ee,

Mfumu, ee!

Mono Ta Mona Kiese

Mono ta mona kiese (3x)

Na yonso Nzambi me pesa

Mo' ta yuma ntima ve (3x)

Na sika ya bantu ya nkaka

Nzambi na mono zaba (3x)

Nki kele mbote na mono.

### II. Revisio—

- Kulanda devoir ya lesa me luta : Bana bakristo, na mposo me luta, beto lombaka beno kuyindula mbote kana beno me vila

nzila ya Nzambi ata ndambu. Bayina monaka nde bo me yantika kuvila nzila ndambu, beto lombaka beno kuvutuka. Nani monaka nzila mosi bo fweti vutuka na Nzambi na mposo yai ? Nani ta songa beto nzila yina ? Beno ya nkaka, bambuka nde kana nge sala mambu ya pesa Nzambi kiese ve, kana nge vila nzila, nde nge lenda vutuka.

Kuyindula diaka baleso me luta:

Na mposo me luta, beto monaka nde muntu mosi me kwisa penepene na nsuka ya moyo na yandi.

Muntu yina nani? (Ee, Samuele)

Samuele pesaka Israele conseye nde bo landa kaka nzila ya Nzambi. Nani ta bikala kuyala bo? (Ee, Saule. Samuele me tula yandi ntotila.)

### III. Kulonga Leso Yai—

Kuyantika : Beto me mona nde Saule me yantika mbote bonso ntotila ya Israele. Keti yandi ta landa conseye Samuele me pesa bo ? Keti yandi ta landa kaka nzila ya Nzambi ti bansiku ya Yandi me pesa bo ?

Developpement (Malongi ya nene ya lesa yai na banti 5 ) :

12.1 Bantu ya Filistia vandaka kumonisa bantu ya Israele mpasi. Yo yina, Saule bingaka bantu ya Israele kunwanisa bo. 1 Samuele 13 : 19-22, na nima, 2-5.

Tangila bana :

Mpila mbeni Filistia vandaka kumonisa bo mpasi--

19 Na ntangu yina, ... bantu ya Filistia zolaka ve nde Ba-Ebreo (bantu ya Israele) kusala bambele ya bitumba ti makonga.

20-21 Yo yina, bantu ya Israele vandaka kwenda na babwala ya bantu ya Filistia na



kutula bima na bo makasi, bonso bansengo, basoka, ti bambele. Bo vandaka kufuta ...  
22 Yo yina, na kilumbu ya bitumba, ata soda mosi ve ya Israele vandaka na mbele to dikonga, kaka Saule ti mwana na yandi Yonatani.

Mpila Saule bingaka bantu ya Israele--

2 Saule solaka bantu ya Isrele mile tatu (3,000) : mile zole (2,000) bikalaka ti yandi na bwala Mikmasi ... mile mosi (1,000) bikalaka ti mwana na yandi Yonatani... Kansi bayina ya nkaka, yandi vutulaka bo yonso na babwala na bo.

3-4 Yonatani fwaka mfumu ya basoda ya Filistia.... Saule tindaka bantu na kubula mpungu na ntoto ya mvimba sambu na kuzabisa bantu yonso .... ebuna bantu ya Filistia, me wa makasi mpenza. Yo yina, bantu ya Israele kwendaka kukuta Saule na bwala Gilgale.

5 Bantu ya Filistia kwisaka kunwanisa bantu ya Israele . Bo vandaka na bapusupusu..., bantu ya bampunda..., ti basoda mingimingi, mpila ya kutanga bo ...ve. Bo kwendaka na bwala Mikmasi... Bo tulaka camp na bo kuna.

? Yula bana :

Niveau prescolaire –

- Bantu ya Filistia vandaka banduku ya Israele to bambeni ?  
(Bambeni)

Niveau primaire –

- Bantu ya Filistia pesaka bo mpasi nki mutindu ?  
(Bo pesaka bo nzila ve kusadila to ata kuvanda na bima ya kibende.)
- Kana bitumba kele, bantu ya Filistia ta vanda na bambele, etc., kansi bantu ya Israele fweti nwana maboko mpamba.


Nge banza bantu ya Israele monaka yai nki mutindu ?

[Moniteur, kuwa mabanza ya bana. Mbala ya nkaka injuste, mbote ve, mpila kununga ve, makasi, etc.)

Niveau secondaire –

- Nki mutindu mvita yantikaka ?  
(Yonatani fwaka mfumu ya basoda na bo, ebuna tata na yandi songaka bantu yonso. Bantu ya Filistia waka makasi ti kwisaka kunwanisa bantu ya Israele.)

Bana sala bageste :

Bana sala bonso bo ke bula ngunga, ke tuba nde, « Yonatani me fwaka mfumu ya basoda ya Filistia. »  Bana yimba ti kina :

Bantu ya Filistia yangisaka bo mingi.  
Yonatani fwaka mfumu ya basoda na bo.  
Bantu ya Filistia waka makasi mingi.  
Bo kwisaka kunwanisa bo. Bo kwisaka mingi.

12.2 Bantu waka boma mingi. 1 Samuele 13 :6-7

Tangila bana :

6 Bo nwanisaka bantu ya Israele ngolo, ebuna ...bantu ya nkaka kwendaka kubumbana na mabulu ya mutindu na mutindu, ti na nsi ya matadi.

7 Bankaka sabukaka nzadi ya Yordani. Bo tinaka.... Saule vandaka kaka na bwala Gilgale. Bantu yina vandaka ti yandi yantikaka kutekita na boma.

? Yula bana :

Niveau prescolaire –

- Bantu ya Israele waka kiese to boma ?  
(Boma)

Niveau primaire –

- Mpila bantu ya Filistia vandaka kunwanisa bantu ya Israele, yo pusaka bo kusala nki ? (Kudibumba na konso kisika, kutina, kutekita na boma.)

Niveau secondaire –

- Nki ya nkaka bo lendaka kusala ? [Moniteur, kuwa mabanza ya bantu. Mbala ya nkaka lomba lusadisu ya Nzambi.]

Bana sala bageste :

Bana sala bageste ya ke songa boma.



Bana yimba ti kina :

Bantu ya Filistia nwanisaka bo ngolo.  
Bantu ya Israele, boma simbaka bo.

12.3 Bo kingaka Samuele bilumbu 7, sambu yandi pesa bankailu kulomba lusadisa ya Nzambi na bitumba bo zolaka kunwana, kansi yandi kwisaka ve. Yo yina, Saule bakaka sika ya nganga-Nzambi kupesa nkailu yina. 1 Samuele 13 :8-9

Tangila bana :

8 Saule vandaka bilumbu nsambwadi na kuingila Samuele mutindu yandi tubaka, kansi Samuele kwisaka ve.... Bantu yantikaka kutina Saule,

9 yo yina, yandi tubaka na bo nde : « Beno natila mono bambisi sambu na kupesa makabu....

? Yula bana :

Niveau prescolaire –

- Saule zolaka mbisi sambu na kudia, to sambu na kupesa makabu ?

(Kupesa makabu)

Niveau primaire –

- Samuele tubaka nde yandi ta kwisa na bilumbu 7. Saule kingaka yandi ntangu ikwa ?

(Bilumbu 7)

Niveau secondaire –

- Samuele zolaka kwisa sambu na kupesa makabu na Nzambi na ntwala bo yantika kunwana. Sambu na nki Samuele fweti pesa yo ?

(Sambu yandi vandaka

ngangaNzambi, ti kaka bo Nzambi pesaka

kisalu ya kupesa makabu.)  Bana sala

bageste :

Mwana mosi tanga malembe bilumbu 1 tii na 7.

Na nima ya konso nombre, bana ya nkaka tala bonso bo ke sosa Samuele. Bo yonso tuba nde, « Samuele me kwisa ve. »



Bana yimba ti kina :

Samule, nganga-Nzambi

Zolaka kukwisa

Saule kingaka yandi Kupesa makabu.

12 .4 Ntangu yina, Samuele vutukaka. Yandi nde, Nzambi ke na kiese ve sambu Saule me sala na sika ya nganga-Nzambi. Nzambi pesaka yandi sika yina ve. 1 Samuele 13 :10-13

Tangila bana :

10 Yandi na kumanisa mpidiyai, Samuele mpi na kwisa kukuma....

11 ... Samuele tubaka nde : « Nki nge me sala mpidina ? » Saule vutulaka nde : « Mono monaka nde bantu me yantika kutina-tina, ntangu mpi ya nge tubaka na kwisa yo me luta. Yo mpi bantu ya Filistia ke kutana na bwala Mikmasi.

12 Mono yindulaka nde : ‘Bantu ya Filistia ke kwisa kunwanisa mono awa ... ebuna mono me samba ntete ve Mfumu Nzambi na kusadisa beto.’ Yo yina, mono me mona nde mono mosi fweti pesa yandi makabu. »

(NB : Atasio, bana ya niveau secondaire. Na français yo ke tuba nde Saule me sala yo na kingolo-ngolo. « 1 Samuel 13:12 -- je me suis dit: Les Philistins vont descendre contre moi à Guilgal, et je n'ai pas imploré l'Eternel! C'est alors que je me suis fait violence et que j'ai offert l'holocauste. »

13 Samuele tubaka nde : « Nge me sala buzoba ! » Nge me lemfuka ve na nsiku yina ya Mfumu Nzambi... pesaka nge. Kana nge landaka yo, Yandi zolaka kubika nge ti bana na nge, beno yala Israele tii kuna.

? Yula bana :

Niveau prescolaire –

- Kaka na nima Saule me pesa makabu na Nzambi, nani kwisaka ? (Samuele kwisaka.)

Niveau primaire –

- Keti Samuele vandaka na kiese sambu Saule me sala kisalulu ya nganganganzambi kupesa makabu na Nzambi ? (Ikele ve. Yai vandaka kisalulu Nzambi me pesa na banganganzambi.)

Niveau secondaire –

- Nki vandaka ndola Nzambi pesaka Saule ? (Fami na yandi ta bika kuyala ve tii kuna.)

Bana sala bageste :

Bana songa bageste ya ke songa kiese ve.



Bana yimba ti kina :

O, Saule, ve.

Nzambi pesaka nge kisalulu yina ve. Nzambi me tula nge mfumu,

Yina kisalulu ya nganganzambi.

O Saule, ve.

12.5 Ndola ya masumu ya Saule yo yai : kimfumu na yandi ta telama ve, kansi Nzambi ta sosa ntotila ya nkaka, yina ta vanda ntima mosi ti Yandi. 1 Samuele 13 :14  Tangila bana :

14 Kansi ntangu yai, kimfumu na nge ke zinga ve. Dezia Mfumu Nzambi me sosa muntu ya nkaka yina ta pesa Yandi kiese ; Yandi me tula yandi ntotila ya bantu na Yandi, sambu nge, nge me lemfukila Yandi ve.

? Yula bana :

Niveau prescolaire –

- Keti Nzambi vandaka na kiese na Saule, to kiese ve ? (Kiese ve)

Niveau primaire –

- Sambu na nki Nzambi vandaka na kiese ve na Saule ? (Sambu yandi lemfukaka ve na Yandi.)
- Na nki Saule lemfukaka ve ? (Yandi bakaka sika ya nganganzambi, kansi Nzambi me pesa yandi sika yina ve.)

Niveau secondaire –

- Nzambi vandaka dezia kusala nki ? (Kusosa ntotila ya nkaka ya ta vanda ntima mosi ti Yandi.)  Bana sala bageste :

Bana sala geste bonso bo ke sosa ntotila ya nkaka. Bo ke tala....Bo ke tala....



Bana yimba ti kina :

Saule, nge kele ntotila Keti yo ke lunga ve?

Nge me salaka kinganga Yo yina, Nzambi ke katula nge.

>< Kumanisa :

Nzambi pesaka Saule kisika ya mbote— kuvanda ntotila, kuyala bantu. Nzambi me songaka bo ntama nde kaka banganga-Nzambi lenda pesa makabu ya mbisi na Nzambi. Kansi Saule pesaka boma na yandi nzila kuyala yandi. Yandi lemfukaka ve na nsiku Nzambi me pesa bo. Yandi kwendaka kusimba na kingolo, ksalu ya kinganga mpi. Nzambi vandaka ve kiese sambu yandi me simba sika ya Yandi me pesa Saule ve. Yo yina, Yandi tubaka nde Yandi ta sukisa luyalu ya Saule ti fami na yandi.

Verse ya bubu yai :

Samuele tubaka nde: / « Nge me sala buzoba !/  
Nge me lemfuka ve na nsiku/ yina ya Mfumu Nzambi/ ... pesaka nge.... »  
1 Samuele 13 :13a

Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

Devoir sambu na bakristo :

Beno bakristo, mono ke yula beno mosi-mosi :  
Nki sika Nzambi me pesa nge na luzingu na nge sesepiyai ? Ketu nge kele mwana ya nzonkanda ? Vanda na kiese na yo, ti sala ngolo. Ketu nge kele choriste ? Ndimba ksalu yina, ti sala yo mbote. Nge kele mwana na nzo ? Kuyuma ntima ve kuvanda mbuta. Ndimba ti sala na kiese na sika ya Nzambi me pesa nge bubuyai.

Ketu nge kele nkento ? Kuyindula ve nde, “A, kana mono vandaka bakala.” Ketu nge kele bakala? Vanda na kiese na yo na mpila ya Nzambi salaka nge. Sosa kuvanda nkento to bakala ya ke pesa Nzambi kiese.

Kubinga bavidi na Yesu :

Kansi, zaba mbote nde kana nge me balula ntima ti yamba Yesu ve na luzingu na nge, nge lenda ve pesa Nzambi kiese. Masumu yonso ya nge me sala katuka kimwana ya fioti na nge tii bubuyai, yo kele kaka. Yo ke kanga nge

nzila kuvanda na kintwadi ti Nzambi. Yo ke kanga nge nzila kukota na bwala na Yandi.

Nzambi me pesa beto nzila mosi kukatula masumu yina. Nzila yina kele Mwana na Yandi Yesu Kristo ya fwaka sambu na beto ti telamaka na lufwa. Kana nge zaba ve mbotembote nde nge kele mwana ti mulandi na Yandi, mono ta vanda na kiese kusadisa nge na nima ya ecodim bubuyai.

==NSUKA YA LESO 12

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 13 Nzambi buyaka Saule sambu yandi lemfukaka ve diaka.

1 Samuele 15 :1-28

### I. Preparatio ya Moniteur—

Kikuma ya lesu :

Beto lemfuka mbote-mbote na yonso ya Nzambi me songa beto na ndinga na Yandi.

Kuyidika na ntwala :

Na 13.5 ‘Bana Sale Geste’, nge ta vanda na mfunu ya lele ya ntama ya bana lenda pasula.

Verse ya bubu yai :

Samuele nde :/ «Nki Mfumu Nzambi ke zola mingi :/ kulemfuka, to kupesa makabu ?/ Zaba nde, kulemfuka na Nzambi/ kuluta kupesa

Yandi makabu... / 1 Samuele 15 :22

Bankunga ya kwenda nzila mosi ti lesu :  
BI-BI-LA !

Bii-bi-la !

Beto ta tanga yo !

Lomba, ebuna lemfuka  
na

Bii-ii-bi-la !

Ee, Mfumu, Ee

Ee, Mfumu, ee

Na yonso ya Nge tuba

Ee, Mfumu, ee

Mono zola lemfuka

Mvutu:

Bu mo’ tanga Bibila

Mono kaka ta ndima

Ye mono ta tuba ee,

Mfumu, ee!

### II. Revisio—

Kulanda devoir ya lesu me luta :

Devoir beto pesaka beno na mposo me luta,  
kusosa kuvanda na kiese na sika ya Nzambi

me tula nge. Nani ta songa beto mpila yandi mekaka kusala yo na mposo me luta ?

Kuyindula diaka baleso me luta:

Beto me mona nde Nzambi tulaka nani ntotila ya ntete ya Israele?  
(Ee, Saule)

Keti yandi yantikaka mbote to mbote ve?  
(Mbote)

Yandi yantikaka mbote, kansi dezia yandi me sala disumu mosi ya Nzambi zolaka ve. Yandi kwendaka kubaka sika ya Nzambi pesaka yandi ve. Sika yina ya nani ?  
(Sika ya nganga-Nzambi)

### III. Kulonga Leso Yai—

Kuyantika :

Na nima Saule kumaka mfumu, yandi ti mwana na yandi Yonatani, bo nwanaka bitumba mingi. Bo fweti sala yo, sambu bambuta na bo lemfukaka ve na ndinga ya Nzambi, nde bo katula bantu yonso ya mbi na ntoto yina. Bo bikisaka bantu yina ndambu-ndambu, ti bantu yina kumaka bambeni ya vandaka kuyangisa bo ngolo. Mosi ya bantu yai vandaka tribu to dikanda ya Amaleki.

Developpement (Malongi ya nene ya lesu yai na banti 5 ) :

13.1 Nzambi songaka Saule kumanisa bantu ya Amaleki, kubika muntu mosi ve na kati na bo kuzinga. 1 Samuele 15 :1-3  Tangila bana :

1-2 Samuele tubaka na Saule nde :

« ....Kuwa ntangu yai mambu ya Mfumu Nzambi, Nzambi Mpungu, ke tuba : ‘Mono me zenga nde Mono ke pesa bantu ya Amaleki ndola...’

3 Mpidina kwenda kunwanisa bo . Nge fwa bo yonso kimakulu ti bima na bo yonso. Kubikisa ata kima ve. Fwa bantu yonso ti bambisi yonso ... ‘ »

? Yula bana :

Niveau prescolaire –

- Nzambi zolaka kupesa bantu ya Amaleki makabu to ndola ? (Ndola)

Niveau primaire –

- Nzambi songaka Saule nde yandi fweti kufwa bantu ikwa ya Amaleki ? (Bo yonso)
- Yandi fweti kufwa bambisi ikwa na bo ? (Yonso)
- Yandi fweti sala nki na bima na bo ? (Kufwa yo yonso. Bika ata kima ve.)

Niveau secondaire –

- Kana Saule lemfuka mbote na Nzambi, na nima yandi manisa na Amaleki, nki ta bikala na bo ? (Ata kima mosi ve. Bo bantu ya mbi. Nzambi me zenga bo ndola ya ngolo.)

Bana sala bageste :

Nge moniteur tuba frase ya ntete. Bana yonso vutula mvutu, fraze ya zole.

Moniteur :

Bana :

Bantu yonso ya yonso. Amaleki Kufwa bo

Bambisi yonso ya Amaleki Kufwa bo yonso.

Bima yonso ya yonso Amaleki Kufwa yo



Bana yimba ti kina :

Nzambi zengaka ndola  
Na bantu ya Amaleki.  
Saule fweti manisa bo.

13.2 Saule songaka bantu ya Keni ya zingaka na kati na bo kubasika. Yandi wilaka bo mawa sambu Nzambi me zenga bo lufwa ve. 1 Samuele 15 : 4-6

Tangila bana :

4 Saule bingaka basoda na yandi... Yandi tangaka bo ; bo vandaka (MINGI).

5 Ebuna yandi nataka bo penepene na bwala ya bantu ya Amaleki. Bo bumbanaka na kisika mosi....

6 Yandi tindaka ndinga na bantu ya Keni nde : « Beno katuka pana, beno vanda ve kisika mosi ti bantu ya Amaleki....» Ebuna bantu ya Keni katukaka.

? Yula bana :

Niveau prescolaire –

- Basoda ya Israele vandaka fioti to mingi ? (Mingi)

Niveau primaire –

- Na kati ya bantu ya Amaleki, nani ya nkaka bantu ya mbote vandaka kuzinga kuna ? (Bantu ya Keni)
- Saule songaka bantu yina kusala nki ? (Kukatuka na kati ya bantu ya Amaleki)

Niveau secondaire --

Bana sala bageste :

Bana songa bageste ya ke songa « katuka ».



Bana yimba ti kina :

Ntete bo songaka bantu ya Keni: “Beno katuka.” Ee, bo yonso katukaka.

13.3 Saule bedisaka bantu ya Amaleki, kansi yandi salaka yonso ve na mpila ya Nzambi tubaka. 1 Samuele 15 :7-9 □ Tangila bana :

7-8 Saule bedisaka bantu ya Amaleki... Yandi fwaka bantu yonso ya Amaleki, kansi mfumu na bo Agagi, yandi tulaka yandi na boloko.

9 ...Bo fwaka mpi ve bambisi ya kuluta kitoko-bangombe, mameme, bana bangombe ya mafuta, ti bana-mameme, ti konso kima ya mbote, kansi bo fwaka bima yonso ya mpamba ti ya kukonda mfunu.

? Yula bana :

Niveau prescolaire –

- Keti Saule kufwaka Mfumu ya Amaleki, to yandi tulaka yandi na boloko ? (Tulaka yandi na boloko)

Niveau primaire –

- Nzambi songaka Saule yandi kufwa bima yonso ya Amaleki, kansi yandi kufwaka nki ve ? (Mfumu na bo, bambisi kuluta mbote na bo, bima kuluta mbote na bo.)

Niveau secondaire –

- Nki mutindu Saule balulaka ndinga ya Nzambi ? (Nde yandi kufwa yonso ve, kansi kaka bima ya kukonda mfunu. Bima ya mbote, yo kuma na yandi.)
- Nki vandaka probleme na mpila Saule salaka ? (Yandi lemfukaka ve yonso. Yandi bakaka ndinga ya Nzambi bonso kima ya kusakana na yo.)

□ Bana sala bageste :

Bana songa misapi tanu ya diboko mosi. Bo sala bonso Saule. Bo simba musapi ya ntete. Bo tuba nde, « Yai kima ya mbote. Mono ta lemfuka na Nzambi. »

Bo songa musapi ya zole. « Yai kima ya mpamba. Mono ta lemfuka ve. » Musapi ya tatu. « Yai kima ya mbote. Mono ta lemfuka. » Etc.



Bana yimba ti kina :

Saule, Nzambi pesaka nge mabanza na Yandi.

Sambu na nki nge me kitula yo mabanza na nge mosi ?

13.4 Samuele kwisaka na Saule kusonga yandi nde yandi me sala mbi, kansi Saule tubaka nde yandi me sala mbote. 1 Samuele 15 :10-21

10-11 Mfumu Nzambi tubaka na Samuele nde : « Mono ke mona mawa sambu mono solaka Saule na kuvanda ntotila...sambu yandi me landa ve bansiku na Mono. » ....

12-13 ...(Samuel) kwendaka kusosa Saule....Saule pesaka yandi mbote nde : « Mfumu Nzambi kuvanda na nge. Mono me sala mambu ya Mfumu Nzambi tubaka. »

14 Samuele yulaka yandi nde : « Ebuna, makelele yai ya bangombe ti ya mameme ya mono ke wa, yo ke katuka wapi ?

15 Saule nde : « Basoda na mono me botula yo na bantu ya Amaleki. Bo me baka mameme ti bangombe ya kuluta kitoko sambu na kupesa makabu na Mfumu Nzambi... Bima ya nkaka, beto me fwa-fwa yo yonso kimakulu. »

16 Samuele nde : « Bika kutuba. Mono ke songa nge mambu ya Mfumu Nzambi me tubila mono... »...

18 « ...Mfumu Nzambi tindaka nge nde : ‘Kwenda, nge fwa bantu ya Ameleki yonso. Bo kele bantu ya mbi...’

19-20 Ebuna, sambu na nki nge me lemfukila Yandi ve ? ....» Saule nde : « Mono lemfukilaka Mfumu Nzambi, si. Mono kwendaka mutindu Yandi songaka mono....

21 Kansi basoda na mono kufwaka ve mameme ti bangombe ya kuluta kitoko ya bo botulaka...na kupesa makabu na Mfumu Nzambi... »

? Yula bana :

Niveau prescolaire –

- Keti Nzambi vandaka na kiese na mpila Saule salaka ? (Ikele ve.)

Niveau primaire –

- Samuele waka nki ya songaka yandi nde Saule me lemfuka ve ? (Kudila ya bambisi. Nzambi mpi me songa yandi.)

Niveau secondaire –

- Nki vandaka excuse ya Saule ? (Yandi zolaka kupesa bambisi yina makabu na Nzambi. Yandi tubaka mpi nde yandi ve, kansi basoda na yandi salaka yo.)

Bana sala bageste :

Kabisa bana na bandambu zole. Mosi tuba bonso Saule nde, « Mono me lemfuka, si. » Ya nkaka dila bonso bambisi, « Baa, baa, baa. »



Bana yimba ti kina :

Saule, nge fwaka bambisi yonso?

Baa, baa, baa.

Nani yina kele dila? Baa, baa, baa.

Saule, nge me lemfuka ve!

13.5 Samuele tendulaka Saule mbi na yandi ti ndola ya Nzambi ta pesa.

1 Samuele 15 : 22-28

Tangila bana :

22 Samuele nde : « Nki Mfumu Nzambi ke zola mingi : kulemfuka to kupesa makabu ? Zaba nde, kulemfuka na Nzambi kuluta kupesa Yandi makabu, kuwa malongi

na Yandi kuluta kupesa Yandi bambisi ya mafuta.

23 Mubulu kele bonso kindoki. Ntu ngolo kele bonso kusambila biteki. Yo yina, sambu nge buyaka kulanda nsiku ya Mfumu Nzambi, Yandi mpi me katula nge na kimfumu....

26 .... Nge buyaka kulanda nsiku ya Mfumu Nzambi. Yandi mpi me buya nge na kuvanda ntotila ya bantu ya Israele. »

27 Ntangu Samuele balukaka na kwenda, Saule simbaka yandi na lele, ebuna lele pasukaka.

28 Samuele tubaka na yandi ndi : « Mutindu yo yai mpi, Mfumu Nzambi me katula nge na kimfumu ya Israele bubu. Yandi me pesa yo na muntu ya nkaka...

? Yula bana :

Niveau prescolaire –

- Keti Nzambi vandaka na kiese na Saule ? Ikele ve. Saule me lemfuka ve.

Niveau primaire –

- Makabu kele kima ya mbote, kansi nki luta mbote ? (Kulemfuka na Nzambi)
- Sambu na nki Nzambi ta ndima Saule kuvanda ntotila diaka ve ? (Sambu yandi me lemfuka ve na Yandi) Niveau secondaire –
- Ntangu Saule simbaka lele ya Samuele, yo pasukaka. Yai songaka nki ? (Nde Nzambi ta pasula kimfumu na diboko na yandi.)

Bana sala bageste :

Songa lele. Yo kele songa kimfumu ya Saule na Israele. Tula bana 2 to 3 na lweka mosi, bana 1 to 2 ya nkaka na lweka ya nkaka. Bo simba lele, bo pasula yo. Yai ke songa nde Nzambi ta pasula kimfumu na diboko ya Saule, ta pesa yo na muntu ya nkaka.



Bana yimba ti kina :



Saule, O Saule, nge me lemfuka ve. Yo yina Nzambi ta katula kimfumu na diboko na nge.

>|< Kumanisa :

Nzambi tubaka nde Yandi ta katula kimfumu na Saule sambu yandi me lemfuka ve na ndinga ya Nzambi. Yandi me tula mabanza na yandi mosi na sika ya ndinga ya Nzambi. O, bana, beto keba. Ndinga ya Nzambi kele mfunu mingi. Beto kuwa yo, beto lemfuka na yo na kiese yonso.

Verse ya bubu yai :

Samuele nde:/ «Nki Mfumu Nzambi ke zola mingi:/ kulemfuka, to kupesa makabu ?/ Zaba nde, kulemfuka na Nzambi/ kuluta kupesa Yandi makabu... / 1 Samuele 15 :22

Bana tuba yo fraze na fraze na nima ya nge moniteur mbala zole. Na nima, bo tuba yo diaka mbala zole, ti konso ntangu bo tuba 'kulemfuka,' bo telama ti boka yo ngolo. Na nsuka, bo tuba yo ti bageste mbala zole.

Bankunga ya kwenda nzila mosi ti leso :

Bana yimba mosi ya bankunga ya ke kwenda nzila mosi na leso yai.

Devoir sambu na bakristo :

Devoir mono ke pesa beno bakristo, yo yai: Mposo yai, tanga to kuwa ndambu ya Ndinga ya Nzambi konso lumbu. Na nima, kudiya, "Nki mutindu mono lenda lemfuka na malongi yai ya mono me tanga?" Ebuna, sala yo. Lemfuka.

Kubinga bavidu na Yesu :

Kansi kana nge me balula ntima na Yesu ntete ve na luzingu na nge, zaba nde, nge kele na makambu ti Nzambi. Nge me zwa makambu, sambu beto yonso me sala masumu. Beto me lemfuka na Nzambi ve. Beto me sala mambu ya Yandi zolaka ve. Yo yina, kinduku ti Yandi me zengana, me fwaka. Mubulu yai ke kanga

beto mpi mpila kukwenda kuzinga na bwala na Yandi.

Kansi Nzambi zola nge mingi. Yandi zola kuvutula kintwadi na kati ya nge ti Yandi. Yo yina, Yandi tindaka Mwana na yandi Yesu Kristo. Yesu zingaka awa na nsi-ntoto kukonda ata disumu mosi. Yandi kitoko kaka. Yandi fwaka na zulu ya kulunsi bonso nkailu, kufuta mfuka ya mambi na beto. Kansi lufwa simbaka Yandi ve tii kuna. Yandi telamaka na lufwa.

Bubuyai, Yandi ke na moyo. Yandi ta wa nge kana nge binga Yandi sambu na kugulusa nge. Bible ke songa beto nde, "Konso muntu yina binga zina na Yandi, yandi ta guluka. (Roma 10:13).

Kana nge ke sosa lusadisu sambu na kuyamba Yesu, kaka bikala na nima ya ecodim. Beto ta kwisa kusadisa nge.

==NSUKA YA LESO 13

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 14 Samuele tulaka Davidi ntotila ya Israele.

1 Samuele 16 :1-13

### I. Preparatio ya Moniteur—

Kikuma ya lesu :

Beto landa ve mabanza na beto mosi, kansi beto sosa kulanda mabanza ya Nzambi, sambu beto bakisa nde Yandi ke mona ve bonso beto ke mona.

Verse ya bubu yai :

...Muntu ke talaka/ yina ke monika na meso,/kansi Mfumumu Nzambi/ ke talaka ntima./  
1 Samuele 16 :7b

Bankunga ya kwenda nzila mosi ti lesu :

Ee, Mfumumu, Ee  
Ee, Mfumumu, ee

Na yonso ya Nge tuba  
Ee, Mfumumu, ee  
Mono zola lemfuka

Mvutu:

Bu mo' tanga Bibila  
Mono kaka ta ndima  
Ye mono ta tuba ee,  
Mfumumu, ee!

Kuwa Bible

Kuwa Bible, Tanga Bible

'Buna nge ta mona  
Nzila mbote mingi  
Nzila mbote mingi Ye  
ngangu I Ye ngangu !

Kuwa Bible, Tanga Bible

'Buna nge ta zaba  
Mabanza ya Nzambi  
Mabanza ya Nzambi  
Na beto ! Na beto !

### II. Revisio—

Kulanda devoir ya lesu me luta :

Na mposu me luta, beto pesaka devoir na beno bakristo nde beno tanga to kuwa ndambu ya Ndinga ya Nzambi konso lumbu, ti yindula nki mutindu beno lenda lemfuka na yo. Nani ta songa beto mpila mosi nge lemfukaka na Ndinga ya Nzambi mposu yai ?

Kuyindula diaka baleso me luta :

Na mposu me luta, beto monaka nde Nzambi zengaka nki sambu na Ntotila Saule ?

(Yandi ta katula kimfumu na diboko na yandi, sambu yandi vandaka kulanda bansiku ya Nzambi mbote-mbote ve.)

### III. Kulonga Lesu Yai—

Kuyantika :

Sami zolaka kusumba bon-bon. Yandi vandaka na mbongo kusumba kaka mosi. Yandi talaka ba bon-bon mbote-mbote. Na nsuka, yandi solaka mosi ya vandaka kukanga na papier ya kitoko. Kansi na kati, yandi monaka nde yo vandaka kitoko mingi ve. Beto bantu kele nswalu kulanda konso mambu ya ke monika kitoko na meso. Na mposu me luta, beto monaka nde Nzambi buyaka nde Saule kuvanda mfumu diaka. Yandi vandaka kitoko na meso, nda kuluta bampangi na yandi. Kansi, yandi lemfukaka na Nzambi ve. Yo yina, Nzambi buyaka yandi.

Developpement (Malongi ya nene ya lesu yai na banti 5 ) :

14.1 Nzambi songaka Samuele kukwenda na Papa Yese, muntu ya bwala Betelemi, sambu Yandi me sola ntotila ya mpa na kati ya bana na yandi. 1 Samuele 16 :1  Tangila bana :

1 Mfumumu Nzambi tubaka na Samuele nde :  
« Tii nki ntangu nge ta mona mawa sambu na Saule ? Mono mosi Muntu me katula yandi na kimfumu ya Israele. Baka ndambu

ya mafuta, Mono ke tinda nge na bwala Betelemi na nzo ya muntu mosi zina na yandi Yese, sambu Mono me sola mwana na yandi mosi na kuvanda ntotila.

? Yula bana :

Niveau prescolaire –

- Nzambi songaka Samuele nde muntu ya mpa fweti vanda nki ? Longi to ntotila ? (Ntotila)

Niveau primaire –

- Nzambi zolaka kutinda Samuele wapi ? (Na Betelemi na nzo ya Yese)
- Nani fweti kuma ntotila ? (Mosi ya bana ya Yese)
- Samuele fweti nata nki ti yandi ? (Mafuta)

Niveau secondaire –

- Sambu na nki Nzambi zolaka ve Samuele kuvanda na mawa sambu na Saule ? (Nzambi Yandi mosi me buya yandi kuvanda Ntotila diaka.)  Bana sala bageste :

Bana songa bageste kusonga nde, « Kwenda. »



Bana yimba ti kina :

Samuele, kwenda, kwenda, kwenda Na fami ya Yese. Sambu mosi ya bana na yandi Nge ta tula ntotila.

14.2 Yandi fweti kwenda na Betelemi kupesa nkailu na Nzambi. Yandi fweti binga fami ya Yese. 1 Samuele 16 :2-5  Tangila bana :  
2-3 Samuele yulaka nde : « ...Saule ta wa yo, ebuna yandi ta fwa mono. » Mfumu Nzambi nde : « ...Mono ta songa nge nki nge ta sala. Muntu yina ya mono ta songa

nge, nge ta tula yandi mafuta na zina na Mono, yandi yina muntu ta vanda ntotila. »

4-5 Samuele salaka mambu ya Mfumu

Nzambi songaka yandi na kusala, yandi kwendaka na Betelemi....Yandi bingaka mpi Yese ti bana na yandi.

? Yula bana :

Niveau prescolaire –

- Samuele vandaka na kiese kukwenda na fami ya Yese, to na boma ? (Na boma)

Niveau primaire –

- Na Betlehem, Samuele bingaka nki fami ? (Fami ya Yese)

Niveau secondaire –

- NB : Keti beno bambuka Boazi ya kwelaka Ruti ? Papa Yese yai vandaka ntekolo na yandi. Yandi vandaka mbuta ya ntama ya Mesia Yesu Kristo.

Bana sala bageste :

Bana sala bageste bonso bo ke binga fami ya Yese kukwisa.



Bana yimba ti kina :

Kwisa, fami ya Yese Nzambi me binga beno.

14.3 Kutula muntu ntotila, bo bingaka bana ya Yese ya ordre ya kimbuta, bana 7, kansi Nzambi ndimaka bo ve. 1 Samuele 16 :6-10

Tangila bana :

6 Ntangu Yese ti bana na yandi kwisaka, Samuele monaka Eliabi, ebuna yandi tubaka yandi mosi nde : « Ya kieleka, yandi yai muntu ya Mfumu Nzambi me sola. »

7 Kansi, Mfumu Nzambi tubaka na yandi nde : « Kutala ve nda yina, ti mutindu

yandi kele. Mono me sola yandi ve, sambu Mono ke talaka ve yina ke monika na meso. Muntu ke talaka yina ke monika na meso, kansi Mfumu Nzambi ke talaka ntima. »

8 Ntangu yai, Yese bingaka mwana na yandi Abinadabi, yandi nataka yandi na Samuele.

Kansi Samuele tubaka nde, « Ve, Mfumu Nzambi me sola yandi ve. »

9 Yese nataka Shama. Samuele nde : « Yandi mpi ve. »

10 Mutindu yo yai Yese vandaka kunata bana na yandi nsambwadi na Samuele. Ebuna Samuele vandaka kutuba nde : « Ve, Mfumu Nzambi me sola ata muntu mosi ve na kati na bo. »

? Yula bana :

Niveau prescolaire –

- Bo bingaka bana ya Yese 7 na Samuele. Na kati na bo, Nzambi ndimaka muntu, to Yandi ndimaka bo ve ? (Yandi ndimaka bo ve.)

Niveau primaire –

- Samuele banzaka nde mbuta na bo, Eliabi, yandi ta vanda muntu ya Nzambi me sola. Kansi Nzambi tubaka nde Yandi ke tala ve nitu na nganda, kansi Yandi ke tala nki ? (Ntima ya muntu)

Niveau secondaire –

- Nge banza nde Samuele vandaka kuyindula nki ntangu mambu yai vandaka kusalama ? Yese vandaka kuyindula nki ? Bana ya Yese vandaka kuyindula nki ? [Moniteur, kuwa mabanza ya bana ntangu fioti.]

Bana sala bageste :

Bana 9 sala mwa seneti. Mwana mosi vandaka Samuele, mosi Papa Yese, ti bana 7 ya Yese. Bana kwisa na ntwala ya Samuele mosi-mosi. Samuel tala bo, yandi tuba nde, « Yai ve. Yai ve. Yai ve. » na bo yonso.



Bana yimba ti kina :

Bana 7 kwisaka  
Kansi Nzambi solaka bo ve.

14.4 Yo me bikala kaka leki na kati na bo, Davidi. Yandi vandaka kukeba mameme ya fami, ebuna bo bingaka yandi. 1 Samuele 16 :11-12a

Tangila bana :

11 Na nima, Samuele yulaka Yese nde : « Ketu bana yonso, bo yai ? » Yese nde : « Mwana ya nkaka kele, kansi yandi me kwenda kukeba mameme. » Samuele nde : « Tinda bantu, bo kwenda kusosa yandi....»

12 Yo yina, Yese tindaka bantu na kwenda kusosa Davidi. Yandi vandaka mbwaki, meso ya mbote, ti ilungi ya kitoko.

? Yula bana :

Niveau prescolaire –

- Kaka leki ya fami vandaka kubikala. Zina na yandi nani ? (Davidi)

Niveau primaire –

- Sambu na nki Davidi me kwisa ve mbala ya ntete ? (Yandi vandaka kukeba mameme ya fami.)

Niveau secondaire –

- Kisalu ya Davidi vandaka kusala vandaka mfunu to mfunu ve ? (Mfunu, sambu mameme ya fami vandaka mfunu. Kansi mbala mingi, bantu monaka yo mfunu ve. Bo tindaka leki ya fami kusala yo.)  Bana sala bageste :

Bana sala bageste bonso bo ke binga Davidi. Bo tuba nde, « Davidi, kwisa nswalu. Papa ke binga nge. »



Bana yimba ti kina :

Davidi vandaka leki ya fami Yandi kebaka mameme.

14.5 Nzambi ndimaka Davidi, yo yina Samuele tulaka yandi mafutu kusonga nde Nzambi me sola yandi kuvanda mfumu. Ebuna Mpeve ya Nzambi simbaka Davidi. 1 Samuele 16 :12b-13

Tangila bana :

12b Mfumu Nzambi tubaka na Samuele nde : « Yandi yai. Tula yandi mafuta. »

13 Samuele bakaka mafuta ya olive, yandi tulaka yo na zulu ya ntu ya Davidi na meso ya bampangi na yandi. Na mbala mosi, Mpeve ya Mfumu Nzambi simbaka Davidi...

? Yula bana :

Niveau prescolaire –

- Ntangu Samuele monaka Davidi, Nzambi tubaka nki ? (« Yandi yai. Tula yandi mafuta. »)

Niveau primaire –

- Samuele tulaka Davidi nki kusonga nde Nzambi me sola yandi kuvanda ntotila ? (Mafuta)

Niveau secondaire –

- Nki kidimbu ya nkaka songaka nde Nzambi me sola Davidi kuvanda mfumu ? (Mpeve ya Nzambi simbaka yandi.)

Bana sala bageste :

Bana yonso sala geste bonso bo kele Samuele, ke tula Davidi mafuta.



Bana yimba ti kina :

Davidi ta kuma mfumu !

O yea ! O yea !

>< Kumanisa :

Na kutula ntotila to mfumu ya mpa, Samuele landaka ve mabanza na yandi mosi, kansi ndinga ya Nzambi. Samuele monaka mbuta Eliabi mbote, kansi Nzambi songaka yandi nde Yandi me sola Davidi, leki ya fami. Mabanza ya Nzambi konso ntangu kele mbote kuluta mabanza na beto bantu.

Bubuyai, beto ke mona mabanza ya Nzambi na Bible, Ndinga na Yandi. Nzambi mpi ke twadisa beto ntangu beto samba Yandi.

Verse ya bubu yai :

...Muntu ke talaka/ yina ke monika na meso,/kansu Mfumu Nzambi/ ke talaka ntima./ 1 Samuele 16 :7b

Bana tuba verse mbala zole na nima ya nge, ndambu-ndambu. Na nima, bo tula yo ton ti ritima, ebuna, bo yimba yo ti kina yo mbala 4.  Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

Devoir sambu na bakristo :

Beno bana bakristo, keti beno ke sosa kulanda mabanza ya Nzambi na luzingu na beno ? Devoir mono ke pesa beno mposo yai, yo yai : Konso lumbu, tanga to kuwa ndambu ya Bible, Ndinga ya Nzambi. Kudiyula, nki Nzambi ke songa mono kusala na baverse yai ?

Kubinga bavidu na Yesu :

Kansi mbala ya nkaka, nge me zaba Yesu ntete ve. Zaba nde Mwana ya Nzambi mvu ya mvu, Yandi bikisaka zulu ti kwisaka awa na nsi-ntoto sambu na kugulusa nge. Nzambi zolaka makabu ya menga na

kufuta mfuka ya masumu ya beto bantu. Makabu yina fweti vanda parfait—kukonda kifu. Kaka Yesu vandaka kukonda kifu. Yandi pesaka menga na Yandi na zulu ya kulunsi. Yandi monaka mpasi sambu na nge.

lusadisu, beto kele awa na nima ya ecodim sambu na kusadisa nge.

==NSUKA YA LESO 14

Kana ntangu lunga, longa mikanda ya Bible.  
(Bangindu kele na nsuka ya mukanda yai.)

Kansi Yandi bikalaka ve na lufwa. Yandi telamaka, kele na moyo bubuyai. Kana nge binga zina na Yandi na kieleka yonso, Yandi ta kuwa nge. Kana nge zola bika nzila ya masumu, kulanda Yesu yantika bubuyai, kaka binga zina na Yandi. Kana nge ke na mfunu ya

## Leso 15 Davidi sadilaka Saule na misiki, sonikaka bankunga.

1 Samuele 16 :14-23, Mukanda ya Bankunga (somere) I. Preparatio ya Moniteur—

Kikuma ya lesu :

Beto kumisa Nzambi na misiki ti bankunga, sambu Yandi me lunga kubaka lukumu.

Verse ya bubu yai :

Beno kumisa Nzambi./

Beno yimbila Yandi bankunga !/

Beno kumisa Ntotila na beto./

Beno budila Yandi miziki ! / Bankunga 47 :7

Bankunga ya kwenda nzila mosi ti lesu :

Aleluya !

Alelu, Alelu, Alelu, Aleluya !

Kumisa Nzambi !

Alelu, Alelu, Alelu, Aleluya !

Kumisa Nzambi !

Kumisa Nzambi ! Aleluya !

Kumisa Nzambi ! Aleluya!

Kumisa Nzambi ! Aleluya !

KUMISA NZAMBI !

Bandeke kele yimba

Bandeke kele yimba na

Yandi Bawanzio kumisa

zina n'Yandi Bintuntu

kele songa kitoko na bo

'Buna beto bana na Yandi

Kumisa Yandi mpi!

(To konso nkunga ya ke kumisa Nzambi)

## II. Revisio—

Kulanda devoir ya lesu me luta :

Na mposu me luta, beto lombaka beno bakristo kutanga to kuwa Bible lumbu na lumbu, ebuna kudyula, « Yai ke songa mono kusala nki ? » Nani ta songa beto mambu mosi ya Nzambi songaka beno ntangu nge vandaka kuwa Bible na mposu yai ?

[Moniteur, pesa mwa ntangu fioti sambu na bana kuvutula. Pesa enkurazema na bo ya ke sala devoir.]  Kuyindula diaka baleso me luta:

Na mposu me luta, beto monaka nde Nzambi songaka Samuele kutula Davidi mafuta na zulu ya ntu sambu na kusonga nde yandi ta kuma ntotila ya mpa. Kansi, yandi monikaka ntete ve bonso ntotila na meso ya bantu. Saule me bikala ntotila, ti Davidi me vutuka na kukeba mameme ya tata na yandi, Yese.

## III. Kulonga Leso Yai—

Kuyantika :

Muntu ya vandaka kukeba bambisi vandaka na ntangu mingi. Yandi vandaka kulanda bambisi na yandi. Kana bo me kuma na sika ya kudia matiti, yandi vandaka kaka kuvanda, kutala bo. Davidi zolaka mingi kusadila ntangu na yandi kubula misiki ti kuyimba bankunga.  Developpement (Malongi ya nene ya lesu yai na banti 5) :

15.1 Davidi sonikaka bankunga mingi na kumisa Nzambi. Yo me kuma mukanda ya Bankunga na Bible na beto.  Tangila bana somere yai ya mukanda ya Bankunga :

Davidi sonikaka bankunga mingi kusadila na bisambu. Ntangu yandi vandaka kutala mameme, yandi vandaka kusamba Nzambi ti kumisa Nzambi na nzila ya bankunga.

Yandi sonikaka bankunga mingi na experience na yandi. Mosi ya kitoko ya bantu mingi zaba kele Bankunga 23.

1 Mfumu Nzambi, Nge kele Ngungudi na mono. Mono lenda konda kima ve.

2 Nge ke bikaka mono, mono pema na kisika ya mbote yina ke na matiti ya mubisu. Nge ke nataka mono na lweka ya mwamasa yina kele pima ti madidi.

3 Nge ke pesaka mono ngolo na ntima. Nge ke nataka mono na nzila ya mbote sambu na zina na Nge mosi Mfumu Nzambi.

4 Mfumu, mono lenda wa boma ve, ata mono kwenda na nzila ya mpimpa mingi bonso lufwa, sambu Nge ke nataka mono ti nti na Nge, Nge ke taninaka mono.

Yo ke pesaka mono kikesa.

5 Nge ke sadilaka mono fete na meso ya bambeni na mono. Nge ke yambaka mono bonso muntu ya lukumu.

Nge ke fulusaka dikopa na mono meke.

6 Ee, na luzingu na mono yonso mono ta monaka kaka mambote na Nge. Nge ta zolaka mono tii kuna. Mono ta vandaka kaka ntangu yonso na nzo na nge, Mfumu Nzambi.

Davidi vandaka kukeba mameme ya tata mbote. Yandi bakisaka nde Tata Nzambi vandaka kukeba yandi mpi, bonso dimeme na Yandi. Yo yina, yandi yimbaka sambu na kumisa Ngungudi na yandi.

? Yula bana :

Niveau prescolaire –

- Davidi kumisaka Nzambi nki mutindu ? (Na bankunga, to kuyimba ti budila misiki)

Niveau primaire –

- Davidi monaka nde Nzambi vandaka bonso nki ?

(Ngungudi ya mbote.) (Na bisika ya nkaka, beto tuba Mvungi ya mbote.)

Niveau secondaire –

- Nki ntangu kele mbote sambu na nge kuyindula Nzambi ti kumisa Yandi ? [Moniteur, kuwa mabanza ya bana.]

Bana sala bageste :

Bana sala bageste bonso bo ke bula bima ya misiki mutindu na mutindu—Arpe, guitar, trompette, etc.



Bana yimba ti kina :

Mfumu Nzambi, Nge kele Ngungudi na mono. Mono yimbila Nge. Mono yimbila Nge !

15.2 Ntotila Saule waka mpasi sambu mpeve ya mbi vandaka kuyangisa yandi. 1 Samuele 16 :14-15

Tangila bana :

14 Mpeve ya Nzambi katukaka na Saule, ebuna mpeve ya mbi ...kwisaka kuyangisa yandi.

15 Bantu na yandi ya kisalu kwisaka kutubila yandi nde : « Beto zaba nde...mpeve ya mbi ke yangisa nge.

? Yula bana :

Niveau prescolaire –

- Nki kwisaka kuyangisa Saule—mpeve ya mbote to mpeve ya mbi ? (Mpeve ya mbi)

Niveau primaire –

- Nani katukaka na Saule ? (Mpeve ya Nzambi)
- Mpeve ya mbi ya kwisaka kusala nki ? (Kuyangisa yandi)



Niveau secondaire –

- Sambu na nki nge banza Mpeve ya Nzambi me bika Saule ?  
(Yandi me lemfuka na Nzambi ve.)
- Keti mpeve ya mbi me yangisa nge ? Nki mutindu ?  
[Moniteur, kuwa mbote mvutu ya bana.]

Bana sala bageste :

Bana sala bageste bonso mpeve ya mbi kele kuyangisa bo. [Moniteur keba nde mwana lwala ve.]



Bana yimba ti kina :

Mpeve ya mbi kwisaka  
Kuyangisa Saule. Mawa, o  
mawa !

15.3 Yo yina, bo sosaka muntu kubudila yandi misiki, sambu yandi kuma nie. 1 Samuele 16 :16-17

Tangila bana :

16 Mpidina mfumu, kana nge zola, pesa beto nzila beto sosila nge muntu ya kubula miziki. Kana mpeve ya mbi kusimba nge, muntu yina fweti bula miziki, mpidina ntima na nge kulembama.»

17 Saule tubaka nde : « Mambu ve, beno kwenda kusosila mono muntu mosi kuzaba kubula miziki mbote. Beno kwisa ti yandi. »

? Yula bana :

Niveau prescolaire –

- Bo zolaka kusosa muntu ya zabaka kusala nki --Kulamba madia, to kubula misiki ? (Kubula misiki)

Niveau primaire –

- Nki ntangu beno me mona nde misiki sadisa ntima na beno kumona kiese ?  
[Moniteur, kuwa mabanza ya bana.]

Niveau secondaire –

- Nki mutindu bo monaka misiki ndambu bonso nkisi ?  
(Yo lenda nata calme, katula mpasi na mabanza.)

Bana sala bageste :

Bana bula maboko ti makulu, bo repeter na mpila ya ritima :

Miziki ! Miziki ! Yo lenda sadisa !



Bana yimba ti kina :

Beto sosila nge muntu ya misiki Miziki lenda sadisa nge, mfumu.

15.4 Davidi me zabana bonso mizisien ya ngolo. Yo yina, bo bingaka yandi kubudila misiki sambu na Ntotila Saule. 1 Samuele 16 :18-22

Tangila bana :

18 Muntu ...mosi tubaka nde : « Mono zaba mwana-bakala mosi...Yandi zaba kubula miziki mbote. Yandi kele muntu ya kikesa, soda ya ngolo. Yandi zaba kutuba mbote. Yandi kele mpi kitoko. Mfumu Nzambi mpi kele ti yandi. »

19 Ebuna Saule tindaka bantu ...nde : « Tinda mono mwana na nge Davidi yina ke kebaka mameme. »....

21 Davidi kwisaka na nzo ya Saule, yandi yantikaka kusadila yandi. Saule zolaka yandi mingi....

22 Yandi tindaka ndinga na Yese nde : « Mono ke zola nde Davidi kubikala ti mono, sambu mono ke mona yandi mbote. »

? Yula bana :

Niveau prescolaire –

- Bo bingaka nani, yandi yimbila mfumu ?  
(Davidi)

Niveau primaire –

- Bu Davidi kwisaka, yandi vandaka nki mutindu ti Ntotila Saule ? (Mbote mingi. Saule zolaka yandi.)

Niveau secondaire –

- Sambu na nki Saule zolaka Davidi ?  
(Davidi sadisaka yandi na misiki, ti na bampila mingi.)

Bana sala bageste :

Bana songa luse ya kiese kusonga nde Saule vandaka na kiese na Davidi.



Bana yimba ti kina :

Davidi kwendaka kusadisa Saule.  
Mfumu zolaka Davidi mingi.

15.5 Misika ya Davidi sadisaka Saule mingi.  
1 Samuele 16 : 23

Tangila bana :

23 Konso ntangu, kana mpeve ya mbi kusimba Saule, Davidi fweti bula gitare na yandi, ebuna ntima ya Saule kulembana, yandi kukuma pima, mpeve ya mbi kukatuka na yandi.

? Yula bana :

Niveau prescolaire –

- Miziki ya Davidi salaka nde mpeve ya mbi sala nki ? Kubikala to kukatuka ?  
(Kukatuka)

Niveau primaire –

- Davidi bulaka nki kusala miziki ?

(Gitare na yandi)

Niveau secondaire –

- Sambu na nki nge banza mpeve ya mbi vandaka kukatuka ?  
(Yandi zolaka ve miziki ya Davidi, muntu ya Nzambi, sambu yandi yimbaka kumisa Nzambi.)

Bana sala bageste :

Bana sala bonso bo ke bula gitare ti yimba.



Bana yimba ti kina :

Davidi bulaka miziki, ye  
Mpeve ya mbi kwendaka.

>< Kumanisa :

Miziki kele ngolo. Kana beto sadila yo sambu na kumisa Nzambi, yo lenda belula ntima ya bantu, yo lenda pesa kikesa ti enkuragema, yo lenda basisa ata bampeve ya mbi, sambu bo zola ve kuwa bantu kumisa Nzambi. Beto yonso lenda yimba sambu na kupesa Nzambi lukumu.

Verse ya bubu yai :

Mosi ya bankunga Davidi sonikaka kele yai:

Beno kumisa Nzambi,/  
Beno yimbila Yandi bankunga !/

Beno kumisa Ntotila na beto./  
Beno budila Yandi miziki ! / Bankunga 47 :7

[Moniteur, bana yonso tuba yo fraze na fraze na nima na nge mbala zole. Na nima, pesa fraze mosi na konso ndambu ya bana. Sala mpidina mbala iya.

Bankunga ya kwenda nzila

mosi ti leso :

Bana yimba mosi ya bankunga ya kele

kukwenda nzila mosi ti leso yai.

Devoir sambu na bakristo :

Beno bakristo, devoir mono ke pesa beno mposo yai kele zole. Ntete, tula ngolo kusambila Nzambi na bankunga, ata nge ke tambula, ke sala kisalu, to

nki. Ya zole, tala mukanda ya Bankunga na kati-kati ya Bible. Tanga ndambu na yo, ti mona bampila mingi ya Davidi vandaka kumisa Nzambi.

Kubinga bavidi na Yesu :

Bana, konso mposo beto ke bambukisa beno nde, kana beno me balula ntima ntete ve na Yesu, beno balula ntima kaka. Beto sala yo konso mposo sambu yo kele mfunu mingi. Kimbeni na nge ti Nzambi ta mana na lumbu ya nge ndima Yesu, Mwana na Yandi. Keti nge zola bubuyai kuyantika lulanda Yesu ? Binga zina na Yandi ti songa Yandi. Kana nge balula ntima bubuyai, beto ta vanda na kiese kuzaba yo. Kwisa na nima ya ecodim kusonga beto nde nge me yamba Yandi, to kwisa kusosa lusadisu na mambu yina.

==NSUKA YA LESO 15

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 16 Davidi vandaka na kikesa na kunwana na Goliati.

1 Samuele 17 :1-53 I.

### Preparatio ya Moniteur—

Kikuma ya lesu :

Beto ta wa boma ve na konso mpasi, kansi beto ta tula ntima na Mfumu Nzambi nde Yandi ta twadisa ti nungisa beto.

Verse ya bubu yai :

1 Samuele 17 :45 (bandinga ya Davidi na

Goliati) « ...mono ke kwisa na zina ya Mfumu Nzambi,/ Nzambi-Mpungu,/ Nzambi ya basoda ya Israele,/ ya nge me finga. »

Bankunga ya kwenda nzila mosi ti lesu :

Bu Yesu Kele Na Mono

Bu Yesu kele na mono  
Ngemba kele ! Ngemba kele  
! Ngemba kele !

Bu Yesu kele na mono Ngemba  
kele, na ntima na mono!  
Ngemba I Ngemba ! Ngemba ! Ngemba !

Bu Yesu kele na  
mono, Ngemba kele  
Na ntima na mono!

Landa, Mo' Ta Landa Nge, Mfumu

Landa, mo' ta landa Nge, Mfumu  
Landa lumbu na lumbu  
Mbasi na mono, nge zaba yonso  
Nge ta twadisa mono.

## II. Revisio—

Kulanda devoir ya lesu me luta : Na mposo me luta, beto pesaka beno bakristo devoir kusala mambu zole. Ntete, kumisa Nzambi na bankunga ? Nani bambukaka kusala yo ? Merci ! Ya zole, beto lombaka beno kusosa mukanda ya Bankunga na kati ya Bible, ti kutanga ndambu na yo. Nani monaka mukanda ya Bankunga ? Kiese ! Yo ke monika wapi ? Na kati-kati ya Bible.  Kuyindula diaka baleso me luta:

Na lesu me luta, Ntotila Saule bingaka nani kubudila yand misiki ? (Ee, Davidi)

Nki mambu ya mbote salamaka na misiki ya Davidi?

(Mpeve ya mbi basikaka ti monaka ve mpila kuyangisa Saule.)

## III. Kulonga Leso Yai—

Kuyantika :

Bubuyai beto ta mona nde bantu mingi waka boma—ata basoda ya ngolo. Nki ke pesa nge boma ? [Moniteur, pesa bana mpila kupesa mvutu ya fioti.]

Developpement (Malongi ya nene ya lesu yai na banti 10) :

[ATASIO, Moniteur : Leso yai kele nda, bitini 10. Yo yina, beto ta tanga kaka ndambu ya baverse, ti bana ta sala partisipasio kaka ndambu-ndambu, mpila beto me sonika.)

16.1 Saule ti basoda na yandi vandaka na boma sambu basoda ya Filistia kwisaka kunwanisa bo, ti soda mosi ya NENE losaka challenge nani ta nwanisa yandi. 17 :1-11

Tangila bana ndambu yai :

4 Muntu mosi ya ngolo basikaka na camp ya basoda ya Filistia, zina na yandi Goliati...yandi vandaka nda mingi...

8 Goliati telamaka. Yandi tubaka na bantu ya Israele na ndinga ya ngolo nde : « ...Beno sola muntu mosi, yandi kwisa kunwana ti mono.

9 Kana yandi bedisa mono..., beto ta kuma bambika na beno, kansi, kana mono bedisa yandi ..., beno ta kuma bampika na beto. »

11 Ntangu Saule ti basoda na yandi waka mambu yango, boma simbaka bo ti matekita.

? Yula bana :

Niveau prescolaire –

- Saule ti basoda ya Israele, bo vandaka na boma ya nani ? (Goliati)

Niveau primaire –

- Nki ta salama na basoda ya Israele kana Goliati kununga ? (Bo ta kuma bampika ya bantu ya Filistia.)

Bana sala bageste :

Bana sala geste kusonga boma.



Bana yimba ti kina :

Basoda waka boma mingi

Ya Goliati, muntu ya nda mingi.

16.2 Bilumbu 40 Goliati yangisaka bo, kansi basoda yonso vandaka na boma kunwanina yandi, ata bambuta 3 ya Davidi ya vandaka basoda. 17 :12-16

Tangila bana :

16 Goliati vandaka kwisa konso ntangu na ntwala ya bantu ya Israele, ke finga bo bilumbu makumi iya, mpimpa ti mwini.

? Yula bana :

Niveau prescolaire –

- Goliati vandaka kusakumuna bo, to kufinga bo ? (Kufinga bo)

Niveau primaire –

- Bilumbu ikwa Goliati vandaka kufinga bo ?

(Bilumbu 40)

Bana sala bageste :

Bana sala luse bonso ya muntu ya kele kufinga.



Bana yimba ti kina :

Bilumbu makumi iya

Goliati finga basoda ya

Israele.

16.3 Papa ya Davidi tindaka yandi kunata madia na bambuta na yandi. Ntangu Davidi kwisaka na madia, yandi waka mpila Goliati vandaka kutuba. 17 :17-23  Tangila bana :

23 Ntangu yandi vandaka kusolula ti bo, Goliati basikaka diaka na kufinga bantu ya Israele... Davidi waka yandi.

? Yula bana :

Niveau prescolaire –

- Davidi waka nani kufinga bo ?  
(Goliati)

Niveau primaire –

- Nki bendaka Davidi kuvanda sikamosi ti basoda ya Israele ? (Papa tindaka yandi kunata madia na bambuta na yandi. Bo vandaka basoda.)  Bana sala bageste :

Bana yonso tula maboko na lweka ya makutu. Bo tuba nde, « Wa ! Goliati kele kufinga beto. »



Bana yimba ti kina :

Davidi nataka madia  
Na bampangi n'yandi.  
Yandi waka Goliati  
Kufinga Israele.

16.4 Bo songaka Davidi nde makabu ya mbote fweti kwenda na muntu ya ta fwa Goliati. Kansi Davidi monaka kaka nde Goliati vandaka kufinga basoda ya Nzambi. 17 :24-27

Tangila bana :

24 Ntangu basoda ya Israele monaka Goliati ke kwisa, bo yonso vutukaka kinima-nima na boma yonso.

25 Bo tubanaka bo na bo nde : « tala yandi ke kwisa ! Wa yandi ke finga ! Muntu yina ta fwa yandi, ntotila ta pesa yandi kimvwama mingi...

26 Davidi yulaka basoda ...nde...Ebuna mumpani yai, yandi kele nani na kufinga basoda ya Nzambi ya moyo ? »

? Yula bana :

Niveau prescolaire –

- Basoda vandaka na kiese kumona Goliati, to na boma ?  
(Na boma)

Niveau primaire –

- Mfumu ya Israele zolaka kupesa nki na muntu yina ta fwa Goliati ?  
(Bimvwama mingi)

Niveau secondaire –

- Mvutu ya Davidi na kutuba ya Goliati vandaka nki ?  
(« Mumpani yai, yandi kele nani na kufinga basoda ya Nzambi ya moyo ? »



Bana yimba ti kina :

Mumpani yai ke nani  
Kufinga Nzambi?

16.5 Bampangi ya Davidi monaka kiese ve na kikesa ya leki na bo Davidi. Bo songa Saule kutuba na yandi, kansi yandi mpi kwikilaka nswalu ve nde Davidi lenda sala yo. (Yai kele Somere ya 17 :28-33.)

16.6 Davidi songaka Saule mpila Nzambi me katula yandi na danger ya bambisi ya makasi ntangu yandi vandaka kukeba mameme. Yo yina, Saule pesaka yandi nzila kunwanina Goliati. 17 :34-37

Tangila bana :

36 Mono me fwaka bantambu ti bambisi ya nkaka ya makasi, mono ta sala mutindu mosi na mumpani yai ke finga-finga basoda ya Nzambi ya moyo.

37 Mfumu Nzambi me gulusaka mono na maboko ya bantambu ti bambisi ya nkaka. Yandi ta gulusa mono mpi na diboko ya mu-Filistia yai. »

? Yula bana :

Niveau prescolaire –

- Davidi tubaka nde Nzambi me dezia gulusaka yandi na nki ?

(Na bambisi ya makasi)

Niveau primaire –

- Nki ntangu Nzambi gulusaka yandi na bambisi yai ? (Ntangu yandi vandaka kukeba mameme.)

Niveau secondaire –

- Sambu na nki nge banza bambisi ya makasi kwisaka ntangu yina ? (Bo sosaka kusimba dimeme na yandi.)

Bana sala bageste :

Bana sala ndinga bonso ya mbisi ya makasi. Na nima, bo kubwa na ntoto bonso Davidi me fwaka bo.



Bana yimba ti kina :  
Nzambi me sadisa Davidi  
Na bambisi ya makasi.

16.7 Saule zolaka kusadisa Davidi na binwaninu na yandi, kansi yandi buyaka binwaninu yina ya kilo. Yandi kwendaka kunwana Goliati kaka mpidina. (Yai kele somere ya 17 : 38-39)



Bana yimba ti kina : Davidi  
kwendaka kunwanina Goliati  
Kaka maboko mpamba.

16.8 Davidi bakaka kaka matadi 5 ya fioti ti lanse na yandi. 17 :40-41  Tangila bana :

40 Yandi bakaka nti na yandi, ebuna yandi kwendaka kulokuta tumatadi tanu ya butesi na lweka ya masa. Yandi tulaka yo na kamwa-saki na yandi. Ebuna yandi bakaka lanse na yandi na maboko, yandi kwendaka kukutana ti Goliati.

? Yula bana :

Niveau prescolaire –

- Davidi nataka matadi ikwa sambu na kunwana na Goliati ? (Matadi tanu)

Niveau primaire –

- Yandi bakaka mpi lanse ya diboko. Nani me mona mpila bo ke losa ditadi na lanse ?

[Kana bana me mona yo, bo songa mutindu bo ke losaka ditadi na lanse.]   
Bana sala bageste :

Bana sala geste bonso bo ke sola matadi tanu na ntoto, ke tula yo na mwa-saki na bo.)



Bana yimba ti kina :

Davidi bakaka matadi tanuy Yandi tulaka yo na mwa-saki Ye kwendaka na kunwanisa Goliati.

16 :9 Ntangu Goliati monaka Davidi kaka leki, yandi fingaka yandi. Kansi Davidi na kikesa songaka Goliati nde yandi me kwisa na zina ya Nzambi Mpungu ya yandi me finga.

17 :42-47  Tangila bana :

42 Ntangu Goliati kumaka penepene, yandi talaka Davidi. Yandi monaka nde yandi... leki mpenza... Yandi yantikaka kufinga yandi 43 nde « Keti nge ke mona mono mbwa ? »

Ebuna yandi singaka Davidi na zina ya banzambi na yandi.

44 Yandi tubaka diaka na Davidi nde : « Kwisa awa, nitu na nge mono ke pesa yo na bandeke ti bambisi, bo dia ! »

45 Davidi tubaka nde : « Nge ke kwisa na mono ti mbele, ti dikonga ya nene ti ya fioti, kansi mono, mono ke kwisa na zina ya Mfumu Nzambi, Nzambi-Mpungu, Nzambi ya basoda ya Israele, ya nge me finga.

46 Bubu yai kaka, Mfumu Nzambi ke pesa nge na maboko na mono...

? Yula bana :

Niveau prescolaire –

- Davidi kwendaka kunwanisa Goliati na zina ya nani ? Yandi mosi to Nzambi ? (Nzambi)

Niveau primaire –

- Goliati monaka nde Davidi vandaka kukwisa kunwanisa yandi bonso nki mbisi ? (Bonso mbwa)

Niveau secondaire –

- Davidi tubaka zina ya Nzambi mutindu tatu. Nki yo ti sambu na nki mutindu yina 3 ? (Mfumu Nzambi=Nzambi keke na kiyeka, Nzambi-Mpungu=Nzambi keke na ngolo yonso, ti Nzambi ya basoda ya Israele=Nzambi muntu ke twadisa bo kunwana)
- Bana yimba ti kina :  
Mono ke kwisa na zina ya Mfumu Nzambi Nzambi-Mpungu.  
Mono ke kwisa na zina ya Mfumu Nzambi Nzambi ya basoda ya Israele !

16 :10 Davidi fwaka Goliati na ditadi mosi, ebuna basoda ya nkaka ya Filistia tinaka.

17 :48-53

Tangila bana :

49 Yandi kotisaka diboko na kamwa-saki na yandi. Yandi basisaka kaditadi mosi, yandi tulaka yo na lanse, yandi losaka yo Goliati. Ditadi simbaka Goliati na ilungi. Yo kotaka na kati ya ntu, ebuna yandi bwaka, ilungi na ntoto.

51....Ntangu bantu ya Filistia monaka nde soda na bo ya ngolo me fwa, bo tinaka.

? Yula bana :

Niveau prescolaire –

- Davidi fwaka Goliati na matadi ikwa ? (Kaka ditadi mosi)

Niveau primaire –

- Ditadi yina simbaka Goliati wapi ? (Kaka na ilungi)

Niveau secondaire –

- Na nima Goliati kufwaka, sambu na nki basoda ya nkaka ya Filistia, bo tinaka ? (Bo vandaka na boma.)

Bana sala bageste :

Bana sala geste bonso bo ke lanser ditadi. [Moniteur kebisa bana mutindu yai : Mpila Davidi fwaka Goliati vandaka mbote sambu yo vandaka mvita ti yandi mbeni ya ngolo. Kansi bo losa matadi ve na bwala ti na muntu ya nkaka. Yo lenda kufwa muntu, bonso yo fwaka Goliati.]



Bana yimba ti kina :

David fwaka muntu ya nene  
Ya ditadi mosi ya fioti. O yea !

>< Kumanisa :

Bana, bantu ya Israele vandaka na ntangu ya kingonsa sambu na Goliati, kansi Nzambi nungisaka bo na diboko ya mwana, Davidi, sambu Davidi tulaka ntima na Nzambi.

Beto bakristo, beto mpi mona mambu mingi ya kingonsa na luzingu na beto. Kana beto tula ntima na Nzambi, Yandi ta nungisa beto.

Verse ya bubu yai :

1 Samuele 17 :45 (bandinga ya Davidi na Goliati) « ...mono ke kwisa na zina ya Mfumu Nzambi, / Nzambi-Mpungu, / Nzambi ya basoda ya Israele, / ya nge me finga. »

Bana tula ton ti ritima na verse. Bo yimba yo mbala 6 ti bageste.

Bankunga ya kwenda nzila mosi ti leso :  
Bana yimba nkunga mosi ya nkaka ya ke  
kwenda nzila mosi ti leso.

Devoir sambu na bakristo :  
Devoir mono ke pesa beno bakristo na mposo  
yai kele kutula ntima konso lumbu na Nzambi,  
ata na ntangu ya boma.

Kubinga bavidu na Yesu :  
Kansi, kana nge me balula ntima na Yesu, me  
tula ntima na Yandi ntete ve, mbote nge vanda  
na boma. Nge kele na makambu ti Nzambi  
sambu nge me salaka masumu ya me fwaka

kinduku na nge ti Yandi. Nzila kuvutuka na  
kinduku ti Nzambi kele kaka Yesu Kristo.  
Yandi fwaka ti telamaka na lufwa sambu na  
nge. Keti nge ta yamba Yandi bubuyai na  
maboko zole? Kana nge zola kusamba ti beto  
sambu nge yamba Yesu, kaka bikala na nima ya  
ecodim. Beto ta sadisa nge.

==NSUKA YA LESO 16

Kana ntangu lunga,  Longa  
mikanda ya Bible :  
(Bangindu kele na nsuka ya mukanda yai.)



## Leso 17 Davidi salaka kinduku na Yonatani.

1 Samuele 17 :58--18 :5 I.

### Preparatio ya Moniteur—

Kikuma ya lesu :

(Lesu 17 ti 18) Beto vanda mbote ti bantu.  
Beto ndima ve kimpala to kuyuma ntima  
kusimba ntima na beto, sambu beto bakisa nde,  
kimpala ke lunga na beto bantu ve.

Verse ya bubu yai :

Kuyuma ntima ve/ na nzo ya ngani./ Kuyuma  
ntima ve na.../konso kima ya ngani./ Kubasika  
20 : 17 [Moniteur, tala nde yai kele nsiku 10 na  
kati ya Bansiku 10 ya nene ya Nzambi.]

Bankunga ya kwenda nzila mosi ti lesu :

O Keba Maboko (Ntima)  
O Keba ntima nki nge zola (Kimpala ve !)  
O Keba ntima nki nge zola (Kimpala ve !)  
Sambu Tata na zulu  
Yandi kele zaba yo  
O Keba ntima nki nge zola (Kimpala ve !)

O Luvunu Yambula (O Kimpala)

O Kimpala (O Kimpala)

O Kimpala, Yambula ! (O Kimpala) (reperer)

Bansiku Kumi ya Kulanda

Ya kumi, yuma ntima ve

Na bima ya mpangi (3x)

Nsiku ya kumi kulanda !

### II. Revisio—

Kulanda devoir ya lesu me luta :

Na mposo me luta, beto lombaka beno  
bakristo kutula ntima na Nzambi konso  
lumbu, ata na ntangu ya boma. Nani  
monaka kima mosi ya boma na mposo me  
luta, kansi nge tulaka Nzambi ntima ?

[Moniteur, pesa bana mwa-ntangu kutuba  
mambu ya bo me mona.]

Kuyindula diaka baleso me luta:

Beto baka mwa-ntangu fioti kusala nsaka  
sambu na Davidi. Bana vanda bandambu  
zole. Konso ndambu tuba mambu mosi bo  
zaba sambu na Davidi. Konso mambu ya  
kele kieleka, bo baka 100 points. Kana  
ndambu mosi lenda tuba kima diaka ve,  
nsaka me mana ti ndambu ya kele na  
bapoint ya kuluta kele champion. Kima  
mosi ya mfunu kuzaba kele nde profete  
Samuele me songa dezia nde Davidi ta  
kuma mfumu to ntotila.

### III. Kulonga Leso Yai—

Kuyantika :

Mbala mingi, kana ntotila to mfumu kufwa,  
nani ta landa yandi na kimfumu ? (Mbala  
mingi mwana na yandi. Kimfumu ta landa  
kaka na dikanda ya mfumu.) Ketu nge banza  
nde mfumu ta zola kimfumu kulanda na  
dikanda na yandi ? (Ee, yandi ta zola yo  
mingi.)

Kansi profete ya Nzambi me songa nde Nzambi  
vandaka na kiese ve na Ntotila Saule. Yandi  
lemfukilaka Nzambi ve. Yo yina, yandi me  
songa Saule nde kimfumu na yandi ta suka.  
Dezia, yandi me tula mafuta na ntu ya muntu ya  
Nzambi tubaka ta kuma ntotila ya mpa. Zina  
ya muntu yina, Davidi. Na mposo me luta, beto  
monaka mpila nde Davidi fwaka muntu ya  
nene, ya makasi Goliati, ntangu basoda yonso  
ya armee ya mvimba vandaka na boma  
kunwana ti yandi. Ntangu yai, Davidi me kuma  
ero ya nene ya Israele.

Developpement (Malongi ya nene ya lesu  
yai na banti 4) :

17.1 Yonatani, mwana ya Saule, waka rapport ya Davidi pesaka na Ntotila, ebuna yandi zolaka Davidi mingi. 1 Samuele 17 :58, 18 :1.

Tangila bana :

17 :58 Saule yulaka nde : « Nge kele mwana ya nani ? » Davidi nde : « Mfumu, mono kele mwana ya muntu na nge Yese na bwala Betelemi. »

18 :1 Ntangu Saule me manisa kusolula na Davidi imene, kilumbu yo yina yandi songaka yandi na kubikala na nzo na yandi. Yandi zolaka ve nde Davidi kuvutuka na nzo ya tata na yandi.

? Yula bana :

Niveau prescolaire –

- Mfumu Saule zolaka nde Davidi bikala wapi ? Na nganda, to na nzo na yandi ? (Na nzo na yandi, mfumu)


Niveau primaire –

- Saule solulaka ti Davidi nki ? Bambuka mambu ya salamaka na lesu me luta. (Mpila yandi fwaka Goliati)

Niveau secondaire –

- Yai ke monika bonso Saule kele nki mutindu ti Davidi ? (Mbote ti kiese)

Bana sala bageste :

Bana sala geste bonso bo ke yamba muntu na nzo na bo. Bo tuba nde, « Davidi, yambi ! »  Bana yimba ti kina : Saule yambaka Davidi Na nzo na yandi.

17.2 Saule bakaka Davidi kuzinga na nzo na yandi. Yonatani waka kimpala ve. 1 Samuele 18 :2

Tangila bana :

2 Yonatani mwana ya Saule yantikaka kuzola Davidi mingi. Ntima na yandi kangamaka na Davidi. Yandi zolaka yandi mosi yandi mosi.

? Yula bana :

Niveau prescolaire –

- Mwana ya Saule Yonatani, yandi vandaka nki mutindu ti Davidi ? (Mbote. Yandi zolaka Davidi mingi.) Niveau primaire –  Yonatani zolaka Davidi bonso nani ?

(Bonso yandi mosi)  Na kimuntu, na nima ya Saule kimfumu fweti vanda ya nani ? (Ya Yonatani, mwana ya mfumu)

- Yonatani zabaka nde Nzambi me sola yandi ve kulanda kimfumu, kansi Davidi. Ata mpila yina, yandi vandaka nki mutindu ti Davidi ? Kimpala, to kinduku ? (Kinduku ya ngolo, kimpala ve. Yonatani yumaka ntima ve sambu na kiyeka ya kimfumu ya Davidi fweti baka.) Niveau secondaire –

- Bantu ya nkaka ya zola buya malongi ya Bible, bo tuba nde kinduku to luzolo ya Yonatani ti Davidi, yo vandaka na nzila ya mbi. Kansi na verse yai, nki ke songa nde yo vandaka kinduku ya kinzambi ? (Yonatani zolaka Davidi bonso yandi mosi. Yai kele mpila Yesu songaka beto kuzola bantu ya nkaka.)  Bana sala bageste : Bana songa diboko mosi, bo tuba nde, « Yonatani ». Bo songa diboko ya nkaka, bo tuba nde, « Davidi ». bo vukisa maboko, bo tuba nde, « Kinduku ya ngolo. Kinduku ya kinzambi. »



Bana yimba ti kina :

Yonatani ti Davidi Kinduku ya ngolo. Kimpala ve, kimpala ve, Kinduku ya ngolo.

17.3 Davidi salaka kuwakana ya ngolo ya kinduku ti Yonatani. Yandi pesaka Davidi makabu bonso kidimbu ya kuwakana yina. 1 Samuele 18 :3-4

Tangila bana :

3 Yonatani zengaka nde yandi fweti vanda kaka nduku ya Davidi tii kuna, sambu yandi vandaka kuzola yandi mingi mpenza.

4 Yandi katulaka kazaka ya yandi lwataka, yandi pesaka yo Davidi. Yandi pesaka yandi mpi bilele na yandi ya bitumba, ti mbele, ti bunduki ya tolotolo, ti mukaba.

? Yula bana :

Niveau prescolaire –

- Keti Yonatani pesaka Davidi makabu, to yandi pesaka yandi kima ve ? (Yandi pesaka Davidi makabu mingi.)

Niveau primaire –

- Nani lenda songa beto kima mosi Yonatani pesaka Davidi makabu bonso kidimbu ya kinduku na bo ? (Mosi ya bima yai—kazaka, bilele ya bitumba, mbele, bunduki ya tolotolo, mukaba.)
- Yonatani nde, kinduku na bo ta vanda ntangu ikwa ? (Tii kuna)

Niveau secondaire –

- Yindula kinduku ya Yonatani ti Davidi. Sambu na nki yo kele extra ? (Sambu Davidi ta yinga Saule kuvanda mfumu na sika ya Yonatani, kansi Yonatani vandaka na kimpala ve, kansi kaka na luzolo.)

Bana sala bageste :

Bana sala geste ya ke songa kinduku ya ngolo.



Bana yimba ti kina :

Yonatani waka kimpala ve,  
Matondo na Nzambi ! Kinduku ya  
ngolo, ya kinzambi, Matondo na  
Nzambi !

17.4 David pesaka bantu kiese ti bakaka kiyeka. Ata na Yonatani, kimpala vandaka ve. 1 Samuele 18 :5

Tangila bana :

5 Bisika yonso ya Saule vandaka kutinda Davidi, Davidi vandaka kusala mambu yonso mbote. Ebuna Saule tulaka yandi mfumu ya basoda na yandi. Bantu yonso ya Saule monaka yo kiese, ata basoda na yandi.

? Yula bana :

Niveau prescolaire –

- Bantu monaka Davidi mbi to kiese ? (Kiese)

Niveau primaire –

- Nani monaka Davidi mbote ? (Saule, basoda na yandi, bantu yonso)

Niveau secondaire –

- Saule pesaka Davidi nki kiyeka ? (Kuvanda mfumu ya basoda na yandi)

Bana sala bageste :

Konso ntangu nge tuba, « Davidi ! », bana sala geste ya ke songa kiese. Bo tuba nde, « Kiese mingi ! » Nge tuba « Davidi ! » mbala tatu.



Bana yimba ti kina :

Bantu yonso kiese Sambu na Davidi.

Yonatani mpi kiese Sambu na Davidi.

>< Kumanisa :

Na histoire yai, beto mona mambu ya yituka. Na kimuntu Yonatani fweti vanda kimpala mingi sambu na Davidi. Na kimuntu, yandi fweti yuma ntima sambu na kiyeka ya kimfumu ya Davidi fweti baka. Na kimuntu yandi fweti mona nde kimfumu kele ya yandi, ya Davidi ve. Na kimuntu yandi fweti menga Davidi.

Kansi Yonatani yumaka ntima ve. Yandi vandaka na ntima mosi ya mbote, ya kinzambi. Yandi bakaka Davidi ve na kimbeni, kansi yandi zolaka Davidi mingi. Bo kumaka banduku ya ngolo bilumbu na bo yonso tii kuna.

O, kiese mingi kana kimpala kuyala beto ve !

Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika 20 : 17 [Moniteur, tala nde yai kele nsiku 10 na kati ya Bansiku 10 ya nene ya Nzambi.] Yula bana :

Kimpala ke nata nki mambu ya mbi ?  
(Nku, kufwa bantu)

Bankunga ya kwenda nzila

mosi ti lesu :

Bana yimba mosi ya bankunga ya ke kwenda nzila mosi ti lesu yai.

Devoir sambu na bakristo :

Devoir mono ke pesa beno bakristo kele nde beno bikisa kimpala yonso. Beno lomba Nzambi lusadisu na mambu yina. [Moniteur, twadisa bana na lombilu nde bo bakristo vanda na ngolo kubikisa mambu yonso ya kimpala, kuvanda mbote ti bantu yonso.]

Kubinga bavidi na Yesu :

Yonatani ti Davidi vandaka na kinduku ya ngolo. Kiese mingi. Kansi, kana nge me tula ntima na Yesu ve, zaba nde, nge ke konda

kinduku mosi ya nene. Nge ke konda kinduku ti Nzambi. Kinduku na beto ti yandi, yo me zengana sambu na masumu, sambu na mambu ya mbi ya beto me sala ya me pesa Yandi kiese ve. Kansi Nzambi zola beto bantu ya masumu. Yandi tindaka Mwana na Yandi Yesu Kristo sambu na kuvutula kinduku na beto ti Yandi.

Yesu monaka mpasi, Yandi fwaka na zulu ya kulunsi bonso makabu ya menga, sambu na kukatula masumu na beto. Na ntangu ya beto balula ntima, beto zenga kubika masumu, kundima yina ya Yandi salaka sambu na beto, na minute yina, beto kuma balandi ya Yesu. Yandi vutula beto na kinduku na Yandi.

Yesu fwaka, kansi Yandi mpi telamaka na lufwa. Yandi kele na moyo bubuyai, yo yina Yandi lenda kuwa ntangu nge binga zina na Yandi. Yandi ta gulusa nge bubuyai kana nge tula ntima na Yandi. Kana nge zola binga Yandi bubuyai, bikala na nima ya ecodim na sika yai awa [moniteur, songa wapi], sambu beto sadisa nge.

==NSUKA YA LESO 17  Kana ntangu lunga, longa mikanda ya Bible :  
(Bangindu kele na nsuka ya mukanda yai.)

## Leso 18 Saule zolaka kufwa Davidi na kimpala.

1 Samuele 18 :6—30 I.

### Preparatio ya Moniteur—

Kikuma ya lesu :

Beto yuma ntima ve sambu na mambu ya mbote ya bantu ya nkaka ke sala. Beto vanda na kiese na sukse ya bantu ya nkaka.

Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika

20 : 17 [Moniteur, tala nde yai kele nsiku 10 na kati ya Bansiku 10 ya nene ya Nzambi.]

Bankunga ya kwenda nzila mosi ti leso :  
[Bana lenda yimba bankunga yai diaka :]

O Keba Maboko (Ntima)

O Keba ntima nki nge zola (Kimpala ve !)

O Keba ntima nki nge zola (Kimpala ve !)

Sambu Tata na zulu

Yandi kele zaba yo

O Keba ntima nki nge zola (Kimpala ve !)

O Luvunu Yambula (O Kimpala)

O Kimpala (O Kimpala)

O Kimpala, Yambula ! (O Kimpala) (repeteer)

Bansiku Kumi ya Kulanda

Ya kumi, yuma ntima ve

Na bima ya mpangi (3x)

Nsiku ya kumi kulanda !

## II. Revisio—

Kulanda devoir ya leso me luta : Na leso me luta, beno pesaka beno bakristo devoir kubika kimpala, ti kulomba lusadisya ya Nzambi na mambu yina. Nani lombaka lusadisya ya Nzambi na mambu ya kimpala na mposo yai me luta ?

Kuyindula diaka baleso me luta:

Beto me mona nde nani vandaka mfumu to ntotila ya ntete ya Israele ?  
(Saule)

Mwana na yandi nani ?  
(Yonatani)

Nzambi tindaka profete Samuele kusonga Saule nde kimfumu na yandi ta landa ve tii kuna. Sambu na nki? (Saule me lemfuka na Nzambi ve.)

Na nima, Samuele tulaka mafuta na zulu ya nani kusonga nki?

(Nde yandi ta kuma mfumu to ntotila ya Israele)

Nani me sala kinduku ya ngolo ti ya mbote?  
(Yonatani ti Davidi)

## III. Kulonga Leso Yai—

Kuyantika :

Keti nge me vanda na nduku ya vandaka mbote ti nge, kansi lumbu mosi, nge monaka nde mambu me change. Nge zabaka ve sambu na nki, kansi nge bakisaka nde yandi vandaka mbote ti nge diaka ve.

Na leso me luta, beto monaka nde Davidi vandaka mbote ti Saule. Yandi vandaka kupusa ve kukuma mfumu nswalu, kansi yandi vandaka kusadila Saule na mpila mosi ya kwikama. Yonso vandaka ngemba ti kiese.

Kansi kaka mbala mosi, yo balulaka mutindu ya nkaka.

Developpement (Malongi ya nene ya leso yai na banti 5) :

18.1 Kimpala kotaka na Saule sambu na bampila bankento kumisaka Davidi na bankunga. 1 Samuele 18 :6-9

Tangila bana :

6 Ntangu basoda kwisaka kuvutuka ...bankento ...ya Israele kwisaka kuyamba ntotila Saule. Bo vandaka kuyimba bankunga ya kiese, bo vandaka kubula bangone ti bagitare, ti kukina mpi.

7 Bankento vandaka kuyimba na kiese yonso nde : « Saule me fwa bantu mile, kansi Davidi me fwa bantu mile kumi. »

8 Saule waka makasi mingi, mambu yina pesaka yandi kiese ve. ...

9 Katuka kilumbu yina, Saule vandaka kutala Davidi na disu ya mbi.

? Yula bana :

Niveau prescolaire –

- Mpila ya bankento yimbaka—keti yo pesaka Mfumu Saule kiese to kiese ve ?  
(Kiese ve)

Niveau primaire –

- Nki vandaka probleme na mpila bankento yimbaka ? (Bo yimbaka nde Davidi me fwa bambeni kuluta mfumu na bo, Saule.)

Niveau secondaire –

- Saule yumaka ntima ve sambu na nki kima ya Davidi vandaka na yo ?  
(Lukumu to Kumisa ya bankento)

Bana sala bageste :

Sola mwana mosi kuvanda Mfumu Saule. Yandi kwisa na ntwala. Kabisa bana ya nkaka na bandambu zole. Mosi boka ntete nde, « Saule me fwa bantu mile ! » Saule mweka, yandi bula maboko na kiese. Na nima, ndambu ya nkaka ya bana boka nde, « Davidi me fwa bantu mile kumi ! » Saule songa luse ti bageste bonso ya makasi.



Bana yimba ti kina :

Mfumu Saule yumaka ntima  
Na lukumu ya Davidi. Yo  
bendaka yandi nswalu Na  
makasi mingi.

11 Yandi tubaka yandi mosi na nsi ya ntima nde : « Mono ta bula yandi dikonga ti kibaka. » Yandi losaka yandi dikonga mbala zole, kansi Davidi tinaka yo.

? Yula bana :

Niveau prescolaire –

- Na nima Saule me yuma ntima, nki kotaka na yandi—Mpeve ya mbote to mpeve ya mbi ?  
(Mpeve ya mbi)

Niveau primaire –

- Mpeve ya mbi salaka nki na kutuba ya Saule ?  
(Yandi vandaka kutuba-tuba bonso muntu ya kilau.)
- Yo bendaka yandi kusala nki mambu ya mbi ?  
(Yandi sosa kufwa Davidi.)

Niveau secondaire –

- Sambu na nki nge banza miziki ya Davidi sadisaka Saule diaka ve ? [Moniteur, kuwa mabanza ya bana.] (Mpeve ya mbi me kota na yandi, mpi kana yandi tala Davidi, yandi ke tala muntu ya yandi me yuma ntima. )

Bana sala bageste :

Kabisa bana na bandambu zole. Mosi sala bonso Saule ti mosi sala bageste bonso Davidi.



Bana yimba ti kina :

Kuyuma ntima me benda makasi Nzala  
na kufwa Davidi !  
Saule losilaka yandi dikonga.  
O, mbi ya nene !

18.3 Boma ya Saule kaka yelaka, sambu ata yandi katulaka Davidi na nzo, bantu vandaka kuzola yandi mingi. 1 Samuele 18 :12-16

Tangila bana :

18.2 Mpeve ya mbi kotaka na Saule, ebuna yandi mekaka kufwa Davidi mbala zole.

1 Samuele 18 :10-11

Tangila bana :

10 Kilumbu landaka... mpeve ya mbi, yo simbaka yandi, kuna na nzo na yandi, yandi yantikaka kutuba-tuba bonso muntu ya maladi ya kilau. Ebuna Davidi vandaka kubudila yandi gitare, mutindu yandi vandaka kusala ntete. Saule vandaka na dikonga na maboko.

12 Saule vandaka kutina Davidi boma, sambu Mfumu Nzambi vandaka kaka ti Davidi, kansi ti Saule diaka ve.

13 Yo yina, Saule katulaka yandi penepene na yandi...Davidi vandaka kunata bantu na yandi na bitumba ....

15 Saule, ntangu yandi vandaka kumona nde Davidi ke nunga na bitumba, yandi waka yandi diaka boma mingi.

16 Kansi bantu yonso na Israele ti na Yuda vandaka kuzola Davidi...

? Yula bana :

Niveau prescolaire –

- Saule vandaka kutina Davidi boma, to kumona yandi kiese ?  
(Kutina yandi boma)

Niveau primaire –

- Nki vandaka kupesa Saule makasi ya kuluta ?  
(Davidi vandaka kununga na mvita.)

Niveau secondaire –

- Saule wilaka Davidi kimpala, kansi nani vandaka kuzola yandi ?  
(Bantu yonso ya Israele)

Bana sala bageste :

Bana songa bageste ya kimpala ti makasi ya songa nde bo zola muntu ve.



Bana yimba ti kina :

Saule waka makasi Diaka ya kuluta. Kuyuma ntima kaka, Kimpala na Davidi !

18.4 Saule yidikaka lukanu ya mbi sambu Davidi kufwa na mvita. 1 Samuele 18 :17-25  Tangila bana :

17 Ntangu yai, Saule tubaka na Davidi nde :

« Mwana na mono ...Merabi, yandi yai. Mono ke pesa nge yandi, nge kwela yandi. Kansi kima mosi, nge fweti ...nwana bitumba...

» (Saule yindulaka nde :

« Mbote Davidi kufwa na maboko ya bantu ya Filistia, kansi na mono ve. »)...

19 Kansi ntangu bo zolaka kupesa Merabi na Davidi, Adriele, muntu ya bwala Mehola kwelaka yandi.

20-21 Kansi Mikale mwana ya nkaka ya Saule kumaka kuzola Davidi, ebuna ntangu Saule waka yo, yandi...tubaka yandi mosi nde : «...Yandi ta vanda bonso mutambu na Davidi, ebuna bo ta fwa yandi na bantu ya Filistia....

25 ebuna Saule songaka (bantu) na kwenda kutuba na Davidi nde : « Ntotila ke lomba mbongo ya makwela ve, yandi ke zola kaka (kitini ya nitu ya ta songa nde nge me fwa) basoda ya Filistia... » (Yai mayele ya Saule salaka na mpila nde Davidi kubwa na maboko ya bantu ya Filistia.)

? Yula bana :

Niveau prescolaire –

- Keti Mfumu Saule vandaka na mabanza ya mbote sambu na Davidi, to mabanza ya mbi ? (Mabanza ya mbi)

Niveau primaire –

- Saule lombaka Davidi mbongo ya makwela ve, kansi kidimbu kusonga nde yandi me fwa basoda ya Filistia. Nki vandaka lukanu na nsi ya ntima na yandi ?  
(Nde Bantu ya Filistia ta fwa Davidi)

Niveau secondaire –

- Ntangu yai, Saule ke yidika lukanu na kufwa Davidi. Kansi mbi na yandi yantikaka na nki disumu ? (Kuyuma ntima sambu bantu kumisaka Davidi kuluta yandi. Kimpala.)  Bana sala bageste :

Bana songa geste ya ke songa nde bo kele kuyindula na ntu lukanu mosi ya mbi.



Bana yimba ti kina :

Kuyuma ntima me buta  
Lukanu ya lufwa.

18.5 Davidi kufwaka ve na lukanu yina, ebuna kimbeni ya Saule yelaka kaka.  
1 Samuele 18 :27-29

Tangila bana :

27 Davidi basikaka ti bantu na yandi. Yandi fwaka basoda nkama zole ya Filistia. Yandi bakaka (kidimbu ya me songa nde yandi me fwa bo). Yandi kwisaka kunata yo na ntotila, ...sambu yandi kuma bukilo na yandi. Ebuna Saule pesaka yandi mwana na yandi Mikale na kukwela.

28 Saule monaka nde ya kieleka, Mfumu Nzambi kele na Davidi,...mpi nde mwana na yandi Mikale ke zola Davidi.

29 Yo yina, yandi vandaka kutina Davidi boma mingi diaka. Luzingu na yandi ya mvimba, yandi vandaka mbeni na yandi.

? Yula bana :

Niveau prescolaire –

- Keti kimbeni na kati ya Davidi ti Saule vandaka kumana ?  
(Ikele ve. )

Niveau primaire –

- Sambu na nki lukanu ya Saule na kufwa Davidi salamaka ve ?  
(Bantu ya Filistia fwaka Davidi ve, kansi yandi fwaka bo na mvita.)

Niveau secondaire –

- Nki pesaka Saule mpasi na ntima ya kuluta ?  
(Mwana na yandi Mikale zolaka Davidi.)

Bana sala bageste :

Bana songa bageste mingi kusonga mpila Saule monaka Davidi. (Kimpala, boma, makasi, nzal ya kufwa yandi, etc.)



Bana yimba ti kina :

Kuyuma ntima butaka Kimpala ya ngolo.

Kuyuma ntima butaka Boma ti makasi.

Kuyuma ntima butaka Lukunu ya mbi.

Kuyuma ntima butaka Nzala ya kufwa muntu.

>< Kumanisa :

Beto me mona nde Davidi salaka Saule kaka mbote, kansi Saule me pesa nzila nde yuma ntima kukota. Yo me nata mpeve ya mbi kuyangisa yandi. Yo me nata boma, ti makasi, ti masumu. Ntangu yai, Saule me kuma muntu ya zolaka kufwa David. Yandi tulaka ngolo na kufwa yandi, kansi Nzambi kangaka yandi nzila. O, kuyuma ntima kele kima mosi ya mbi.

Bingana 4:23 ke songa beto nde, “Keba mbotembote mambu ya nge ke yindulaka na nsi ya ntima...” Keti nge kele kumona mbote mambu ya kele na ntima na nge?

Verse ya bubu yai :

Kuyuma ntima ve/ na nzo ya ngani./ Kuyuma ntima ve na.../konso kima ya ngani./ Kubasika 20 : 17 [Moniteur, tala nde yai kele nsiku 10 na kati ya Bansiku 10 ya nene ya Nzambi.]

Bana yimba verse yai diaka mbala 4. Na nima, bankento tuba yo mbala mosi ti babakala mbala mosi. Na nsuka, yula nani lenda tuba yo, yandi mosi.

Bankunga ya kwenda nzila mosi ti lesa :

Bana yimba diaka nkunga mosi ya ke kwenda nzila mosi ti lesa yai.



Devoir sambu na bakristo :

Devoir mono ke pesa beno bakristo, yo yai: kukeba mbote-mbote na mposi yai mambu yonso ya nge pesa nzila kukota na ntima na nge. Tala kima mosi ya fioti bonso kuyuma ntima, yo lenda buta bambuma ya ta sadisa nge ve, ya ta pesa Nzambi kiese mpi ve. Keba ntima na mposi yai !

Kubinga bavidi na Yesu :

Keti nge zaba mbote nde Yesu kele Mvulusi na nge ? Ketu nge me balula ntima, me yamba Yandi na ntima na nge ?

Beto yonso kele na probleme ya ntima ya mbi. Bible ke songa nde, "...ntima ya muntu, yo me fulukaka na luvunu, yo ke na maladi mingi. Mpila ya kubelula yo kele ve" (Yeremia 17:9).

Kana Mpeve ya Nzambi me songa nge nde ntima na nge kele na probleme, zaba nde, ata muntu lenda belula yo ve, kansi Yesu Kristo Mwana ya Nzambi lenda sala yo. Yandi futaka menga ya kitoko, ya ntalu na Yandi sambu na kusumba mpulusu ya nge.

Kana nge ta binga zina na Yandi sesepi yai ti lombu Yandi kugulusa nge, Yandi ta vanda nswalu kubelula ntima na nge. Nge ta kuma muntu ya mpa mu Yesu. Yandi ta pesa nge ntima ya zola kulanda Yandi. Kana nge ke na mfunu ya lusadisu na mambu yai, kaka bikala na nima ya ecodim. Beto ta kwisa kusadisa nge.

==NSUKA YA LESO 18

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 19 Yonatani sadisaka nduku na yandi Davidi.

1 Samuele 19 :1-24, 20:1-42

### I. Preparatio ya Moniteur—

Kikuma ya lesu :

Beto landa kinduku, beto pesa nzila ve na kimpala, sambu beto zaba nde kinduku ke tunga luzingu ya mbote, kansi kimpala ke bebisa yo.

Verse ya bubu yai :

Banduku ke zolanaka/ konso ntangu,  
Bampangi ke sadisanaka/ na ntangu ya mpasi.  
Bingana 17 :17

Bankunga ya kwenda nzila mosi ti lesu :

O Keba Maboko (Ntima)  
O Keba ntima nki nge zola (Kimpala ve !)  
O Keba ntima nki nge zola (Kimpala ve !)  
Sambu Tata na zulu  
Yandi kele zaba yo  
O Keba ntima nki nge zola (Kimpala ve !)

O Luvunu Yambula (O Kimpala)  
O Kimpala (O Kimpala)  
O Kimpala, Yambula ! (O Kimpala) (repeter)  
Beto Zolana

Na dikanda ya Nzambi mambu me luta nene,  
zola ! Zola me luta nene ! (repeter)

Bana ya Nzambi, beto zolana  
Zola me luta nene (Beto zolana)  
Bana ya Nzambi, beto zolana  
Zola me luta nene !

### II. Revisio—

Kulanda devoir ya lesu me luta : Na mposo me luta, beto lombaka beno bakristo kukeba mbote-mbote ntima na beno, sambu mambu yonso ya mbi bonso kuyuma ntima ti kimpala ti kimbeni, yo ke yantika na ntima.

Nani tulaka ngolo kusala yo ? Mersi na beno ya ke salaka badevoir.

Kuyindula diaka baleso me luta :

Beto me mona nde Mfumu Saule kebaka ve ntima na yandi. Yandi yumaka ntima sambu lukumu ya bantu pesaka Davidi, yandi monaka nde yo fweti kuma na yandi. Yandi bakaka Davidi na kimbeni ti sosaka kufwa yandi mutindu na mutindu.

### III. Kulonga Leso Yai—

Kuyantika :

Kansi beno ta bambuka mpi nde mwana ya Saule zina ya Yonatani, yandi salaka kinduku ya ngolo ti Davidi. Nki ta salama ntangu yai, sambu tata zola kufwa Davidi, kansi mwana kele nduku na yandi ?

Developpement (Malongi ya nene ya lesu yai na banti ) : [Moniteur, lesu yai kele nda, bakapu 2. Yo yina, beto me tuba bima ya nkaka na somere ti beto me katula bima ya nkaka.]

19.1 Na kapu 19, beto mona nde ntete, Yonatani lombaka Saule kusonga Davidi mawa, ti Saule ndimaka. Kansi na nima, yandi balulaka. Somere, 1 Samuele 19

Tangila bana somere yai :

Mbala mosi, Davidi vandaka kubudila misiki. Mpeve ya mbi vutukaka kusimba Saule. Yandi monaka nzala na kufwa Davidi, yo yina, yandi losilaka yandi lanse. Kansi Davidi basikaka. Na kapu yai, mbala 3 Saule mekaka kufwa David.

? Yula bana :

Niveau prescolaire –

- Na kapu yai kaka, mbala ikwa Saule mekaka kufwa Davidi ?  
(Mbala 3)

Niveau primaire –

- Nani lombaka Saule kusonga Davidi mawa ?  
(Yonatani)

Niveau secondaire –

- Nki bendaka Saule na kufwa Davidi ?  
(Mpeve ya mbi. Yo kotaka sambu yandi yumaka ntima ti waka Davidi kimpala.)

Bana sala bageste :

Bana songa misapi tatu. Bo tuba nde,  
« Mbala 3 diaka, Saule mekaka kufwa Davidi. »



Bana yimba ti kina :

Saule zolaka kaka kufwa Davidi.  
Kimpala me sala yandi.

19.2 Davidi kwendaka kubokuta na nduku na yandi Yonatani. Bo solulaka nki kusala, ti Yonatani ndimaka kusonga Davidi kana Saule vandaka na lukanu ya mbi na zulu na yandi. Bo salaka kuwakana ya kinduku ya fami na bo tii kuna. 1 Samuele 20 :1-17  Tangila bana :

16 Ntangu yai, Yonatani wakanaka ti Davidi ti fami na yandi nde bo ta vandaka kaka banduku tii kuna. Yandi tubaka nde : « Mfumu Nzambi kupesa nge ndola kana nge land ve kuwakana yai. »

17 Yandi songaka diaka Davidi na kuzenga Nzambi nde yandi ke zolaka yandi, sambu yandi mosi Yonatani vandaka kuzola Davidi bonso yandi mosi.

? Yula bana :

Niveau prescolaire –

- Nani zolaka Davidi mingi ?  
(Yonatani, mwana ya Saule)

Niveau primaire –

- Yonatani ti Davidi salaka kuwakana ya nki mutindu ?  
(Ya kinduku)

Niveau secondaire –

- Kuwakana ya kinduku ya Yonatani salaka na Davidi, yo tadilaka kaka bo zole, to nani ya nkaka ? (Kaka bo zole ve, kansi bafami na bo na ntangu ke kwisa, tii kuna)  Bana sala bageste :

Bana songa bageste ya ke songa kuwakana ti kinduku.



Bana yimba ti kina :

Yonatani na Davidi

Banduku ya ngolo

Kuwakana na kati na bo zole Lumbu yina tii kuna.

19.3 Davidi ta songa Yonatani kubikala to kukwenda na mpila yandi ta losa batolo-tolo.

1 Samuele 20 :18-24

Tangila bana :

18 Ntangu yai, Yonatani tubilaka Davidi nde : « Mbasi kele Nkinsi ...kana nge vanda ve, bo ta zaba, sambu kisika na nge ta vanda ya mpamba.

19 ...Mpidina kwenda kubumbana na kisika ya nge kubumbanaka ntete, kuna na nima ya matadi.

20 Mono ta losa batolotolo tatu kuna, bonso nde mono ke losa na kima.

21 Ebuna mono ta tinda muntu na mono na kwenda kusosa batolotolo yango. Kana mono songa yandi nde : ‘Tala, batolotolo kele na nima na nge, kwisa lokuta yo’, yo ke songa nde mambu kele ve, nge lenda kwisa kuvutuka. Mono ke zenga na zina ya Mfumu Nzambi nde mambu ta bwila nge ve.

22 Kansi, kana mono songa muntu na mono nde, « Tala, batolotolo kele kuna na ntwala na nge’, pana nge fweti katuka, sambu Mfumu Nzambi ke tinda nge ntama.

23-24 Na kuwakana ya beto wakanaka, nge ti mono, Mfumu Nzambi kele kaka temwe tii kuna. » Yo yina, Davidi kwendaka kumbumbana na nseke.

? Yula bana :

Niveau prescolaire –

- Davidi ta losa nki—matadi to batolotolo ?  
(Batolotolo)

Niveau primaire –

- Kana yandi losa tolotolo na nima ya muntu na yandi, yo ta songa Davidi kubikala, kima kele ve, Saule zola kufwa yandi ve. Kansi kana yandi losa yo na ntwala ya muntu yina, yo ta songa nki ? (Davidi fweti kwenda, sambu Saule zola kufwa yandi.)

Niveau secondaire –

- Davidi ta vanda wapi ntangu Yonatani ke losa batolotolo yina ?  
(Kubumbana na nima ya ditadi)

Bana sala bageste :

Bana songa bageste bonso bo kele Yonatani ke losa batolotolo.



Bana yimba ti kina :

Yonatani ta songa Davidi  
Kukwenda to kubikala.  
Batolotolo bidimbu Ya  
ta tuba na yandi.

19.4 Yonatani zikisaka nde kieleka Saule zolaka kufwa Davidi. 1 Samuele 20 :25-34  
 Tangila bana :

30 Saule wilaka Yonatani makasi mingi.  
Yandi tubaka nde : « Mwana-makangu !

Mono zaba mbote nde nge kele nduku ya mwana ya Yese. Yo kele nsoni na nge....

31 Zaba mbote nde, kana mwana yina ke zinga, nge ta kuma ntotila ve na ntoto yai ata fioti. Sesepi yai, tinda bantu, bo kwenda kukanga yandi. Bo nata yandi awa, sambu yandi fweti fwa. »

? Yula bana :

Niveau prescolaire –

- Saule vandaka na kiese na kinduku ya Yonatani ti Davidi, to yandi vandaka na makasi na yo ? (Makasi)

Niveau primaire –

- Sambu na nki nge banza Saule fingaka Yonatani kubinga yandi mwanamakangu ? (Yandi vandaka na makasi na yandi.)

Niveau secondaire –

- Sambu na nki Saule vandaka na makasi na kinduku ya Yonatani ti Davidi ? (Sambu yandi zabaka nde Davidi ta kuma ntotila, kansi mwana na yandi Yonatani ve)

Bana sala bageste :

Bana songa bageste ya ke songa makasi ya mingi.



Bana yimba ti kina :

Saule waka makasi na mwana na yandi Sambu Davidi fweti kuma ntotila ya Israele.

19.5 Na mawa, Yonatani songaka Davidi nde yandi fweti basika. 1 Samuele 20 :35-42  Tangila bana :

41 Ntangu mwana-bakala me kwenda imene, Davidi telamaka na nima ya matadi ya yandi bumbanaka. Yandi fukamaka mbala tatu ilungi na ntoto na ntwala ya Yonatani, ebuna bo yambanaka ti kupesana beze na kudila. Davidi dilaka mingi.

42 Ntangu yai, Yonatani tubilaka Davidi nde : « Kwenda mbote. Mfumu Nzambi kuvanda temwe na beto na mpila nde, nge ti mono, bana na nge ti bana na mono, beto kuvila ve kuwakana ya beto wakanaka na zina na Yandi. »

? Yula bana :

Niveau prescolaire –

- Na nsuka, Davidi fweti kwenda, to yandi lendaka kubikala ? (Yandi fweti kwenda.)

Niveau primaire –

- Sambu na nki Yonatani ti Davidi yambanaka ti pesaka beze ? (Sambu Davidi fweti kwenda, ti bo zabaka ve kana bo ta monana diaka.)

Niveau secondaire –

- Sambu na nki nge banza bo zengaka Nzambi bonso ntemwe ya kuwakana na bo, Yonatani ti Davidi ? (Sambu kuwakana yina vandaka ngolo ti kieleka)

Bana sala bageste :

Bana songa kidimbu na kwenda mbote na nduku ya ngolo ya bo ta mona diaka ve.



Bana yimba ti kina :

Davidi fweti kwenda,  
Mawa na nduku na yandi.  
Davidi fweti kwenda,  
Mawa na Yonatani.

>< Kumanisa :

Saule bebisaka luzingu na yandi na kimpala ya Davidi. Kansi mwana na yandi Yonatani salaka kinduku ti Davidi. Davidi silaka kusala fami ya Yonatani mbote tii kuna. Kimpala kele kaka kubebisa, kansi kinduku kele mbote.

Verse ya bubu yai :

Banduku ke zolanaka/ konso ntangu,/

Bampangi ke sadisanaka/ na ntangu ya mpasi.  
Bingana 17 :17

Ndambu ya bana tuba linya ya ntete, ndambu ya nkaka tuba linya ya zole. Na nima, bo balula linya ya bo ke tubaka.

Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi ti lesu yai.

Devoir sambu na bakristo :

Devoir mono ke pesa beno bakristo kele kubika kimpala kana yo kele, kutula ngolo kusala kinduku ti muntu yina ya nge vandaka kuwila kimpala.

Kubinga bavidi na Yesu :

Nduku ya kuluta nene kele Yesu Kristo. Yandi kwisaka sambu beto bantu me sala masumu. Masumu yai zengaka kinduku na beto ti Tata Nzambi. Yesu fwaka na zulu ya kulunsi sambu na kuvutula beto na kinduku ti mungangi na beto. Kana nge zola bika nzila ya masumu, balula ntima, tula kivuvu na Yesu kaka, Yandi mpi ta gulusa nge. Yandi ta kuma Nduku na nge, ti Tata Nzambi mpi ta kuma Nduku na nge. Kana nge me yamba Yandi ntete ve, ntangu ya mbote, bubuyai. Kana nge zola beto kusamba ti nge na mambu yina, bikala na nima ya ecodim ti beto ta sadisa nge.

==NSUKA YA LESO 19

Kana ntangu lunga,  Longa mikanda ya Bible :  
(Bangindu kele na nsuka ya mukanda yai.)

Leso 20 Davidi wilaka Saule mawa.  
1 Samuele 21-23 somere, 24

I. Preparatio ya Moniteur—

- Kikuma ya lesu :

Beto sala mbote ata na bo ya monisa beto mpasi, sambu beto zaba nde Nzambi na beto sala mpi mbote na bantu yonso.

- Verse ya bubu yai :

« ...Mono ke tubila beno nde : /Beno zola bambeni na beno,/ samba Nzambi/ sambu na bantu/ yina ke monisaka beno mpasi./ »  
Matayo 5 :44, Malongi ya Yesu Kristo

- Nkunga ya kwenda nzila mosi ti lesu :

Beto Vutula Mbi Ve, Ve, Ve

Beto vutula mbi—ve, ve, ve ! (3x)  
Beto pesa yo na Nzambi.

Kuzuze kele kisalu ya Nzambi (3x)  
Kansi ya beto bantu ve.

Beto zola bambeni na beto (3x) Bo  
ke na maboko ya Nzambi.

II. Revisio—

- Kulanda devoir ya lesu me luta : Na mposo me luta, beto pesaka beno bakristo devoir kuwila bantu kimpala ve, kansi kutunga kinduku ti muntu ya nge vandaka ntete kuwila yandi kimpala. Nani me yantika kutunga kinduku mutindu yina ? Nani ta songa beto ntemwe ya mambu yina ?
- Kuyindula diaka baleso me luta:
- Beto me mona muntu mosi ya me wila Davidi kimpala. Yandi nani? (Saule)
- Kimpala me benda yandi kusala nki mambu ya mbi ? (Meka kufwa yandi)

- Nani wilaka Davidi kimpala ve, kansi salaka kinduku ya ngolo ti yandi ?  
(Yonatani)

III. Kulonga Leso Yai—

- Kuyantika :

Keti nge me mona muntu ya me baka nge na kimbeni, ata nge salaka yandi mbi ve ? Mono waka nde mwana mos ya kalasi bakaka mwana ya nkaka na kimbeni sambu yandi salaka kuluta mbote na examen. Davidi na Bible, yandi mpi me sala kima ve na Mfumu Saule, kansi Saule bakaka yandi na kimbeni.

- Developpement (Malongi ya nene ya lesu yai na banti 4) : [Moniteur, histoire yai kele nda (bakapu 4 ya mvimba) yo yina beto ta sala somere ya bitini ya nkaka.]

20.1 Davidi zabaka nde Saule me zenga na kufwa yandi, yo yina yandi tinaka.   
Tangila bana somere yai ya kapu 2123:

Nganga-Nzambi sadisaka Davidi na madia ti mbele. Davidi kwendaka kuzinga ya dibulu mosi na matadi penepene na bwala Adulami. Kuna bantu kiteso ya 400 kwendaka na yandi, sambu bo vandaka na kiese ve na bisika ya bo vandaka. Bo kumaka basoda na yandi. Ebuna profete zina ya Gadi songaka yandi kukwenda na ntoto ya Yudea.

Saule zolaka kufwa konso muntu ya sadisaka Davidi. Yandi songaka basoda na yandi bo kufwa ata nganga-Nzambi. Kansi bo vandaka na boma kusala yo. Yo yina, Saule songaka muntu ya nkaka kusala yo. Yandi fwaka banganga-Nzambi 85, ti yokaka bwala na bo tiya. Kaka mosi basikaka, Abiatar, ti yandi kwendaka kuzinga na Davidi.

Ntangu yina, Davidi waka nde bantu ya Filistia vandaka kuyiba madia ya bilanga na ya bwala Keyila. Yandi yulaka Nzambi nki kusala, ti Nzambi songaka yandi kukwenda

kunwanisa bo. Yandi nungaka, kansi Saule waka nde yandi vandaka kuna. Davidi yulaka Nzambi nki kusala, ebuna Nzambi songaka yandi nde bantu ya bwala yina ta pesa yandi na maboko ya Saule. Yo yina, yandi basikaka na kati ya nseke. Konso lumbu Saule sosaka kufwa yandi, kansi Nzambi nungisaka ve lukanu ya mbi na yandi.

Nduku na yandi Yonatani kwisaka kumona yandi. Yonatani pesaka yandi ngolo na zina ya Nzambi. Bo tubaka diaka mpila bo me wakana na kinduku. Ebuna Yonatani vutukaka.

Basoda ya Saule landaka Davidi konso kisika yandi kwendaka, sambu bo kufwa yandi kaka. Davidi kele kaka kutina, kutina.

20.2 Saule kotaka na cave sika Davidi ti bantu na yandi vandaka kubumbana. Moyo ya Saule vandaka na diboko ya Davidi, kansi na kinsweki Davidi zengaka kaka kitini ya lele ya Saule. 1 Samuele 24 :1-7

Tangila bana :

2-3...Saule ....bakaka basoda mile tatu (3,000) ...ebuna yandi kwendaka kusosa Davidi ti bantu na yandi ...

4 ...Saule ...monaka dibulu mosi na kati ya matadi, yandi kotaka muna na kwenda na wese (W.C.). Kisi ve Davidi ti bantu na yandi vandaka me bumbana na kati ya dibulu yina.

5 Bo tubilaka Davidi nde : « Yai kilumbu ya Mfumu Nzambi tubilaka nge nde Yandi ta pesa mbeni na nge na maboko na nge. Nge sala yandi konso kima ya nge zola. » Davidi pusanaka na mayele yonso kukonda makelele, yandi zenga nsongi ya lele ya Saule. ...

7 Yandi tubilaka bantu na yandi nde : « ...Mono lenda sala yandi mbi ve ata fioti,

sambu Mfumu Nzambi Yandi mosi solaka yandi na kuvanda ntotila !

? Yula bana :

Niveau prescolaire –

- Keti Davidi salaka Saule mbi to ve ? (Ikele ve.)

Niveau primaire –

- Davidi salaka kaka nki na Saule ? (Zengaka nsongi ya lele na yandi)
- Sambu na nki Davidi fwaka Saule ve ? (Yandi monaka yo mbi kana yandi kufwa ntotila ya Nzambi me tula.)

Niveau secondaire –

- Na nganda ya dibulu vandaka basoda 2,000 ya Saule. Na kati ya cave vandaka kaka Saule yandi mosi. Sambu na nki ? (Sambu yandi kota cave kukwenda na wese.)

Bana sala bageste :

Bana sala bonso bo ke kuma penepene na Saule na kinsweki. Bo sala bonso bo ke zenga nsongi ya lele na yandi.



Bana yimba ti kina :

Davidi monaka ntangu ya mbote Yandi lend kufwa Saule. Yandi zola kusala yo ve Sambu Nzambi me tula ya' mfumu !

20.3 Na nima Saule basikaka, Davidi songaka yandi nki yandi me sala, ti sosaka ngemba na kati na bo. 1 Samuele 24 :8-16  Tangila bana :

8 Mutindu yo yina, Davidi buyilaka bantu na yandi na kubwila Saule. Saule basikaka na dibulu yango. Yandi landaka nzila na yandi.

9 Ntangu yai, Davidi mpi basikaka na dibulu, ebuna yandi bingaka Saule nde : « Mfumu ! Mfumu ! » Saule talaka na nima. Davidi fukamaka na kusonga luzitu,

10 Ebuna yandi tubaka nde : « Mfumu, sambu na nki nge ke wila bantu yina ke kusa nge nde mono ke sosa kusala nge mbi ?

11 Nge lenda mona nge mosi nde bubu yai, Mfumu Nzambi me pesa nge na maboko na mono kuna na dibulu. Bantu me songa mono na kufwa nge, kansi mono me zola ve. Mono me tuba nde mono ke sala mfumu na mono mbi ve, sambu yandi kele ntotila ya Mfumu Nzambi me solaka.

12 Tata, tala kitini ya lele na nge na maboko na mono ! Sambu mono me zola ve kufwa nge, yo yina mono me zenga kaka nsoni ya lele ya nge... mono ke na ngindu ve ata fioti na kusala nge mbi to mubulu....

16 Mfumu Nzambi ta vanda zuzi. Yandi ta sambisa beto ti nge....»

? Yula bana :

Niveau prescolaire –

- Davidi bingaka nani ?  
(Mfumu Saule)

Niveau primaire –

- Nki ntangu Davidi bingaka Saule ?  
(Na nima yandi me basika na dibulu)

Niveau secondaire –

- Sambu na nki Davidi songaka Saule kitini ya lele na yandi ya yandi me zenga ? (Sambu na kusonga nde yandi vandaka na mpila na kufwa yandi, kansi yandi buyaka.)

Bana sala bageste :

Bana nangula diboko bonso kitini ya lele kele na kati. Bo binga nde, « Mfumu ! Mfumu »



Bana yimba ti kina :

Mfumu ! Mfumu !

Mono zola kufwa nge ve.

20.4 Saule salaka ngemba ti Davidi.

1 Samuele 24 :17-23

Tangila bana :

17 Ntangu Davidi me manisa kutuba, Saule tubaka nde : « Keti yina nge Davidi, mwana na mono ? » Yandi yantikaka kudila.

18 Ebuna yandi tubilaka Davidi nde : « Nge ke na raison, kansi mono ve. Nge me sala mono mbote, kansi mono me sala nge mbi.

...21 Mono zaba nde nge ta vanda kaka ntotila ya Isarele, kimfumu ya Israele ta bikalaka na maboko na nge.

22 Kansi zenga na zina ya Mfumu Nzambi nde nge ta bika kufwa bana na mono ve kana mono fwa, nge ta katula mpi ve zina na mono ti ya fami na mono sambu bantu kuvila yo ve kimakulu. »

23 Davidi mpi zengaka mpidina. Ntangu yai, Saule vutukaka na bwala na yandi....

? Yula bana :

Niveau prescolaire –

- Mambu na kati ya Davidi ti Saule, mbala yai yo sukaka na mpila ya mbote to ya mbi ? (Ya mbote)

Niveau primaire –

- Saule ndimaka nki ? (Nde yandi me sala Davidi mbi kusosa kufwa yandi)

Niveau secondaire –

- Saule bakisaka nki mambu ya mfunu sambu na Davidi ? (Nde yandi ta kuma ntotila)
- Yandi lombaka Davidi mambu zole ti Davidi ndimaka. Mambu yina zole vandaka nki ?  
(1. Nde Davidi ta fwa fami na yandi yonso ve, ti 2. Nde yandi ta kanga bantu ve nzila kubambuka yandi.)  Bana sala bageste :

Bana bula ntulu bonso kusonga mawa nde bo me sala mbi.



Bana yimba ti kina :



Davidi wilaka Saule mawa  
Mfumu ya Israele!

>< Kumanisa :

Davidi wilaka Saule mawa ti fwaka yandi ve.  
Yandi bakisaka nde Nzambi ke sala beto yonso  
mbote, yo yina, Yandi zola bantu na Yandi mpi  
kusala bantu yonso mbote, ata bo ke sala beto  
mbi.

Verse ya bubu yai :

« ...Mono ke tubila beno nde : /Beno zola  
bambeni na beno,/ samba Nzambi/ sambu na  
bantu/ yina ke monisaka beno mpasi./ »

Matayo 5 :44, Malongi ya Yesu Kristo

Bana tuba verse na bandinga ya nkaka—na  
zulu—na nsi, ya nkento—ya bakala, ya  
ngolo— ya pima, etc.

Bankunga ya kwenda nzila  
mosi ti leso :

Bana yimba mosi ya bankunga ya kwenda nzila  
mosi ti leso yai.

Devoir sambu na bakristo :

Devoir mono ke pesa beno bakristo, yo yai :  
Sosa kusala mbote na bantu yonso. Ata kana  
muntu baka nge na kimbeni, nge vutula yandi  
kinduku. Ata yandi sala nge mbi, nge vutula  
yandi mbote. Yai ke pesa Nzambi kiese.

Kubinga bavididi na Yesu :

Keti nge kele mukristo ? Nki ntangu nge  
kumaka mukristo ? Muntu ke butuka ve  
mukristo, ata bibuti na yandi zola Yesu mingi.  
Konso muntu fweti bakisa nde yandi me sala ve  
yina ya Nzambi ke zolaka. Nge fweti bakisa  
nde Nzambi salaka nge sambu na kupesa Yandi  
lukumu. Kansi nge me sola ve kupesa Yandi  
lukumu. Nge me sola nzila ya nge mosi. Yina  
kele masumu. Nzambi kele makasi na bantu ya  
masumu. Kana yai ke pesa nge mpasi na  
ntima, kele Mpeve ya Nzambi ya ke songa nge

mambu yina. Balula ntima. Bika nzila ya nge  
mosi. Tula kivuvu na Yesu Kristo, Mwana ya  
Nzambi. Yandi pesaka moyo na Yandi nkailu  
sambu na kufuta mfuka ya masumu ya beto  
bantu. Tata Nzambi songaka nde Yandi me  
ndima nkailu ya Yesu, na mpila Yandi  
tedimisaka Yandi na lufwa. Bantu mingi  
monaka Yesu na moyo diaka. Na nima ya  
bilumbu 40, Yandi tombukaka na zulu. Kisalu  
na Yandi me mana, yo yina, Yandi vutukaka na  
Tata ya tindaka Yandi. Yandi me kangula nzila  
sambu na nge kukuma mwana ya Nzambi. O,  
kudilosa na Yesu bubu yai, ebuna, nge ta  
guluka.

Konso mposo beto kele awa na nima ya ecodim  
kusadisa konso muntu ya zola tula ntima na  
Yesu.

==NSUKA YA LESO 20

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 21 Davidi sonikaka bankunga kusonga mpila yandi sosaka Nzambi na ntangu ya mpasi. Bankunga kapu 18

### I. Preparatio ya Moniteur—

Kikuma ya leso :

Beto binga zina ya Nzambi na ntangu ya mpasi,  
sambu beto zaba nde Yandi kele na kiese kuwa  
kudila na beto, mpi kusadisa beto.

Verse ya bubu yai :

Mfumu Nzambi,/ ntangu mono ke lomba nge/  
na kwisa kusadisa mono/ na maboko ya  
bambeni,/ Nge ke gulusa mono./ Lukumu na  
Nge, Mfumu Nzambi ! Bankunga 18 :4   
Bankunga ya kwenda nzila mosi ti leso :  
Nzambi Ta Kuwa Nge

Nzambi ta kuwa nge (3X)

Na zina ya Yesu !

Yandi ta sadisa (3X)

Na zina ya Yesu !

Zitisa Yandi ! (3X)

Na zina ya Yesu !

Matondo na Nzambi (3X)

Na zina ya Yesu !

Lomba na Nzambi Kaka

Beto fweti Iombila

Na Nzambi, Yandi

kaka Ata muntu mosi

ve Ya nkaka lenda

sadisa !

Mvutu :

Lomba na Nzambi !

Na Nzambi kaka

Lomba na Nzambi

Na zina ya Yesu !

## II. Revisio—

Kulanda devoir ya lesu me luta :

Na mposu me luta, beto pesa beno bakristo  
devoir kusala mbote na bantu yonso, ata na  
bo ya sala nge mbi.

Kuyindula diaka baleso me luta:

Tii ntangu yai, beto me mona Davidi na  
ntangu ya kiese. Bonso nki ?  
(Bonso ntangu Samuele songaka nde  
Nzambi me sola yandi kuvanda ntotila  
ya mpa ya Israele.)

Beto me mona Davidi mpi na ntangu ya  
mpasi. Bonso nki ?  
(Bonso mbala mingi Saule zolaka kufwa

yandi.) III. Kulonga Leso Yai—

Kuyantika :

Beto me mona nde Davidi sonikaka bankunga  
mingi sambu na kumisa Nzambi. Ndambu  
bankunga, yandi sonikaka kubinga Nzambi na

ntangu ya mpasi, bonso ntangu Mfumu Saule  
vandaka kuzomba yandi. Beto ta mona  
mbandu mosi bubuyai—Bankunga 18. Yandi  
sonikaka yo na nima Nzambi me gulusa yandi  
na diboko ya Mfumu Saule ya vandaka  
kuzomba yandi.

Developpement (Malongi ya nene ya lesu  
yai na banti 5 ) :

21.1 Davidi kumisaka Nzambi. Yandi ndimaka  
nde Nzambi vandaka ngolo na Yandi.  
Bankunga 18 :1-3.

Tangila bana :

1 Nkunga yai Davidi yimbilaka Mfumu  
Nzambi, ntangu Nzambi gulusaka yandi na  
maboko ya Saule ti bambeni ya nkaka.

2 Mfumu Nzambi, mono ke zolaka nge  
mingi, Nge kele ngolo na  
mono.

3 Mfumu Nzambi, nge kele dikunzi na  
mono,  
Nge kele kisika ya ngolo ya mono ke  
tininaka.

Nge Muntu ke gulusaka mono na bambeni.  
Nge kele dibaya yina ke taninaka mono na  
batolotolo ya bambeni. Nge kele lupangu  
ya bibaka ya ngolo, Kisika ya mono ke  
gulukaka, Kisika ya nene ya mono ke  
pemaka.

? Yula bana :

Niveau prescolaire –

- Na nkunga yai, Davidi kumisaka nani ?  
(Mfumu Nzambi)

Niveau primaire –

- Nkunga kele poeme ya bantu ke  
yimbaka. Sambu na nki Davidi  
vandaka kukumisa Nzambi na poeme  
yai ?

(Sambu Nzambi me gulusa yandi na diboko ya Saule, ya zolaka kufwa yandi.)

Niveau secondaire –

- Na poesie, mbala mingi beto ta fwanikisa kima mosi na kima ya nkaka. Na poeme yai, Davidi fwanikisa Nzambi na nki ? (Dikunzi, dibaya yina ke taninaka muntu na batolotolo)
- Bana sala bageste :

Bana sala bonso bo ke simba dibaya yina ke taninaka muntu na batolotolo (français ‘bouclier’).



Bana yimba ti kina :

Davidi kumisaka Nzambi Sambu  
Yandi gulusaka yandi ! (O yea)  
Sambu Nzambi gulusaka yandi !

21.2 Yandi bingaka Nzambi na ntangu mosi ya mpasi, ti Nzambi waka yandi. Bankunga 18 :4-6

Tangila bana :

4 Mfumu Nzambi, ntangu mono ke lomba nge na kwisa kusadisa mono na maboko ya bambeni,

Nge ke gulusa mono.

Lukumu na nge, Mfumu Nzambi !

5 Lufwa kangaka mono nsinga na nkingu. Nsudi na yo pesaka mono boma.

6 Nsi ya bafwa vingilaka mono.

Maziamu tudilaka mono mutambu.

? Yula bana :

Niveau prescolaire –

- Davidi lombaka lusadisu ya nani ? (Ya Nzambi)

Niveau primaire –

- Ntangu Davidi bingaka Nzambi, yandi monaka bonso yandi fweti sala nki ? (Bonso yandi fweti kufwa.)

Niveau secondaire –

- Mikanda ya Kuyantika tii na 1 Samuele ya beto me mona kele histoire. Bo me sonikaka mambu ya lutaka. Kansi mukanda ya Bankunga kele poesie. Nki na baverse yai ke monika bonso ‘foto ya bandinga’ ya poesie ? (Tala verse 5.)

Bana sala bageste :

Bana simba nkingu ya bo mosi. Bo tuba nde, « Lufwa kangaka mono nsinga na nkingu. »

Bo simba mbombo. Bo tuba nde, ‘Nsudi na yo pesaka mono boma.’



Bana yimba ti kina :

Davidi monaka nde Lufwa Vandaka penepene na yandi. O mawa!

21.3 Nzambi kulumukaka sambu na kusadisa yandi. Bankunga 18 :7-9  Tangila bana :

7 Na ntangu ya mpasi mono lombaka Mfumu Nzambi, Nzambi na mono Na kwisa kusadisa mono.

Kuna na nzo na Yandi, Yandi waka ndinga na mono.

Yandi waka mutindu mono ke didila Yandi.

8 Ebuna ntoto yonso nikanaka, yo tekataka. Bangumba mpi nikanaka ngolo sambu Nzambi waka makasi.

9 Midinga vandaka kubasika na mbombo na yandi.

Tiya ya ngolo ti makala ya tiya vandaka kubasika na munoko na Yandi.

? Yula bana :

Niveau prescolaire –

- Davidi bingaka Nzambi. Keti Nzambi waka yandi, to Yandi waka ve ?  
(Ee, Yandi waka.)

Niveau primaire –

- Nzambi waka nki mutindu sambu Saule vandaka kuzomba Davidi ?  
(Yandi waka makasi.)

Niveau secondaire –

- Mbala mingi na poesie, bo ke sonika bonso Nzambi kele muntu. Bo sala yo na mpila nde beto lenda bakisa Yandi. Nki na baverse yai ke songa Nzambi bonso Yandi vandaka muntu ?  
(Tala verse 9.)

Bana sala bageste :

Bana sala bonso ntoto ke nikana. Bo tuba nde, « Nzambi ke wa makasi ! »



Bana yimba ti kina :

Nzambi waka kudila ya Davidi,  
Mambu ya nene ! Mambu ya nene !

21.4 Nzambi gulusaka Davidi na diboko ya Saule. Bankunga 18 :17-18

Tangila bana :

17 Mfumu Nzambi kuna na zulu ya Yandi kele, Yandi kulumusaka diboko na Yandi. Yandi simbaka mono.

Yandi katulaka mono na kigonsa bonso na kati ya masa.

18 Yandi botulaka mono na maboko ya bambeni

Ti bantu yonso yina ke mengaka mono, me lutaka mono na ngolo.

? Yula bana :

Niveau prescolaire –

- Keti Nzambi gulusaka Davidi, to Yandi gulusaka Davidi ve ? (Ee. Yandi gulusaka Davidi na diboko ya Saule. Yandi fwaka ve.)

Niveau primaire –

- Davidi waka nde Nzambi salaka nki na yandi ? (Nzambi simbaka yandi.) Niveau secondaire –

- Nki kitini ya baverse yai ke songa Nzambi bonso yandi vandaka muntu ? (Yandi kulumusaka diboko na Yandi. Nzambi kele mpeve, yo yina, Yandi kele na diboko ve. Yai kele mpila poetika ya kutuba.)  Bana sala bageste : Bana kulumusa diboko bonso bo kele Nzambi ke sadisa muntu na nsi. Bo tuba nde, « Davidi, kuwa boma ve ! Nzambi ikele ! »



Bana yimba ti kina :

Nzambi sadisaka Bu Davidi  
bingaka Yandi !

21.5 Davidi pesaka Nzambi lukumu sambu Yandi me gulusa yandi na bambeni. Bankunga 18 :47

Tangila bana :

47 Lukumu na Mfumu Nzambi !

Lukumu na Dikunzi na mono ! Lukumu kuvanda na Nzambi yai ke gulusaka mono !

? Yula bana :

Niveau prescolaire –

- Nzambi gulusaka Davidi na lufwa, ebuna Davidi pesaka Nzambi nki ?  
(Lukumu)

Niveau primaire –

- Davidi pesaka Nzambi lukumu mbala ikwa na verse yai ?  
(Mbala tatu.)

Niveau secondaire –

- ‘Mukunzi na mono’ zola tuba nki ?  
(Bonso dikunzi ke simba nzo, Nzambi keke kusimba moyo na yandi.)  Bana sala bageste :

Bana songa bageste yonso ya ke songa mpila beto pesa lukumu na Nzambi.



Bana yimba ti kina :

Lukumu na Nzambi, e  
Lukumu na Nzambi, e  
Lukumu na Nzambi, e

>|< Kumanisa :

Na nkunga yai yonso, Davidi ke pesa Nzambi lukumu sambu yandi me binga Yandi na ntangu ya mpasi, ti Nzambi me wa yandi. Yandi me gulusa yandi na diboko ya Saule, ya vandaka kuzomba yandi na nzala kaka na kufwa yandi. Nzambi ke wa konso ntangu beto binga zina na Yandi !

- Verse ya bubu yai :

Mfumum Nzambi, / ntangu mono ke lombana nge /  
na kwisa kusadisa mono / na maboko ya bambeni, / Nge ke gulusa mono. / Lukumu na Nge, Mfumum Nzambi ! Bankunga 18 :4

Bana tuba verse mbala 6 ti bageste.

Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

- Devoir sambu na bakristo :

Bana bakristo, nki beno ke sala na ntangu ya mpasi ? Devoir mono ke pesa beno, kubinga Nzambi na bampasi yonso. Bika Yandi kusadisa nge.

- Kubinga bavididi na Yesu :

Kansi yo keke mpasi kubinga Nzambi kana nge me zaba Yandi ntete ve. Ntangu nge balula ntima ti yamba Yesu Kristo, mbala mosi nge zaba mpi Tata Nzambi. Yesu tubaka nde, “Kana beno zaba Mono, beno ta zaba mpi

Tata” (Yoane 14:7a). Keti nge zaba mbote nde nge zaba Yandi ? Kana nge mona bubu yai nde nge ke na mfunu kuyamba Yandi, mono ta vanda na kiese kusadisa nge na nima ya ecodim.

==NSUKA YA LESO 21

Kana ntangu lunga,  Longa mikanda ya Bible :  
(Bangindu keke na nsuka ya mukanda yai.)

## Leso 22 Abigail sosaka ngemba ti Davidi.

1 Samuele 25 :3-35 I.

### Preparatio ya Moniteur—

- Kikuma ya leso :

Beto sosa ngemba na mpila ya beto tuba.

- Verse ya bubu yai :

Mvutu ya malembe / ke lembikaka makasi /  
Kansi mvutu ya makasi / ke tedimisaka yo. / Bingana 15 :1

- Bankunga ya kwenda nzila mosi ti leso :

Sadila verse ya bubu yai bonso nkunga kukwenda nzila mosi ti leso.

### II. Revisio—

- Kulanda devoir ya leso me luta : Na mposo me luta, beto pesaka beno bakristo devoir kubinga Nzambi na ntangu yonso ya mpasi. Nani ta songa beto mpila mosi yandi bingaka Nzambi na ntangu ya mpasi na mposo me luta ?

- Kuyindula diaka baleso me luta:

Na bamposo me luta, beto me mona mpila Nzambi sadisaka Davidi ntangu Saule vandaka kuzomba yandi. Beto monaka nde

na nima Nzambi sadisaka yandi, Davidi sonikaka nkunga sambu na kumisa Nzambi.

### III. Kulonga Leso Yai—

#### Kuyantika :

Davidi vandaka kuzinga kaka na nseke, ti yandi nwanaka bitumba ya nkaka ti bambeni ya Israele. Na nima ya ntangu, profete Samuele kufwaka. Bo dilaka yandi ti zikaka yandi. Ntangu yai, bantu ya Davidi me kuma 600. Bo kumaka penepene na bwala mosi sika mvwama ya nene zingaka. Zina na yandi Nabale.

#### Developpement (Malongi ya nene ya lesa yai na banti 6) :

22.1 Abigaile, nkento ya Nabale mayele, kansi Nablale muntu ya mpasi ti makasi. 1 Samuele 25 : 3

#### Tangila bana :

3 Zina ya nkento na yandi Abigaile, nkento mosi ya kitoko ti mayele, kansi bakala na yandi vandaka bakala mosi ya mpasi ti ya makasi.

#### ? Yula bana :

- Nabale muntu ya nki mutindu ? (Mpasi ti makasi)
- Nkento na yandi Abigaile muntu ya nki mutindu ? (Kitoko ti mayele)

22.2 Na luzitu yonso, David tindaka bantu ku songa mpila yandi me sadisa bantu ya vandaka kukeba mameme ya Nabale, ebuna kulomba lusadisus na yandi. 1 Samuele 25 : 4-9

#### Tangila bana :

4-6 ....Davidi... tindilaka yandi bana-bakala kumi nde : « Beno kwenda ...na Nabale, beno pesa yandi mbote na zina na mono nde : ‘Mbote na nge, nduku na mono. Mbote na nge, na fami na nge ti na yina yonso kele na nge.

7 ...Bantu na nge yina ke kebaka mameme, ntangu bo vandaka ti beto, beto salaka bo ata kima ve....

8 Yula bo, bo ta songa nge. Mono ke lomba nge, nge baka bantu na mono mbote, sambu bubu yai kele kilembu ya fete. Yo yina, pardo, kana nge zola, pesa bantu na nge ti mwana na nge Davidi konso kima nge ke na yo.’ »

9 Bantu ya Davidi kwendaka na Nabale, bo tubilaka yandi mambu yonso ya Davidi tubaka, ebuna bo vingilaka.

#### ? Yula bana :

##### Niveau prescolaire –

- Bantu ya kebaka mameme ya Davidi vandaka ti Davidi. Keti yandi salaka bo mbi ? (Ikele ve.)

##### Niveau primaire –

- Davidi lombaka Nabale nki ? (Konso kima yandi vandaka na yo— ndambu lusadisus sambu na lumbu ya fete)
- Keti bantu ya Davidi lombaka Nabale na mpila ya makasi to ya luzitu, ya malembe ? (Mpila mosi ya luzitu, ya malembe)

##### Niveau secondaire –

- Tala kutuba Davidi songaka bantu na yandi kutuba na Nabale. Nki na kati na yo ke songa luzitu ? (Nduku na mono, mbote na fami yonso, pardo, kana nge zola, mwana na nge Davidi)

#### Bana sala bageste :

Bana songa mbandu ya mpila ya luzitu beto ke lomba kima na culture na beto.



#### Bana yimba ti kina :

Davidi lombaka lusadisus na Nabale Na luzitu yonso.

22.3 Nabale vutulaka bo na mpila mosi ya makasi. 1 Samuele 25 :10-11  Tangila bana :

10 Kansi Nabale pesaka mvutu yai : « Davidi nani ? Mwana ya Yese nani ? Bilumbu yai bampika mingi ke tina-tina bamfumu na bo !

11 Ebuna mono baka mampa na mono, ti masa na mono, ti mbisi na mono me fwila bantu na mono ya kisalu, mono pesa na bantu me katuka kana na wapi ? Ikele ve ! »

? Yula bana :

Niveau prescolaire –

- Keti Nabale ndimaka kusadisa Davidi ? (Ikele ve.)

Niveau primaire –

- Nki mutindu nge mona mpila Nabale pesaka mvutu—luzitu to luzitu ve ? (Luzitu ve. Makasi.)

Niveau secondaire –

- Sambu na nki mvutu yina vandaka luzitu ve ? (Yandi tubaka bonso yandi zabaka

Davidi ve, bonso yandi lenda vanda muntu mosi ya mpamba.)  Bana sala bageste : Bana songa luse ya mawa sambu na mpila Nabale pesaka mvutu ya kukonda luzitu.



Bana yimba ti kina :

(Na ton ya mawa) Nabale vutulaka na mpila ya luzitu ve.

12 Bantu ya Davidi vutukaka, bo telaka Davidi mambu ya Nabale tubaka.

13 Davidi tubaka nde : « Beno yonso, mbele na maboko ! » Bo yonso bakaka bambele na bo, Davidi mpi bakaka ya yandi, ebuna yandi kwendaka ti bantu na yandi kiteso ya nkama iya (400). Bantu nkama 200 (200) bikalaka na kutala bima.

? Yula bana :

Niveau prescolaire –

- Mvutu ya Nabale pesaka Davidi kiese, to kiese ve ? (Kiese ve)

Niveau primaire –

- Davidi zolaka kusala nki ? (Kwenda kunwanisa Nabale) Niveau

secondaire –

- Mvutu ya makasi ya Nabale me kitisa mambu yai, to yo me sala nki ? (Ikele ve. Yo me yika tiya diaka. Mambu me kuma ngolo.)  Bana sala bageste :

Bana yonso sala bonso bo kele bantu ya Davidi, ke simba mbele na bo kukwenda kunwana.



Bana yimba ti kina :

Mvutu ya makasi Me yika makambu tiya.

22.5 Muntu mosi zabisaka nkento ya Nabale Abigaile, ebuna yandi kwendaka kutuba na malembe na Davidi ti kusadisa yandi na madia. 1 Samuele 25 :14-31  Tangila bana :

22.4 Ntangu Davidi waka yo, yandi yilamaka kunwanisa Nabale. 1 Samuele 25 :12-13  Tangila bana :

18 Nswalu Abigaile bakaka mampa...vinu, mameme ...ya kuyoka...ble ya kukalanga...bambuma ya vinu, ti bagato...ya bafige. Yandi tulaka yo na zulu ya bampunda.

19 Ebuna, yandi tubaka na bantu ya kusalu nde : « Beno yita na ntwala, mono ke landa beno. »...

20 Abigaile mataka na zulu ya mpunda na yandi....Yandi ke mona Davidi ti bantu na yandi ke kwisa...

21 Na ntangu yina, Davidi vandaka me bokuta na nsi ya ntima....

23-24 Ntangu Abigaile monaka Davidi, yandi tulukaka nswalu na mpinda. Yandi fukamaka na ntwala ya Davidi, ilungi na ntoto. Ebuna yandi tubilaka yandi nde : « Pardo mingi mfumu, mbi kele ya mono...Bika mono mpika na nge kutuba na nge. Wa ndinga na mono, pardo.

25 Mfumu, kulanda ve mambu ya Nabale. Yandi kele muntu ya mpamba. Yandi kele muntu ya kilau, mutindu kele disongidila ya zina na yandi...Kansi mono, mpika na nge, mono monaka ve bantu yina ya nge tindaka.

...27 Pardo mfumu, tala kado yai ya mono me kwisa kunatila nge sambu nge kabila yo bantu na nge.

28 Pardo, lolula mono sambu na mbi na mono. Mfumu Nzambi ta tula nge ti bana na nge bantotila, sambu nge ke nwana bitumba ya Mfumu Nzambi ...

? Yula bana :

Niveau prescolaire –

- Nani kwendaka kusolula na Davidi ? (Abigaile, nkento ya Nabale) Niveau

primaire –

- Nki mutindu nge mona mpila yandi tubaka na yandi ? Luzitu to luzitu ve ? (Luzitu mingi)

Niveau secondaire –

- Abigaile tubaka na luzitu, kansi nki ya nkaka songaka luzitu ? (Kufukama ilungi na ntoto)

Bana sala bageste :

Bana tuba na luzitu bo na bo, « Pardo, mfumu. Pardo, mfumu. »



Bana yimba ti kina :

Abigaile tubaka na malembe  
Na luzitu mingi.

22.6 1 Samuele 25 :32-35 Davidi ndimaka kutuba ya malembe ya Abigail, yo yina

ngemba kotaka. 1 Samuele 25 :32-35

Tangila bana :

32 Davidi tubilaka Abigaile nde : «

Lukumu na Mfumu Nzambi...me tinda nge bubu yai na kwisa kukutana na mono !

33 Mersi sambu na mayele na nge...

35 Davidi ndimaka kado ya Abigaile natilaka yandi, ebuna yandi tubaka na yandi nde : « Vutuka ka nge, kumona boma ve. Mono me wa nge. Mono me ndima nge. »

? Yula bana :

Niveau prescolaire –

- Makambu yina sukaka na mpila ya mbote to ya mbi ? (Na mpila ya mbote)

Niveau primaire –

- Nki mutindu Davidi waka kutuba ya luzitu, ya mayele ya Abigaile ? (Kiese—yandi ndimaka yo.)

Niveau secondaire –

- Kutuba ya malembe ya Abigaile sukisaka nki makambu ? (Makasi ya Davidi ti lukanu kunwanisa fami na yandi)

Bana sala bageste :



Bana songa munoko ti tuba na ndinga ya ngolo, ya makasi nde : « Ndinga ya makasi ke yika tiya na makambu ! » » Bo songa munoko na diboko ya nkaka ti tuba na ndinga ya malembe nde : « Ndinga ya malembe ke lembikaka makasi. »



Bana yimba ti kina :

Ndinga ya makasi, ve ! ve ! ve ! Ndinga ya malembe, e ! e ! e !

>< Kumanisa :

Kana makambu ikele na kati ya bantu, mbala mingi beto kuwa nzala kupesa mvutu ya makasi. Mvutu ya mutindu yina ke sadisa ve. Mbote bana ya Nzambi longuka mutindu kupesa mvutu ya malembe, bonso Abigaile salaka.

Verse ya bubu yai :

Mvutu ya malembe/ ke lembikaka makasi/,  
Kansi mvutu ya makasi/ ke tedimisaka yo./ Bingana 15 :1

Bana yimba yo ti bageste. Bo kina mpi mbala sambanu.

Devoir sambu na bakristo :

Beno bakristo, na mposo ke kwisa mono ke pesa beno devoir kukeba na bamvutu nge ke pesaka na bantu. Tula ngolo nde yo vanda ya makasi ve, kansi ya luzitu ti ya malembe.

Kubinga bavidi na Yesu :

Bubuyai beto ke yindula bamvutu. Lumbu mosi nge ta telama na ntwala ya Nzambi. Nki mvutu Yandi ta pesa nge ? Yesu tubaka nde bantu ya nkaka monikaka bonso balandi na Yandi, kansi na nsuka Nzambi ta songa bo nde, ‘Mono me zabaka beno ntete ve. Beno bantu ke salaka makambu ya mbi, beno katuka awa na meso na mono !’ (Matayo 7:23). Kana kieleka nge me balula ntima na Yesu, nge ta landa mpi Yandi. Yandi ta pesa nge ntima ya mpa ya ke zola masumu diaka ve. Keti nge zaba

mbote nde nge me balula ntima na nge. Balula ntima zola tuba “changement”. Kana nge zola zikisa mambu yina bubuyai, kwisa solula ti beto na nima ya ecodim.

==NSUKA YA LESO 22

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 23 Davidi tinaka makasi ya Saule ti wilaka yandi mawa diaka.

1 Samuele 26 :1-25, 27:1-12 I.

Preparatio ya Moniteur—

Kikuma ya leso :

Beto vutula mbi na mbi ve, kansi beto vutula mbote kana muntu me sala beto mbi.

Verse ya bubu yai :

Reviser diaka bandinga ya Yesu na Matayo 5 :44 :

« ...Mono ke tubila beno nde :/ Beno zola bambeni na beno,/ samba Nzambi sambu na bantu/ yina ke monisaka beno mpasi. »

Nkunga ya kwenda nzila mosi ti leso :

Beto Vutula Mbi Ve, Ve, Ve

Beto vutula mbi—ve, ve, ve ! (3x) Beto pesa yo na Nzambi.

Kuzuze kele kisalu ya Nzambi (3x) Kansi ya beto bantu ve.

Beto zola bambeni na beto (3x) Bo ke na maboko ya Nzambi.

## II. Revisio—

- Kulanda devoir ya lesu me luta : Na mposu me luta, beto pesaka beno bakristo devoir kuvutula bantu mvutu na mpila mosi ya malembe, ya luzitu, ya ngemba. Kuvutula mvutu ve na makasi.  
Nani ta songa beto mpila bo salaka yo ?
- Kuyindula diaka baleso me luta:  
Beto me mona nde profete Samuele songaka nde Davidi ta kuma ntotila na nima ya Saule. Beto me mona nde Nzambi me zenga nde kimfumu ya Saule ta zinga ve, sambu yandi me lemfuka ve na Nzambi. Saule me meka mbala mingi na kufwa Davidi, kansi yandi lungaka ve. Davidi me mona ntangu ya yandi lendaka kufwa Saule, kansi yandi buyaka, sambu yandi monaka nde, Nzambi me tula Saule mfumu, yo yina, kele kaka Nzambi ya lenda katula yandi. Davidi songaka Saule mpila yandi me wila yandi mawa, yo yina Saule pindulaka mabanza ti monaka nde yandi me sala mbi. Yandi ndimaka nde yandi ta zomba Davidi diaka ve.

## III. Kulonga Leso Yai—

- Kuyantika :  
Keti yandi ta bambuka promese yina, to yandi ta balula diaka na kusosa Davidi ? Ti nki Davidi ta sala kana Saule yantika kuzomba yandi diaka ?
- Developpement (Malongi ya nene ya lesu yai na banti 6 ) :  
23.1 Davidi bikalaka kaka na nseke. Na ntangu fioti, yandi waka nde Saule vandaka kuzomba yandi diaka. Yandi tindaka bantu ya zikisaka nde kieleka yo vandaka mpidina. 1 Samuele 26 :1-4
- Tangila bana :

- 1 Bantu ya nkaka ...kwendaka na Saule ...bo songaka yandi nde Davidi me bumbana ...na ngumba...
- 2 Saule bakaka basoda mile tatu (3,000)..., ebuna yandi kwendaka na ntoto ya zelo na zelo ...sambu na kusosa Davidi.
- 3 Yandi tungaka camp na yandi ...Davidi ...waka nde Saule me kwisa kusosa yandi,
- 4 yandi tindaka bantu na kutala ti kuzaba mpenza kaka Saule me kwisa. Yandi monaka nde yo kele kieleka.

? Yula bana :

Niveau prescolaire –

- Saule sosaka Davidi diaka, to yandi sosaka Davidi ve ? (Yandi sosaka Davidi diaka.)

Niveau primaire –

- Bantu ya Davidi me kuma 600. Saule landaka yandi na basoda ikwa ? (3,000. Cinq fwa basoda ya Davidi !)
- Niveau secondaire –
- Davidi monaka nde nki vandak kieleka ? (Nde Saule me landa yandi diaka na basoda mingi)

Bana sala bageste :

Saule vandaka na basoda 5 sambu na konso soda ya Davidi. Sambu na kusonga yo, bana tanga 1,2,3,4,5. Tula bo apart, basoda ya Saule. Bo tanga mwana mosi, soda ya Davidi. Bo landa kutanga tii ntangu bana yonso me kuma soda ya Saule to ya Davidi.



Bana yimba ti kina :

Saule salaka ve promese yandi tubaka. Yandi landaka Davidi na basoda mingi.

23.2 Davidi monaka Saule ti basoda yonso na yandi kulala mpongi ya ngolo. Nsadisi na yandi Abishai zoaka kufwa Saule, kansi Davidi kangaka yandi nzila. 1 Samuele 26 :5-10 □ Tangila bana :

...6 Ntangu yai, Davidi yulaka Ahimeleki..., ti Abishai ... nde : « Nani ke kwenda ti mono na camp ya Saule ? Abishai vutulaka nde : « Mono...ke kwenda ti nge. »

7 Ebuna na kati ya mpimpa, Davidi ti Abishai kwendaka kukota na camp ya Saule. Saule vandaka ke lala na kati-kati ya camp mpenza... Abnere ti basoda na yandi ...me lala.

8 Abishai tubilaka Davidi nde : « Nzambi me pesa mbeni na nge na maboko na nge bubu yai. Bika mono, mono fwa yandi na dikonga na yandi mosi. Mono bula yandi mbala mosi tii na ntoto. Mono ta bula yandi mbala ya zole ve ! »

9 Kansi Davidi nde : « Kufwa yandi ve ! Nani lenda tula diboko na muntu yina ya Mfumu Nzambi solaka, kukonda ndola ?

10 Na zina ya Mfumu Nzambi ...ya moyo, mono ke zaba nde Mfumu Nzambi Yandi mosi ta fwa Saule kana ntangu na Yandi me lunga, to na bitumba.

? Yula bana :

Niveau prescolaire –

- Keti Davidi ndimaka kufwa Davidi, to yandi ndimaka ve ? (Yandi ndimake ve.)

Niveau primaire –


- Sambu na nki Davidi ndimaka ve kufwa Saule ?  
(Sambu Nzambi me sola yandi kuvanda ntotila)

Niveau secondaire –

- Davidi monaka nde nani fweti kufwa Saule ?

(Nzambi Yandi mosi na mpila na Yandi ti na ntangu na Yandi) □ Bana sala bageste :

Bana sala bageste bonso bo ke buya kufwa

Saule. Bo tuba nde, « Kufwa yandi ve ! » 

Bana yimba ti kina :

Mbala ya zole, Davidi  
Buyaka na kufwa Saule.

23.3 Ebuna yandi bakaka dikonga ti dibungu ya masa ya vandaka kulala penepene na ntu ya Saule, yandi kwendaka na yo. 1 Samuele 26 :11b-12

□ Tangila bana :

11 b Beto baka kaka dikonga na yandi ti dibungu na yandi ya masa. Beto kwenda. »

12 Yo yina, Davidi bakaka dikonga ti dibungu yina vandaka na ntu ya mbeto ya Saule. Bo kwendaka ka bo. Ata muntu mosi ve telamaka na mpongi to kumonaka bo to kuzabaka nki mambu me bwa. Bo yonso vandaka kulala kaka, sambu Mfumu Nzambi tindaka bo mpongi ya ngolo.

? Yula bana :

Niveau prescolaire –

- Nani tindaka Saule ti basoda na yandi mpongi ya ngolo ?  
(Mfumu Nzambi)

Niveau primaire –

- Davidi simbaka nki kukwenda na yo ?  
(Dikonga ti dibungu ya masa ya Saule)

Niveau secondaire –

- Sambu na nki bo bakaka bima yai ? (Sambu na kusonga nde kieleka bo vandaka kuna, bo monaka mpila kufwa yandi kana bo zolaka) □ Bana sala bageste :

Bana sala bonso bo ke tambula malembe kukonda makelele, bo simba bima zole, bo basika na malembe.



Bana yimba ti kina :

Davidi simbaka dikonga

Ti dibungu ya masa ya Saule.

Yandi kwendaka na yo.

Yandi kwendaka na yo.

23.4 Davidi bingaka mfumu ya basoda ya Saule, Abnere, nde, Sambu na nki nge ke kengila mfumu na nge ve ? Bo yonso telamaka na mpongi, ti Saule bakisaka nde Davidi me wila yandi mawa diaka. 1 Samuele 26 :13-20 □ Tangila bana :

13 Davidi lutaka na simu ya nkaka ya dibulu. Yandi telamaka mwa-ntama ti camp na zulu ya ngumba,

14 ebuna yandi bingaka na ndinga ya ngolo basoda ya Saule ti Abnere nde : « Abnere, keti nge ke wa mono ve ? » ...

15 Davidi nde : « ...sambu na nki nge ke kengila ve mfumu na nge, ntotila ? Muntu mosi kwisaka kukota na camp na beno na kufwa mfumu na nge.

16 ...Wapi dikonga ya ntotila ? Wapi dibungu ya nasa yina vandaka na ntu ya mbeto na yandi ?

17 Saule zabaka nde yina ndinga ya Davidi, ebuna yandi yulaka yandi nde : « Yina nge, mwana na mono Davidi ? » Davidi nde : « E, mfumu, yai mono.

18 Mfumu, sambu na nki nge ke landa diaka mono, muntu na nge ? Nki mono me sala nge ? Nki mbi mono me sala ?

20 ...Mfumu, sambu na nki nge ke kwisa kusosa kufwa mono yai, niama ya mpamba ? Sambu na nki nge ke kwisa kukula mono bonso muntu me kwenda kuzomba bangwadi na bangumba ?

? Yula bana :

Niveau prescolaire –

- Davidi bingaka, to yandi vutukaka na nzo ? (Yandi bingaka.)

Niveau primaire –

- Davidi bingaka na nani ? (na Abnere, mfumu ya basoda ya Saule)

Niveau secondaire –

- Nki kestio ya nene Davidi yulaka Saule ? (Sambu na nki nge ke sosa kufwa mono ?)

□ Bana sala bageste :

Bana sala bageste bonso bo ke binga. Bo tuba nde, « Saule, Saule. »



Bana yimba ti kina :

Saule, sambu na nki Nge ke sosa mono diaka?

23.5 Saule ndimaka masumu na yandi diaka ti silaka diaka nde yandi ta bika mambu yai ya kuzomba Davidi. 1 Samuele 26 :21-25 □ Tangila bana :

21 Saule vutulaka nde : « Mono me sala mbi. Kwisa kuvutuka, mwana na mono Davidi. Mono ta sala diaka nge mbi ve, sambu nge me fwa mono ve bubu. Ya kieleka, mono me sala buzoba. Mono me wila mingi mpenza. »

22 Davidi nde : « Mfumu, tala dikonga na nge yo yai. Tinda muntu na nge mosi, yandi kwisa kubaka yo.

23 ...Bubu yai, (Nzambi) me pesa nge na maboko na mono, kansi mono me sala nge kima ve, sambu nge kele ntotila yina ya Yandi mosi Mfumu Nzambi tulaka. » ....

25 Saule tubaka na Davidi nde : « Nzambi kusakumuna nge, mwana na mono. Konso kima ya nge ta zola kusala, nge ta sala yo mpi. » Ebuna Davidi kwendaka nzila na yandi, Saule mpi vutukaka na bwala.

? Yula bana :

Niveau prescolaire –

- Na nsuka, keti Saule fingaka Davidi, to yandi sakumunaka yandi ? (Yandi sakumunaka yandi.)

Niveau primaire –

- Na nsuka, keti Saule vandaka kuzomba Davidi diaka, to yandi me bika ? (Yandi me bika) Niveau

secondaire –

- Sambu na nki Saule bikaka kuzomba Davidi ? (Sambu Davidi monaka mpila na kufwa yandi, kansi yandi wilaka Saule mawa diaka.)

Bana sala bageste :

Bana sala bandambu zola, basoda ya Saule ti basoda ya Davidi. Makambu me mana, bo yonso vutuka na banzo na bo na ngemba.



Bana yimba ti kina :

Makambu sukaka mbote Na ngemba yonso. Davidi wilaka Saule mawa, Bo yonso kwendaka.

23.6 Kansi Davidi bakisaka nde Saule lenda balula diaka ti kufwa yandi. Yo yina, yandi kwendaka kuzinga na kati ya bantu ya Filistia.

1 Samuele 27 :1, 5-7

Tangila bana :

27 :1 Davidi tubaka na nsi ya ntima nde : « Kilumbu kele mona ta fwa na maboko ya Saule. Mbote mono tina kaka na ntoto ya bantu ya Filistia. Mpidina Saule ta bikisa na kusosa mono na ntoto ya Israele. Mono ta vanda mpi na ngemba kuna. »

5 Davidi tubilaka Akishi (Mfumu ya bwala sika yandi tindaka) nde « Mfumu, kana nge ke mona mono mbote, bika mono, mono tunga na bwaka ya nkaka. Yo kele mfunu ve mono na kubikala ti nge awa na bwala yai ya kimfumu. »

6-7...Akishi pesaka yandi bwala Sikilagi na kutunga...Davidi zingaka na ntoto ya bantu ya Filistia mvula mosi na na bangonda iya.

? Yula bana :

Niveau prescolaire –

- Davidi kwendaka kuzinga na kati ya nki bantu ? Bantu ya... (Filistia)

Niveau primaire –

- Davidi lombaka mfumu ya bwala kupesa yandi nki ? (Bwala ya nkaka ya yandi mosi kutunga.)

Niveau secondaire –

- Mfumu pesaka Davidi bwala Sikilagi, ti Davidi zingaka kuna ntangu ikwa ? (Mvula mosi ti bangonda iya)

Bana sala bageste :

Bana sala bageste bonso bo ke tunga banzo. Bo tuba nde, « Beto ke tunga bwala Sikilagi. »



Bana yimba ti kina :

Davidi tungaka bwala  
Yandi zingaka na ngemba.

>|< Kumanisa :

Saule salaka Davidi mbi mbala mingi. Kana Davidi vutulaka yandi mbi, mvita ya ngolo zolaka kuvanda. Kansi Davidi vutulaka mbi ve. Yandi salaka Saule mbote. Yandi wilaka yandi mawa. Mbala zole, yandi monaka mpila na kufwa Saule, kansi yandi salaka Saule kima ve.

Na nsuka, Saule basikaka ti bikisaka Davidi diaka na ngemba.

Kuvutula mbi na mbi ke matisaka makambu. Yindula. Kana muntu sala nge mbi, ti nge vutula, nge me sala yandi mbi. Yandi mona nde yandi fweti vutula nge, ebuna yandi sala nge mbi diaka. Ebuna nge fweti vutula yandi mbi. Ebuna yandi fweti vutula nge mbi. Ebuna nge fweti vutula yandi. Yo kwendaaaaa. Nki mutindu yo lenda suka? Verse na beto bubuyai ke songa yo. Beno me longuka yo dezia.

Verse ya bubu yai :

Matayo 5 :44 : Bandinga ya Yesu Kristo : «  
...Mono ke tubila beno nde:/ Beno zola bambeni na beno,/ samba Nzambi sambu na bantu/ yina ke monisaka beno mpasi. »

Bankunga ya kwenda nzila mosi  
ti lesa :

Bana yimba nkunga mosi diaka ya ke kwenda nzila mosi ti lesa yai.

Devoir sambu na bakristo :

Devoir mono ke pesa beno bakristo, yo yai : Na mposo yai, konso ntangu muntu sala nge mbi, to tuba mbi sambu na nge, wila yandi mawa ti vutula yandi mbote. Yo ta sadisa mingi nde makambu yina kumana.

Kubinga bavidu na Yesu :

Beto yonso me sala Nzambi mbi. Yandi me pesa beto moyo ti bima mingi ya mbote, sambu beto lenda pesa Yandi lukumu. Kansi mbala mingi, beto me yindula Yandi ve. Beto me vutula Yandi matondo ve. Beto me sala mambu mingi ya lunga ve na meso na Yandi. Kansi na mawa na Yandi, Yandi me tindila beto Mwana na Yandi, Yesu Kristo. Na mawa na Yandi, Yesu ndimaka kumona mpasi ti kufwa sambu na kufuta mfuka ya mbi na beto. Yandi me telama na lufwa, Yandi me vutuka na zulu, ti Yandi kele na moyo bubuyai. Yandi ta kuwa beto kana beto binga zina na Yandi. Kana nge zola vutuka na Nzambi bubuyai, balula ntima na nge, kutula kivuvu kaka na Yandi, kwisa kumona mono na nima ya ecodim. Mono ta vanda na kiese na kusadisa nge. To, nge lenda binga zina na Yandi ti balula ntima konso ntangu, sambu makutu na Yandi kele kukangula na kubinga na nge. ==NSUKA YA LESO 23

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

## Leso 24 Nzambi buyaka Saule sambu yandi sosaka nganga-ngombo.

1 Samuele 28

### I. Preparatio ya Moniteur—

Kikuma ya lesu :

Beto sosa lusadisya ya Nzambi, ebuna beto sosa yo ve na banganga-ngombo, bafetishe, magie, kindoki, etc.

Verse ya bubu yai :

Kana bantu kusonga beno na kwenda kuyula banganga-ngombo/...kana bo tuba nde : /« Beno kwenda kaka sambu beto fweti yula badiabulu ti bamvumbi/...beno ta vutula nde,/ « Beno wa malongi ya Mfumu Nzambi ke pesa beno !/ Beno wila banganga ve... »/ Yezaya

8 :19-20  Bankunga ya kwenda nzila mosi

ti lesu :

Banzambi ya Nkaka

Banzaaa-mbi ya nkaka

Bantu me sala yo

Nge kaka ke Nzambi Ya salaka beto !

Lomba na Nzambi Kaka

Beto fweti Iombila

Na Nzambi, Yandi kaka

Ata muntu mosi ve Ya

nkaka lenda sadisa !

Mvutu :

Lomba na Nzambi ! Na

Nzambi kaka

Lomba na Nzambi Na

zina ya Yesu !

Vutuka, Afrika ! Vutuka !

Vutuka, Afrika, vutuka !

Vutuka na Nzambi nge me vila

Beto bika bampeve yonso, biteki yonso,

Beto vutuka n'andi ya salaka beto !

Beto vutuka n'andi ya salaka beto !

### II. Revisio—

Kulanda devoir ya lesu me luta : Na lesu me luta, beto pesaka beno bakristo devoir ya kuvutula mbote konso ntangu ya muntu sala nge mbi. Nani lenda songa beto mutindu yandi salaka yo na mposo me luta ?

Kuyindula diaka baleso me luta:

Na lesu me luta, beto monaka mpila nde Saule landaka diaka kuzomba Davidi. Beto monaka mpila Davidi monaka mpila na kufwa yandi, kansi yandi salaka yo ve. Yandi wilaka Saule mawa diaka. Saule tubaka nde pardo, mono me sala mbi. Kansi Davidi bakisaka nde yandi lenda baluka diaka, nde lumbu mosi Saule lenda kufwa yandi. Yo yina, yandi bikisaka ntoto na yandi Israele. Yandi kwendaka kuzinga na kati ya bantu ya Filistia. Yandi tungaka bwala kuna zina ya Sikilagi.

### III. Kulonga Leso Yai—

Kuyantika :

Saule me sala mbi na meso ya Nzambi mbala ikwa ? (Ee, mbala mingi.) Keti yandi ta vutuka na Nzambi, to yandi ta landa kaka na nzila na yandi mosi ? Bubuyai beto ta mona nde yandi salaka mambu mosi ya mbi diaka. O, mawa na Mfumu Saule !

Developpement (Malongi ya nene ya lesu yai na banti 5) :

24.1 Bantu ya Filistia kwisaka kunwanisa Israele, yo yina Saule yulaka Nzambi nki kusala, kansi Nzambi pesaka mvutu ve.

1 Samuele 28 :1, 5-6

□ Tangila bana :

1 Na ntangu yango yina, bantu ya Filistia bingaka basoda na bo sambu na kwenda kunwana bitumba na bantu ya Israele....

5 Ntangu Saule monaka camp ya basoda ya Filistia, boma simbaka yandi mingi ti kutekita.

6 Yandi yulaka Mfumu Nzambi, kansi Yandi pesaka yandi mvutu ve, ata na (konso mutindu yandi sosaka).

? Yula bana :

Niveau prescolaire –

- Saule monaka nde basoda ya Filistia me kwisa. Yandi vandaka na kiese na yo, to na mawa na yo ?  
(Mawa na yo)

Niveau primaire –

- Sambu na nki Mfumu Saule vandaka na boma ? (Sambu basoda ya Filistia me kwisa kunwanisa bo bantu ya Israele.)

Niveau secondaire –

- Saule lombaka Nzambi nki kusala, kansi Nzambi pesaka mvutu ve. Nge banza yai lenda songa nki ? (Yandi me sala mbi, me zenga kintwadi ti Nzambi.)

□ Bana sala bageste :

Bana sala mwa-senete zole-zole. Mosi sala bonso Saule, kusonga boma. Mosi sala bonso Nzambi. Saule samba Nzambi, kansi Nzambi balula, pesa Yandi mukongo, fika makutu na Yandi.



Bana yimba ti kina :

Saule bingaka Nzambi

Kansi Nzambi kangaka makutu.

Yai lenda songa nki ?

Yai lenda songa nki ?

24.2 Yo yina, Saule kwendaka na kinsweki kusosa nganga-ngombo, ata yandi mosi dezia me basisa bo yonso na ntoto, bonso ndinga ya

Nzambi ke lomba. 1 Samuel 28 :3, 7-10 □

Tangila bana :

3 Na ntangu (ya lufwa ya Samuele), Saule basisaka nsiku nde bantu kwenda diaka ve kuyula banganga-nkisi to bangangangombo.

(NB sambu na bana ya me yela :

Na français yo ke tuba nde yandi basisaka bo na ntoto ya Israele. Nzambi me pesa Moize nsiku nde bandoki lenda kuzinga ve (Kubasika 22 :17).

7 Ntangu yai, Saule tubaka na bantu na yandi nde : « Beno sosila mono nkento mosi kele nganga-ngombo. Mono kwenda kuyula yandi. » Bo tubaka nde : « Ke na nkento mosi na bwaka Ene-Dore kele nganga-ngombo. »

8 Saule katulaka bilele. Yandi lwataka bilele ya nkaka, na mpila nde bantu kuzaba ve nde yai ntotila Saule, ebuna na mpimpa yandi kwendaka...Yandi tubilaka nkento nde, « Pardo, yula bankaka na mono me fwaka, nge zabisa mono mambu ke kwisa. Bingila mono muntu ya mono ke songa nge. »

9 Nkento yina tubaka nde : « Nge zaba mbote-mbote mambu ya Ntotila Saule me sala, mutindu yandi me kula-kula banganga-nkisi ti banganga-ngombo na Israele. Ebuna sambu na nki nge ke sosila mono lufwa ? »

10 Saule nde : « Mono ke zenga na zina ya Mfumu Nzambi, Nzambi ya moyo, nde mpasi ta bwila nge ve ata fioti kana nge sala yo. »

? Yula bana :

Niveau prescolaire –

- Saule kwendaka kuyula nani—pasteur, to nganga-ngombo ?

(Nganga-ngombo)

Niveau primaire –



- Sambu na nki Saule kwendaka na lele ya nkaka bonso yandi vandaka muntu ya nkaka ?  
(Sambu bantu kuzaba ve nde yandi ya kulaka bandoki ke kwenda kumona ndoki.)

Niveau secondaire –

- Sambu na nki nganga-ngombo yina zolaka ve kusala yina ya Saule lombaka ?  
(Yandi banzaka yo vandaka mutambu sambu na kukanga yandi na mambu ya vandaka nsiku.)

Bana sala bageste :

Bana sala bageste bonso bo kele Saule ke lwata bilele ya nkaka, ke kwenda malembemalembe.



Bana yimba ti kina :  
Ntete Saule katulaka bandoki Na nima, yandi mosi sosaka bo.  
O, mawa !  
Ata Nzambi kuzolaka yo ve.

24.3 Yandi lombaka nganga-ngombo yina kutedimisa Samuele, ye yandi salaka yo. 1 Samuele 28 :11-14

Tangila bana :

11 Nkento nde : « Nge zola mono bingila nge nani ? » Saule nde : « Samuele. »

12 Ntangu nkento monaka Samuele, yandi tulaka ndinga ya ngolo, ebuna yandi tubilaka Saule nde : « Si, nge mfumu Saule ! Sambu na nki nge me kusa mono ? »

13 Yandi nde : « Kumona boma ve. Nki nge ke mona ? » Nkento nde : « <Mono ke mona bonso muntu mosi na nsi ya ntoto ke kwisa kutombuka. »

14 Saule yulaka yandi nde : « Yandi kele nki mutindu ? »

Yandi nde : « Yandi kele mbuta-muntu, me kudifika mvwela. » Saule zabaka nde yina Samuele. Yandi fukamaka ilungi na ntoto sambu na kusonga luzitu.

? Yula bana :

Niveau prescolaire –

- Saul zolaka nkento yina kubinga nani ?  
(Samuele, mutubi ya Nzambi)

Niveau primaire –

- Nki ke songa nde nkento yina vandaka na boma ntangu yandi monaka Samuele ?  
(Yandi tubaka na ndinga ya ngolo) Niveau

secondaire –

- Ntangu yandi monaka Samuele, nkento yina zabaka nki ? (Nde muntu yina vandaka kusosa yandi vandaka Ntotila Saule.)  Bana sala bageste :

Bana sala geste ya ke songa boma sambu bo me mona muntu ya me fwaka dezia.



Bana yimba ti kina :

Samuele kwisaka kusolula na Saule.

24.4 Samuele vutulaka nsangu mosi ya mawa. Nzambi me bika Saule, me kuma mbeni na yandi, Yandi ta katula yandi kimfumu, ti mbasi yandi ta bana na yandi yonso, bo ta fwa na mvita. Israele mpi na nunga ve. 1 Samuele 28 :15-19  Tangila bana :

15 Samuele yulaka Saule nde : « Sambu na nki nge me kwisa kuyangisa mono na kubinga mono awa ? » Saule nde : « Mono ke na mpasi mingi. Bantu ya Filistia me kwisa kunwanisa mono, ebuna Nzambi me bikisa mono. Yandi me pesa mvutu ve, ata na munoko ya bapofete, ata na bandosi.

Yo yina, mono me binga nge, nge songa mono, mono sala nki. »

16 Samuele nde : « Sambu na nki nge fweti binga mono, kana Mfumu Nzambi Yandi mosi me bikisa nge, Yandi me kuma mbeni na nge ?

17 Mfumu Nzambi me sala nge mutindu Yandi tubaka na munoko na mono. Yandi me botula kimfumu na maboko na nge. Yandi me pesa yo na muntu ya nkaka, Davidi.

18 Nge landaka ve nsiku ya Mfumu Nzambi. Nge fwaka ve kimakulu bantu ya diakanda ya Amaleki ti bima na bo yonso. Yo yina, Mfumu Nzambi ke sala nge mambu ya mutindu yai bubu.

19 Yandi ke pesa nge ti bantu na nge, bantu ya Israele, na maboko ya bantu ya Filistia. Mbasi nge ti bana na nge, beno ta kwisa kukuta mono na nsi ya bafwa, ebuna basoda na nge, Mfumu Nzambi ta pesa bo na maboko ya bantu ya Filistia. »

? Yula bana :

Niveau prescolaire –

- Samuele pesaka Saule nsangu ya kiese, to ya mawa ? (Ya mawa mingi.)

Niveau primaire –

- Samuele songaka Saule nde Nzambi vandaka nki mutindu ti yandi ? (Me bikisa yandi, me kuma mbeni na yandi)
- Sambu na nki Nzambi me kuma mbeni ya Saule ?  
(Sambu yandi lemfukilaka Nzambi ve.)

Niveau secondaire –

- Nki mambu iya ya mpasi ta salama mbasi ?  
(1. Nzambi ta katula kimfumu na Saule, 2. Yandi ta fwa, 3. Bana yonso

na yandi ta fwa, 4. Bantu ya Filistia ta bedisa bo na mvita.)  Bana sala bageste :

Bana songa misapi iya. Bo tuba nde, « Ndola iya sambu na nge, Saule. »



Bana yimba ti kina :

Kimfumu ya katuka na Saule, O mawa, mawa !

Saule fweti kufwa mbasi, O mawa, mawa !

Bana ta fwa mbasi, mpi O mawa, mawa !

Basoda ya Israele ta nunga ve O mawa, mawa !

24.5 Ntangu Saule waka nsangu yina, yandi bwaka na ntoto, ti ngolo na yandi kumanaka. 1 Samuele 28 :20

Tangila bana :

20 Na mbala mosi, Saule bwaka na ntoto, yandi lala yandi ya mvimba na ntoto, sambu mambu ya Samuele tubilaka yandi, yo pesaka yandi boma mingi. Yandi vandaka petepete na nitu...

? Yula bana :

Saule waka nsangu ya mawa yina, ebuna yandi salaka nki ? Yandi fingaka Samuele, to yandi kubwaka na ntoto ? (Kubwaka na ntoto)



Bana sala bageste :

Bana tuba, « Aiii » ti bo kubwa na ntoto. [Moniteur, keba nde muntu kulwala ve.]



Bana yimba ti kina :

Yai mambu ya nsuka Kusosa nganga-ngombo.

Nsangu kaka ya mawa.  
Mbasi Saule fweti fwa. >|<  
Kumanisa :

Bana, Nzambi zola sadisa bantu na Yandi. Kana Yandi kuwa ve, mbote beto kudiya keti beto kele kulanda Yandi mbote. Kana Yandi pesa mvutu ve, yai ke songa ve nde beto kwenda kusosa lusadisu na bandoki, na bangangombo, na magie, na bafetishe. Bima yai kele ya Nzambi ve. Yo kele ya Satana, ya bampeve ya mbi. Yo yina, nsiku ya Nzambi kele kubuya yo. Saule me sala mambu mingi ya mbi, kansi kusosa nganga-ngombo, yina mambu ya nsuka. Nzambi tangaka zuzema ya ngolo na zulu na yandi.

Verse ya bubu yai :

Kana bantu kusonga beno na kwenda kuyula banganga-ngombo/...kana bo tuba nde : /«  
Beni kwenda kaka sambu beto fweti yula badiabulu ti bamvumbi/...beno ta vutula nde,/  
« Beni wa malongi ya Mfumu Nzambi ke pesa beni !/ Beni wila banganga ve... »/ Yezaya 8 :19-20  Bankunga ya kwenda nzila mosi ti leso :

Bana yimba mosi ya bankunga ya kwenda nzila mosi ti leso yai.

Devoir sambu na bakristo :

Mambu mono ke pesa beni bakristo, yo yai, yantika bubu ti kuna, kwenda diaka ve kusosa bafetishe, bamagie, etc. Kwenda kaka kusosa Nzambi na beto. Kana Yandi kuwa ve, yindula kana nge kele kulanda nzila na Yandi mbotembote. Ebuna landa kaka kusamba ti kutula Yandi ntima. Kana nge kele na fetishe, nata yo na pasteur sambu yandi sadisa nge kuyoka yo. Bavidi ke sosa lusadisu ya bampeve ya mbi, kansi bakristo ke sosa Nzambi na bo kaka.

Kubinga bavidi na Yesu :

Kana nge zaba ntete ve kana nge me balula ntima na Yesu Kristo, mono zola nge kuyindula mambu yai: Nzambi kumaka MBENI ya Saule. Samuele songaka Saule nde mbasi yandi ta fwa, ti Nzambi kele mbeni na yandi. O, mawa mingi na kufwa kana Nzambi kele mbeni na nge !

Mambu ya kieleka kele nde Nzambi kele mbeni ya konso muntu tii ntangu yandi balula ntima ti kota na nzila ya Yesu Kristo, Mwana ya Nzambi. Beto kele bambeni ya Nzambi sambu beto kele bantu ya mbi ya pesa Yandi lukumu ve. Kansi Nzambi zola vanda nduku na nge. Yandi tindaka Mwana na Yandi ya kitoko sambu Yandi katula kimbeni na kati na beto ti Nzambi. Yai kele raiso Yesu fwaka na zulu ya kulunsi. Kansi Yandi bikalaka na lufwa ve. Yandi telamaka, Yandi vutukaka na Tata na Yandi na zulu. Yandi kele na moyo bubuyai. Yandi lenda kuwa nge kana nge binga zina na Yandi bubuyai. Yandi ke kinga nge kubalula ntima, kukota na nzila na Yandi. Kana bubu yai nge mona nde nge kele na mfunu na Yandi, nge lenda binga zina na Yandi. Ndima masumu na nge. Lomba Yandi mawa ti ndolula. Kana nge zola kusamba ti muntu ya nkaka, beto kele awa konso mposo na nima ya ecodim, kana sambu na kusadisa nge.

==NSUKA YA LESO 24

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)

Leso 25 Saule fwaka na mvita.  
1 Samuele 31

## I. Preparatio ya Moniteur—

- Kikuma ya lesu :

Beto tula ntu-ngolo ve, kansi beto vanda nswalu na kuwa ndongisila ya ndinga ya Nzambi. Kana beto kubwa na masumu, beto vanda nswalu kuvutuka na nzila.

- Verse ya bubu yai :

Kana nge ke tula ntu-ngolo/ konso ntangu bo ke pesa nge ndongisila./  
Kilumbu kele/ ntu na nge ta pasuka./ yo ta yilama diaka ve./ Bingana 29 :1

- Bankunga ya kwenda nzila mosi ti lesu :

Kuwa Bible

Kuwa Bible  
Tanga Bible ‘Buna  
nge ta mona Nzila  
mbote mingi  
Nzila mbote mingi  
Ye ngangu I Ye  
ngangu !

Kuwa Bible  
Tanga Bible  
‘Buna nge ta  
zaba

Mabanza ya Nzambi  
Mabanza ya Nzambi  
Na beto ! Na beto !

## II. Revisio—

- Kulanda devoir ya lesu me luta : Na mposu me luta, beto lombaka beno bakristo kubika mambu yonso ya bafetishe ti ya bamagie. Nani vandaka na fetishe ya yandi losaka ? Nani ta songa beto nki yandi salaka na mambu yina ? Vraima, felisitasio na beno ya ke tula ngolo kusala badevoir ya beto ke pesa beno. Beno bana ya ta yela na kikristo.
- Kuyindula diaka baleso me luta:

Na lesu me luta, beto monaka nde Saule salaka masumu diaka. Yandi zabaka nde ndinga ya Nzambi buyaka bantu na Yandi kukwenda na bantu ya magie, yo yina, na bilumbu ya ntama, yandi basisaka bo na ntoto. Kansi mbala yai, Nzambi zola kuwa yandi diaka ve sambu na mbi yandi me sala, yo yina, yandi vutuka na nzila ya mbi. Yandi sosa lusadisya ya nganga-ngombo.

Nganga bingaka Samuele, ti Samuele tubaka nde yo vandaka mambu ya nsuka, nde mbasi Saule ta fwa ti bana-bakala na yandi yonso. O, mawa na Saule !

## III. Kulonga Lesu Yai—

- Kuyantika :

Keti lufwa ya Saule ta salama mutindu Samuele me tuba ? Beto ta mona bubuyai.

- Developpement (Malongi ya nene ya lesu yai na banti 3 ) :

25.1 Mbasi, na nima Saule me basika na nganga-ngombo, bo kwendaka kunwana na bantu ya Filistia. Bana yonso tatu ti Saule yandi mosi fwaka na mvita. 1 Samuele 31 :1-6

- Tangila bana :

1 ...bantu ya nsi ya Filistia nwanaka bitumba na bantu ya Israele... Bantu mingi ya Israele kufwaka, bantu ya nkaka tinaka.

2 Bantu ya Filistia landaka Saule ti bana na yandi. Bo kangaka bo, ebuna bana na yandi yai Yonatani, Abinadabi, ti Malkishua, bo fwaka bo.

3 Ntangu yai, bitumba yonso me bika kaka na maboko ya Saule mpamba. Bambeni yina vandaka na babunduki ya toloto, bo monaka yandi, ebuna Saule, boma simbaka yandi mingi.

4 Yandi tubaka na muntu yina vandaka kunatila yandi bima ya bitumba nde : « Baka mbele na nge, fwa mono. Mono ke zola ve nde bamimpani yai kwisa kufwa mono ti kufinga mono. » Kansi yandi buyaka, sambu yandi waka boma. Yo yina, Saule bakaka mbele na yandi mosi, yandi tumikaka no na ntoto, yandi bwaka na zulu na yo....

6 Mutindu yo yina Saule, bana na yandi tatu...bo fwaka kilumbu yo yina mosi.

? Yula bana :

Niveau prescolaire –

- Saule ti bana na yandi, bo fwaka na lumbu mosi, to na bilumbu mingi ?  
(Na lumbu mosi)

Niveau primaire –

- Bantu ya Filistia fwaka bana ya Saule, kansi Saule, nani fwaka yandi ?  
(Yandi kudifwaka, yandi mosi)

Niveau secondaire –

- Sambu na nki Saule zolaka ve nde bantu ya Filistia kufwa yandi ?  
(Yandi monaka nde bo ta finga yandi.)

Bana sala bageste :

Konso ntangu nge tuba nde muntu me fwa, bana sala geste bonso kudila.

Bo fwaka Yonatani, mwana ya Saule.

Bo fwaka Abinadabi, mwana ya Saule.

Bo fwaka Malkishua, mwana ya Saule. Saule kudifwaka yandi mosi.



Bana yimba ti kina :

Mawa, mawa ! Mfumu Saule me fwaka.

Mawa, mawa ! Bana na yandi me fwaka.

Ndola ya Nzambi me simba bo.

25.2 Bantu ya Filistia vandaka kukumisa banzambi na bo na mambu yina. 1 Samuele 31 :7-10

Tangila bana :

8 ...bantu ya Filistia kwisaka sambu na kuyiba bima ya bamvumbi bikaka. Bo monaka mvumbi ya Saule ti bana na yandi tatu...

9 Bo zengaka Saule ntu, bo bakaka bima na yandi ya bitumba, ebuna bo tindaka bantu na kwenda kuzabisa nsangu yai ya mbote na ntoto yonso ya Filistia na banzambi na bo ti na bantu na bo.

10 Na nima, bo tulaka bima ya Saule ya bitumba na nzo ya...nzambi na bo ya nkento. Nitu na yandi, bo kangaka yo na kibaka ya bwala...

? Yula bana :

Niveau prescolaire –

- Bantu ya Filistia tulaka bima ya Saule ya bitumba na nzo-Nzambi, to na nzo ya nzambi na bo ya kiteke ? (Na nzo ya nzambi na bo)

Niveau primaire –

- Bantu ya Filistia salaka nki mambu ya nsoni na mvumbi ya Saule ?  
(Bo zengaka yandi ntu.)

Bana sala bageste :

Moniteur, nge tuba mambu ya salamaka. Konso mambu nge tuba, bana dila bonso bantu ya Israele.

Bantu ya Filistia monaka bamvumbi ya Saule ti bana na yandi. (Bana dila.)

Bo zengaka Saule ntu. (Bana dila.)

Bo songaka bantu yonso ya Filistia nde Saule me fwaka, ti bana na yandi. (Bana dila.)

Bo tulaka bima na yandi ya bitumba na nzo ya

kiteke na bo. (Bana dila.) Bana yimba ti kina :

Bana yimba na mawa :

Lumbu ya mawa Ya  
nsoni mingi.

Mfumumu ya Israele Mene  
fwaka.

25.3 Bantu ya Yabesi-Gileadi katulaka bo nsoni  
ti yikaka bamvumbi na bo. 1 Samuele 31 :11-  
13

Tangila bana :

11 Ntangu bantu ya bwala Yabeshi  
...waka mambu ya bantu ya Filistia salaka  
Saule,

12 bantu na bo ya kuluta kikesa kwendaka  
mpimpa-mpimpa.... Bo katulaka bamvumbi  
ya Saule ti bana na yandi na kibaka, bo  
kwisaka ti bo na Yebeshi, ebuna bo yokaka bo  
kuna.

13 Ntangu yai, bo bakaka mikwa na bo,  
bo zikaka yo na nsi ya nti yina tamarisi na  
bwala na bo Yabeshi. Na nima, bo buyaka  
kudia bilumbu nsambwadi.

? Yula bana :

Niveau prescolaire –

- Bantu ya Yabeshi zikaka mikwa ya Saule  
na nsi ya nki—nzo, to nti ya tamarisi ?  
(Nti ya tamarisi)

Niveau primaire –

- Sambu na nki nge banza bo yokaka  
bamvumbi tiya na ntwala kuzika yo ?  
(Mbala ya nkaka sambu na nsudi. Bo me  
lala na nganda ndambu bilumbu, ti Israele  
kele nsi mosi ya ndambu tiya.)

Niveau secondaire –

- Sambu na nki bo buyaka kudia bilumbu  
nsambwadi ?  
(Kusonga mawa sambu Mfumumu na bo me  
fwa.)

Bana sala bageste :

Tula bana na bandambu zole. Ndambu mosi ta  
tanga tii na nsambwadi, malembemalembe.

Konso nombre ya bo ta tuba, bana na ndambu  
ya zole ta dila bonso bo ke dila lufwa ya  
mfumu.



Bana yimba ti kina :

O, mawa, mawa !

Saule, nge me wa ndongisila ya Nzambi.

O, mawa, mawa !

Yo me nata nge wapi ?

>|< Kumanisa :

Mbala mingi profete Samuele me songa Saule  
nzila ya kieleka. Mbala mingi yandi me pesa  
yandi ndongisila ya mbote, ya Nzambi. Mbala  
mingi Saule me tula ntu-ngolo. Nsuka, kukwenda  
na yandi na banzambi ya nkaka ya nganga-  
ngombo kusosa konye, na nima yandi me buya  
konye ya Nzambi. Nsuka na yandi mawa  
mingi.

O bana ! Mbote beto vanda ve bonso yandi. Beto  
vanda nswalu na kuwa ndongisila ya Nzambi.

Verse ya bubu yai :

Kana nge ke tula ntu-ngolo/ konso ntangu bo ke  
pesa nge ndongisila./ Kilumbu kele/ ntu na nge  
ta pasuka./ yo ta yilama diaka ve./ Bingana 29  
:1

Bana sala competisio bana ya bakala, bana ya  
bankento. Bo tuba yo mbala 6.  Bankunga  
ya kwenda nzila mosi ti lesa :

Bana yimba ‘Kuwa Bible’ to nkunga ya nkaka ya  
kwenda nzila mosi ti lesa yai.

Devoir sambu na bakristo :

Beno bana bakristo, devoir mono ke pesa beno,  
kuvanda nswalu kulanda ndongisila ya Nzambi.  
Yo lenda kuma na nge na malongi ya ecodim, na  
malongi ya pasteur, na malongi ya mama ti papa,  
na malongi ya balongi ya nzonkanda, na malongi

ya ndinga ya Nzambi na radio, bonso program  
 “Bible Kitoko” na 89.0 FM. Yo lenda vanda  
 malongi nge ke tanga na Bible, to muntu ya nkaka  
 ke tangila nge. Kuwa yo ti landa yo mbote.  
 Ndinga ya Nzambi, O yea  
 !

Kubinga bavidi na Yesu :

Saule fwaka na nsoni ti na mpasi. Kansi mambu  
 kuluta ngolo, yandi fwaka mbeni ya Nzambi. O  
 bana, mono ke bondila beno, kubikala ve  
 bambeni ya Nzambi. Nge lenda kuma nduku na  
 Yandi na nzila ya Yesu Kristo. Menga ya Yesu  
 futaka na zulu ya kulunsi, yo me lunga kukatula  
 mbi yonso ya nge me sala. Yo me lunga  
 kukatula kimbeni ti kuvutula kinduku na kati ya  
 nge ti Nzambi. Yandi salaka yo sambu na nge, ti  
 Nzambi tedimisaka Yandi na lufwa sambu na  
 kusonga nde kieleka, Yandi me ndima lufwa na  
 Yandi na sika na beto.

O, kwenda nswalu kudilosa na Yandi. Kulomba  
 Yandi mawa. Yandi zola kugulusa nge.

==NSUKA YA LESO 25

Kana ntangu lunga,

Longa mikanda ya Bible :

(Bangindu kele na nsuka ya mukanda yai.)  
 KUTWADISA MWANA NA YESU

Moniteur, landa bansiku yai:

- Kubenda mwana ve na kingolo-ngolo kundima Yesu. Mpeve ya Nzambi fweti kubenda yandi.
- Kupesa mwana nsoni ve sambu yandi ndima Yesu. Mpeve ya Nzambi fweti kubenda yandi.
- Kubuya ve mwana kundima Yesu, ata ya konso age, kana Mpeve kele kubenda yandi.
- Tendula mbote-mbote lukanu ya mpulusu. Mwana fweti bakisa Nzambi kele nani, probleme na kati ya Nzambi ti yandi sambu

na masumu, Yesu kele nki, Yesu salaka nki sambu na yandi.

- Mwana fweti bakisa nde yandi kele ve kaka kutuba kisambu mosi, kansi yandi kele kubalula ntima sambu yandi bika masumu, yandi yantika kulanda Yesu tii kuna.
- Tula ngolo kuzikisa nde mwana me bakisa, mpi nde yo ke monika nde Mpeve kele kubenda yandi.
- Mwana fweti samba yandi mosi. Kana yai kele mpasi, yula yandi nki yandi zola Yesu kusala sambu na yandi. Kana nge tuba nde ‘kugulusa mono’ to ngindu bonso yo, songa yandi nge, “Kaka lomba Yandi kusala yo.”
- Nge songa mwana ve nde yandi me guluka, kansi yula yandi bakestio sambu yandi kusonga nge.

NZAMBI SADISA NGE KUTENDULA  
 NZILA  
 YA KUGULUKA MBOTE-MBOTE, TI  
 KUTWADISA NA YESU KONSO MWANA  
 YA MPEVE YA NZAMBI KE BENDA !

KULONGA MIKANDA YA BIBLE

- Mukanda ya 1 Samuele kele na 2eme ndambu ya mikanda ya Bible. Ndambu ya ntete kele Mikanda 5 ya Moise. Ndambu ya zole kele mikanda 12 ya Histoire ya Israele na ntoto na bo.
- Mikanda ya Histoire ya Israel yo yai :  
 Yozue  
 Bazuzi  
 Ruti  
1 Samuele  
 2 Samuele  
 1 Bantotila

2 Bantotila  
1 Bansangu  
2 Bansangu  
Esdrasi  
Nehemia  
Estere

Bana tanga yo na liste, na nima bo tuba yo bo mosi, na nima nge songa mukanda mosi ti bo songa nki ke kwisa na nima na yo, na ntwala na yo.

- Bana yimba nkunga ke songa mikanda ya Moize ya bo me longuka dezia, ti mikanda yai ya histoire ya Israele :

### MIKANDA YA KUWAKANA YA NTAMA

Mikanda ya Moize, Moize, Moize,  
Mikanda ya Moize—Bansiku-Nzambi !  
Kuyantika, Kubasika, e Levi, Kutanga Ye  
nsuka ke Kulonga, Mikanda ya Moize !

Mikanda ya histoire, histoire, histoire,  
Mikanda ya histoire—Histoire ya Bayuda !  
Yozue, Bazuzi, ye Ruti, ti BaSamuele,  
Ye Bantotila, Basangu, ye Esdrasi  
Nehemia, ye Estere, Mfumu-Nkento Yai  
yonso kumi na zole mikanda ya histoire.

- 1 ti 2 Samuele ke songa mingi histoire ya Davidi.  
1 Samuele ke songa na ntwala yandi kumaka Ntotila, 2 Samuele ke songa kimfumu na yandi.
- Bantu ya nene beto mona na 1 Samuele kele Samuele (mutubi ya Nzambi), Saule (Ntotila ya ntete ya Israele) ti Davidi.
- Samuele vandaka zuzi ya nsuka ya Israele, Saule ntotila ya ntete. Yo yina, mukanda yai kele bonso pont ya ke manisa ntangu ya bazuze, ke yantika ntangu ya bantotila ya Israele.

Nge to dibundu na nge me defa mukanda yai na Centre des Materiels ya Ministère pour Chaque Enfant. MCE kele nduku ya dibundu ya ke sadisa malongi ya bana na nzila ya formation ya bamoniteur ti kudefa ya materiels. Beto lomba nge, na zina ya Nzambi, kuvutula mukanda yai na Centre de Materiels na nima nge me manisa kusadila yo. Mpidina, beto ta vanda na mpila kusadisa bampangi ya nkaka ti mabundu ya nkaka na malongi ya Ndinga ya Nzambi. Nge mpi ta zwa kiyeka kudefa materiels ya mpa. Yo lomba kaka nde nge ntete vutula mukanda yai ti bima yonso ya nge bakaka nzila mosi ti yo.

BONNE COMPREHENSION ti NZAMBI SAKUMUNA  
NGE TI MALONGI NA NGE YONSO !